

الهوجة
(شؤلاط.. حكاية بلد مش ع الخريطة)
د. شريف شاذلي

الهوجة

(شؤلاط..حكاية بلد مش ع الخريطة)/ رواية

د. شريف شانلي

الطبعة الأولى ، ٢٠١١



دار اكتب للنشر والتوزيع

القاهرة ، ١٠ اش عبد الهادي الطحان ، المرج

موبايل : ٠١١٠٦٢٢١٠٣

E – mail : dar_oktoob@gawab.com

المدير العام :

يحيى هاشم

تصميم الغلاف :

إسلام جاويش

رقم الإيداع : ٢٠١١/٢٢٠٩

I.S.B.N: ٩٧٨-٩٧٧-٤٨٨-١١٨-٢

جميع الحقوق محفوظة ©

الهوجة

(شؤلاط... حكاية بلد مش ع الخريطة)

د. شريف شاذلي

رواية

الطبعة الأولى

٢٠١١



دار الكتب للنشر والتوزيع

إهداء

إلى مثلى الأعلى..والرجل الذى طالما كنت مدينه له بكل شئ..إلى
أبى..والى قلب أمى وأم أمى اللتين منحانى كل ما ينبعث من قلمى
الآن...

إلى أخى الذى أفقده كثيرا..والى زوجتى الغالية..تلك الحبيبة
التي غيرت حياتى....

إلى ابنى (يوسف)..سر حياتى وكل ما ملكت وأملك..إلى رفقتى
وكل من كان بجوارى حين أحججت إليه.....

أهدى لهذه القيم الكبيرة..هذا العمل البسيط.....

د. شريف الشاذلى

٢٠١١

- المقدمة -

(١)

المكان: حجرة.. في قسم شرطة.. بين تلايف قرية صغيرة منسية من قرى تلك الدولة الفقيرة من دول العالم الثالث.

الزمان: لا أحد يعرف.. يوم.. ربما مرّ منذ زمن وربما لم يأت بعد.

الحدث: الأول....

أغلق الباب الحديدى الأحق خلف حطام رجل عجوز مهلل الثياب.. كان يترنح ممسكا بالفراغ وقدماه ترخفان إلى داخل الغرفة الباهتة في قسم شرطة تلك القرية.. كان كمن تسنده ريشة من السقوط.. كمن يحمل خلفه ثقلا من الفولاذ.. يستند بيده الذابلة على الحائط وقد رفع عينيه الغائرتين في بحر وجهه المجعد كورقة في قبضة طفل ليرى الواقفين في الغرفة.. كانوا قليلين.. لم يعياً.. سمع فقط الصوت الصارم الرنان:

"أبو هاشم هاشم أبو هاشم".

بدا الشيخ العجوز كمن يسمع هذا الاسم لأول مرة.. صمت لحظة.. ابتلع ريقه لكنه في النهاية أجاب:

"أفندم".

سمع الصوت يأمره.. يشير إليه في عصبية كى يعتدل ويولى نصف وجهه لهم.. قام بجزعه وانصاع للأوامر.. صوت الكاميرات والنور

الساطع..الكلام الكثير من حوله لا يميزه..ترك الرجل نفسه لأفكاره
وانسلخ عما يحدث حوله..الذكريات تعيده إلى مدة قصيرة..أسبوع
أو أكثر..مدة قصيرة لكنها بالنسبة إليه كانت كالعمر بأكمله وهو
ما جاء به إلى هذا المكان..كان ذلك قريبا جدا..قريبا حتى يكاد
يلمسه بيده.....

الآن يراه.....

.....

"التميرة ياله"

هكذا تعالت حنجرة العمدة بالصياح الغاضب وهو يستند بجنته
الترهلة على الأريكة فيتعالى صوت نحيبها الرنان..مبسم الشيشة في
فمه وهو غارق في عرقه كالدرفيل..صوت قرقة الشيشة ثم
السحاب الشاحب من بين شفثيه الكبيرتين يتعالى فيبدو
كشيرة..كان كالمخدر وكانت عيناه الخاويتان كالمصابيح
المخترقة.....

صوت جلبة..يرفع رأسه في تكاسل لينصت..كان صراعا
بالكلمات بين شخص ما وخفيره الذى يحرس الدار..هنا قرر أن
يحمل بعضا من الدهون في رقبته كى يرفع رأسه إلى الأعلى قليلا في
محاولة منه كى يظهر شيئا من شخصيته الصارمة..الصوت من بين
أنفاسه الثقيلة يصيح:

"فى ايه ياله منك له؟"

لم يجد ردا غير الجلبة..رفع رأسه محاولا أن يفهم لكنه تراجع
مدعورا حين رأى جسد خفيه يصطدم بالباب فيفتحه ويسقط على
الأرض كالجوال..كان سمينا مثله لكنه كان خفيرا فى كل
الأحوال.....

"فى ايه يا (عب غفور)؟"

"ألحق يا جناب العمدة"

هنا اندفع ظل رجل فى الأربعين من عمره خلف الخفير..كان
كالثور الهائج.....

"أبو هاشم؟"

قالها العمدة مترعجا.....

"أيوه يا عمدة".

"فيه..فيه أيه بس يا عم (هاشم)"

"مش عارف فيه أيه يا عمدة النصابين"

تمالك السمين نفسه وقال فى غضب متخاذل:

"ألزم حدودك يا (أبو هاشم)..أنت بتكلم العمدة"

"هو أنت خليت فيها حدود يا واطى..بقى تعملهم عليها
وتلهف الأرض وتقولى قال ايه الحكومة عايزها ومش عارف هتبني

عليها مشروع ولا كوبرى ولا أبصر أيه..وتقولى إن ليك تصريفة
مع الناس دى وفى الآخر يطلع الموضوع كله ملعوب منك..حتى
الموظف الذى عامل نفسه جى من المحافظة"

ارتجف الرجل..رفع كفه وهتف غاضبا:

"ملعوب!!..مين قال الكلام الفارغ ده؟..ملعوب ايه وبتاع ايه
أنا بتاع ملاعيب؟؟"

حذق العجوز فيه بغضب جعله يتراجع عن انفعاله المصنوع
ويغوص فى مقعده كالقنطرة..صاح فيه:

"ما كفايك بقى يا عمدة أنت لسه هتأوح وتلف وتدور..ما
خلاص الملعوب انكشف..اسمع..أرضى ترجعلى..والا والله"

تمالك كرش السمين بعض الشجاعة..ربما الافتراء كذلك فرفع
حاجبيه وقال:

"والله ايه؟..متقلش كلام أنت مش قده..الموضوع خلص
خلاص..أنت مضيت عقد"

"بالنصب؟؟"

"القانون لا يحمى المغفلين..الأرض كانت ملكك وأنت بنفسك
اللى بعت..محدث غصب عليك يا حج"

"يعنى ايه؟"

قالها العجوز مذهولاً..رد عليه الرجل وقد تمالك نفسه:

"يعنى تورينى عرض أكتافك"

قال العجوز فى ثورة:

"كتافى؟؟"

لم يشعر (أبو هاشم) إلا وقد صار الوعاء الفخارى فى يده..قلة
كما تسمى ثم فى اللحظة التالية وجد نفسه وقد حملها وانقض بها
على رأس السمين كالمحارب....

ثم انطلقت صرخة النجدة من فم العمدة.....

المكان: نفس المكان.

الزمان: لا أحد يعرف بالمثل.

الحدث: الثانى....

تحرك الظل إلى داخل نفس الحجرة..خطواته على العكس واثقة
متأنية..والصوت الهادر ينبعث من جديد....

"الغريب سيد"

كان ضخمة الجثة..قوى البنية..كثيف الحاجبين عميق التفاصيل
كالجبل وكان صوته أشد غلظة منه وهو يجيب فى صرامة...

"نعم"

كان ملثما فأشار له من ناداه بأن يترع اللثام الذى يغطى معظم
ملاحه..هكذا توقف الرجل وقال فى فتور:

"يعنى لازم يا باشا؟"

"ياله يا سيدى خلصنا..أحنا فضيلتك".

لم يرق هذا القول للرجل القوى لكنه أنصاع..وجد نفسه وقد
كشف مع وجهه ذكريات وقت قريب مضى..ذلك الذى يقرب
الأسبوع أو أقل..هكذا صار له أن يكون هنا.....

فى هذا المكان.....

.....

"كعب الغزال يا متحنى..بدم الغزال"

هو سائق سيارة نقل وقد كان فى حالة (مرتفعة)..يعنى كالأحمق
وهو يقود على أول الطريق الزراعى مغادرا نفس تلك القرية
الصغيرة..يضرب كشافاته لينير الأخضر من حوله وجسده يهتز مع
سيارته لا يدري هل هذا من فعل الطريق أم من فعل ما يتغنى
به.....

على جانبي الطريق كانت الجماعة جالسة..مجموعة من الوجوه
الملثمة وقد غاصت بين الحقول الكثيفة حاملين السلاح وأعينهم
الواسعة تراقب الأحمق القادم من بين الخضرة كالصقور..أنفاسهم
مكتومة وعقولهم مذبوحة..لا صوت غير صوت القادم من بعيد
خلف ضوء الكشافات.....

"كله تمام يا كبير"

هز الغريب رأسه مع قول الرجال ثم نزع البندقية عن كتفه
ورفعها متحفزا بإشارة إلى الأشباح في الجانب الآخر للتأهب..ثم
دون كلمة واحدة تحركت الأقدام والأذرع كي يجد السائق العاثر
ظلا يهوى أمام كشافات سيارته..عرف أنه جزع شجرة ضخمة
فتوقف مذعورا...

"أستر يا رب"

ثم رأى مجموعة من الأشباح السوداء تنقض على باب سيارته
لتزعه من فوق عجلة القيادة..صوت الباب المعدني
يغلق..سقط..حاول أن يهرب لكن البندقية في وجهه
أخبرسته.....

"قوم"

انتفض الرجل ولم يرد..وبدا يفهم....

"قروم"

وجد نفسه ينهض في بطاء بين الأشباح السوداء..وشعر بالطرف
البارد خلف ظهره ثم انبعث الصوت الغليظ من خلف اللثام يهتف:

"قدامى"

ثم سار جسده المرتعش السائب بين الظلال كمواكب الجنائز..لم
يكن يرى نهاية الطريق لكنه سمع الصوت الغليظ يهتف:

"واطى"

هنا فهم السائق بصورة كاملة..قفز إلى الخلف لتفحص الذراع
الباردة فيه أكثر وصاح:

"(الغريب)؟"

تعالى الصوت العميق القادر من أعماق أقصى آبار الخوف
ليمسك بتلايب الرجل ويصرخ فيه:

"أنا مش حذرت كل سواقين البلد محدش يسوق عربيات العمدة
وينقل غلته بره البلد تانى..أنت مجنون يا ض ولا عبيط".

ثم رنت الصفعة لترميهِ خارج نطاق الرؤية..انتفض الرجل في
مكانه وهو لا يقوى على القيام..قال:

"أكل العيش يا بيه"

تقدم (الغريب) إليه وجذبه من ثوبه المتسخ..ثم قال في غلّ:
"علشان تاكل أنت عيش تبيع أهل بلدك..وتقبض من الكلب
ده..حقيقى مراه"

لكن الغريب لم يكمل..تابعت عيناه الظل القادم في الظلام
يصيح في دعر:

"كبسة..كبسة..بوليس"

رمق الغريب السائق الذى انكمش مذعورا حتى ذاب في
الأرض..

"آه يا كلب"

ثم ألجمه قبضة قضت على ما بقى منه وأسرع ورجاله يتلقفون
بندقياهم ليتبادلوا إطلاق النار....

"(أبو الليل) من الناحية دى ، (جابر) من الناحية دى"

ثم اندفع نحو السيارة وفي عقله ارتسمت صورة ثابتة لرفيقه الحاج
(محمد)..فرصته الأخيرة أن يختبئ بين ثنايا القرية نفسها هربا من
الهجمة الغادرة.....

"حاسب يا غريب"

كان هذا آخر ما سمع ولم يستمر تفكيره كثيرا..رصاصة وحيدة
كانت كافية كي تقتله من مكانه.....
وأظلمت الرؤية.....

المكان: نفس المكان مجددا.

الزمان: وقت مقارب.

الحدث: الثالث....

"محمد إبراهيم عبد المنعم"

خطا الرجل الوقور باعتداد إلى داخل ذات الغرفة..عيناه إلى
الأعلى وصوت أنفاسه العميقة يرن بين أذان الحضور..الحاج (محمد)

رجل من الثقال في قريته لكن قلة كانت تعرف علاقته السرية بالغريب.. كان لقاءهما صدفة وكانت الصدفة مع أمثال الغريب من الهلاك.. لكن ملابسات عديدة شاعت لهما في النهاية أن يتفقا على خصومة واحدة وعدو واحد.. تحالف عجيب بين رجل الدين والتقوة وبين رجل الليل الذى يهابه الجميع.. في النهاية اجتمعت الأهداف لا الأشخاص وولدت نتائج....

هكذا وقف الحاج محمد.. استجاب للأوامر.. ترك أضواء الكاميرا تلطم خده الأول فيفرد لها خده الآخر.. لم يكن يعرف شيئا عن مؤامرة العمدة وضابط القرية الشاب (المأمور كما يحبون أن يسموه) لكنه كان واثقا من القصة برمتها حتى لو لم يعيش لحظة منها من الداخل.....

كان يعلم كل شيء....

.....

"والله ما أنا عارف أودى جميلك دى فين بس يا جناب المأمور"
يحتسى الشاب قهوته في ثقة وخيلاء.. يضع قدم على أخرى ويقول للعمدة:

"ولا مأمور من اللي كانوا قبلى قدر يعملها.. خلصتك من الغريب ورجالته شيلة واحدة.. بكده يا عم تقدر تنام وتشخر وتعيش حياتك من أول وجديد.. دا الأمر جاه من فوق مش أى كلام... أنا مكناش هنقدر عليه لوحدنا"

"ربنا يخليك ليا يا باشا.. ما أحتا حيايب برضوا والمصلحة
واحدة"

ثم مال عليه وقال بأنفاس ملهوفة:

"كده بقى مش فاضل غيره"

تناول المأمور رشقة أخرى وابتسم.. قال:

"الحاج (محمد).. متخفش.. مسافة متغلينا كده غلوة حلوة
هتكون الأخبار الحلوة جت.. إحنا مش هنسيب حد يلعب برة
القانون يا عمدة حتى لو كان الحاج محمد نفسه.. آمال أيه؟"
لم يصدق السمين نفسه.. أخذ نفسا من بين أنفاله وقال:
"الله أكبر"

ثم صاح كالمجنون:

"بت يا (سعاد).. حضري الغدا لسيدك المأمور يا بت"

المكان: نفس المكان.. أيضا.

الزمان: وقت لاحق..

الحدث: الرابع....

رفع (جمضان) رأسه ببطء وهو يخطو خطواته الأولى إلى داخل
الغرفة.. يرفع وجهه الشاب ليرى ظلال الحاضرين بعيون لا تميز

التفاصيل.. لم يفكر.. كان السجن بالنسبة له كأي شيء آخر.. كانت الحياة بالنسبة له كسطح أملس بلا ملامح وكانت أوجاعه كمن يعيشها شخص آخر.. لا يراها ولا تراه.. هكذا تحرك كما أشاروا.. نفذ الأوامر وسار إلى منتصف الغرفة.....

هناك وقف.. وكان يفكر....

.....

"أبوك مات يا (جمضان).. أبوك مات"

"حاول تفاهم مع أعمامك يا (جمضان).. علشان مشكلة الميراث دي تخلص"

"نصيبك البيت وحتة الأرض.. أنت هتفترى؟"

"يا بني مفيش شغل.. هتشتغل أيه يعنى بالشهادة اللي معاك؟"

"مممكن تبيع حتة الأرض علشان تدبر معاشك.. عمك مستعد يشتريها منك"

"هتعمل ايه يا (جمضان) يا بني.. مفضلش غير البيت"

"مفيش شغل يا بني.. الظروف صعبة اليومين دول.. هشتغلك ببلاش؟"

كانت كل ذرة في قلبه تكره أعمامه.. لكنه لم يكن يتوقع حين جاء عمه الأكبر يعنفه - من جديد- أنه ولأول مرة سوف يخرج عن سنين صمته ويفقد أعصابه.....

يسبه ربحا..ينفعل كذلك..لكنه كذلك لم يتوقع أن يرفع فأسه في وجهه..وأن يضرب كذلك..راحة عجيبة تمتزج ببقايا من حجل وتأنيب غير مقنع للضمير.....

دماء..دماء.....

ربما لم يمت..لكن (جهمان) عرف أن هذا كفيل بتوفير المأكل والمشرب له في غرف الحبس.....

هكذا ترك الفأس راضيا وظل ينتظر.....

- المقدمة -

(٢)

وداخل الجدران الرطبة لغرفة الحبس اجتمعت هذه المجموعة غير المتناسقة.. منذ اللحظة الأولى انسحب الغريب والحاج (محمد) إلى ركن المكان.. لم يكن أحداً يجراً على الاقتراب من الأول لذا صار هذا الركن أقرب إلى المحرمات.. كان الجميع يخشاه.. لكن (جمضان) لم يكن يفعل....

"ممكن سيجارة؟"

حذق (الغريب) في وجه الشاب بنظرة سامة.. لكن الأخير كان كالمخدر طول الوقت.. لم يكن يخاف وكانت طريقة إلقائه للسؤال أقرب ما تكون إلى (التناح).....

"أنت مين يا شاطر؟"

قالها الغريب وكانت لهجته أقرب إلى تكسير العظام.. لكن الحاج (محمد) كان ككل أهل القرية يعرف الكثير عن (جمضان) وقد ساعده كثيراً.. لكنه ككل أهل القرية أيضاً يعرف ما آل إليه عقله من فرط الضغوط.. وكان تدخل الرجل الكريم ليمنع المجزرة فهو كذلك يعرف من يكون الغريب.....

في النهاية أجلسه الحاج (محمد) معهما بعدما أخبر الغريب هامساً بشئ من خلفيات هذا الحطام.. تقبل الغريب ذلك إكراماً للحاج (محمد) وكانت قناعاته أن الجلوس مع هذا الصبي هو قمة الكرم والتواضع.....

تكلم الحاج (محمد) كثيرا بينما كان كلام (جمضان) أقل كثيرا.. لكن الغريب لم يتكلم إطلاقا.. لم يكن غاضبا بل إنه على العكس كان محبا أن يصغى.. كان بعيدا عن القرية منذ زمن لذا وجدها فرصة أن يستمع.....

كان الأمر كذلك في البداية.. بعدها وجد الغريب في كلام الشاب ما يسمعه.. كان كلامه مزيج من الجنون والعقل وكان يتكلم في خلفيات لا يعرفها أحد.. كلام كبير عن أحوال الناس والفساد والأوضاع التي لا تتغير.. بالنسبة للغريب أو حتى للحاج (محمد) كان الفساد فساد العمدة.. وكانت أحوال الناس هي أحوال أهل القرية.. حتى الظروف كانت في الأمطار ومواسم الجفاف.. لكن الأخير كان يفهم أكثر.. كثيرا.....

من هنا بدأ الغريب يتكلم.. يسأل.. والواقع أنه قد بدأ يتجذب إلى حديث الشاب المقهور ويعترف أن له شخصية محبة وأنه كذلك يفهم الكثير.....

العلم نور.. هذا واقع لا ينبغي أن يكره الاعتراف به.....

هكذا صار يطلب الحديث معه في عفو المقتدر.. يقدم السجائر ويحرقها معه.. حتى الحاج (محمد) وجد في الشاب العجيب وقفا بمضى واعترف في قرارة نفسه أنه لم يكن يعرف الكثير عنه.....
هكذا اتسع الركن المعزول ليضم الثلاثة.....

لا أحد يتحدث معهم ولا يتحدثون مع أحد.....

فقط في اليوم الرابع وحين مرض (أبو هاشم) كان أول تعارفه
بهذه المجموعة الشاذة.....

ربما لأنه محموم.. وربما لأن أحدا لم يعره اهتماما.. والمشكلة أن
الرجل في الزنزانة لم يكن ملحوظا على الإطلاق.. الجسد النائم للأبد
في ركن المكان.. المهم أن أحدا ما كان ليهتم لولا أن مال عليه
الحاج (محمد) مرة.. عرف أنه مريض ومن جديد عاد إلى شخصية
الرجل الكريم.. ثمة معركة عنيفة مع الحارس لكي يأخذ الرجل
المريض حقه.. كلام كثير لكن الجميع كان يعرف من هو الحاج
(محمد) حتى الحارس المذعور على الباب.....

في النهاية ظهر الطبيب لا أحد يعرف من أين جاء.. بالطبع لم
يكن هائل الاقناع كطبيب لكنه كان المطلوب.. ناوله عقارا في غرفة
المأمور ثم أعاده إليهم ومعه شريطان من الدواء.....

بعد يومان صار (أبو هاشم) واحدا منهم.. لم يكن هذا يصنع
فارقا ضخما ولم يمتعض الغريب كثيرا للرجل الذي لا يتكلم
تقريبا.....

هكذا -تقريبا- سارت الأمور.. وصار هؤلاء الأربعة في سجن
داخل السجن.. كان الجميع يرهبون تلك المجموعة المنفردة.. رجل
الليل والشيخ والمريض وذلك الفتى الأشعث الذي يحاضرهم في
حماس.....

قال (جحصان):

"مجلس عارف ايه الأسباب.. مجلس عارف أحنا بقينا كده
ليه.. مجلس عارف حقه.. كله تايه.. تايه"

هكنا مر يوم.. اثنان.. ثلاثة.. وأيام أخرى.....

ولكن في اليوم الأخير.. تمت عملية الحرب.....

كانت عملية من طرف واحد.. وكان الجميع يعلم أنهم رجال
الغريب.. في النهاية سجلت الأحداث بطريقة مختلفة.. هروب من
المستشفى أو ما شابه.. هكنا حرب الأربعة في عبادة الرجل المحترف
في ليلة ثم جاءت ليال أخرى لينسى الناس ما حدث.. في الحقيقة لم
تكن هناك رغبة واقعية في العثور عليهم.. كلها ملفات تافهة وربما -
أيضا- شائكة.. هذه الملفات العفنة تزدى برأيتها من يفتحها من
فرط ما تراكت القفارة تحت غطائها.. أسبوع عاتم من البحث
السوري ثم انطلق الملف تماما.....

على كل حال.. انتهت قصة هذه المجموعة العجيبة.. كان من
الواضح أنهم قد احتضوا مع أقرانهم في الجبل.. وهي منطقة محرمة ما
دام الغريب هناك.. ومع الوقت تصير هناك أشياء أخرى للكلام
عنها.....

- المقدمة -

(٣)

مر ما يقرب من العام على تلك الأحداث القدرية العابرة.....

لم يحتاج الأمر لأكثر من ربع هذه المدة كي يتراجع العمدة عن مخاوفه وينسى الأمر كاملاً.. هذا ما حدث.. كانت بعثات الظلال السوداء تغزو القرية من حين لآخر لتحمل بعض الأشياء إلى الجبل.. وكثيراً لتحمل أهل السحناء الثلاثة إلى هناك كي تحميهم.. هكذا تأكد الجميع أنهم قد فروا إلى الجبل.. لا أحد يخاف من هذا فمن يذهب إلى الجبل عادة لا يعود.....

كان هذا كله تقريباً منذ عام ايضاً.....

الأول.....

الاسم: أبو هاشم هاشم أبو هاشم

المهنة: فلاح

العمر: تسعة وأربعون عاماً

الحالة الاجتماعية: أرمل

مستوى التعليم: الابتدائية

كان الرجل المحروز قد تربع على رمال الليل.. أرغى رأسه
الأصلع التحيل وأمثل للقمر ينير ملامح وجهه البشاحية في
عطف.. شاربه الكث غارق في العرق كلابب أفكاره.. وكان
شاردا كعادته.....

يقول (أبو هاشم) في إحياء:

"عمري ما كنت أتخيل بعد العمر ده كله إلى الأبد.. في
الليل وسط الجرمين وولاد الليل.. أنا كويت والارض كلى.. ومشي
عارف ليزاي يعيش إلى قاضل من عمري في اللكان ده.. وكما
عالة على ولاد الليل.. أكل حرام.. صحيح هم مهمما كان رجلالة يس
الحرام حرام.."

"الله يسمحه الولد ابنى.. إلى معتدش غيره.. أعره مع الله
محروا على الخليج وولا حس ولا غير.. لو كان موجود مكشش
اتبهل البهيلة دى.. على العموم خلاص حتى لو رجح في يوم من
الأيام مفتكرش ممكن يعترى على سكة.. الله يسترها معه بقى مطرح
ما راح"

"على العموم خلاص.. أنا كله كله صحى على أى
وبودع.. مش فارقة بقى أعيش الأيام في عشة أو في جيل.. كله كله
الأرض ضاعت ومعلش عندى اللي يسترى.. على الأهل أنا مستور
فيهم"

.....
الثانى.....

الاسم: الغريب..فقط

المهنة: رجل جبل

العمر: أربعون عاما..تقريبا

الحالة الاجتماعية: لم يتزوج

مستوى التعليم:

جلس الغريب على مسافة من الرجل المحوز وشرع ينظف
سلاحه العتيق في اعتزاز..وجهه يحنى خلف لثامه وفي عينيه نظرات
جادة لا تبدل..حاجبين كثيفين ووجهة ممحطة إلى الأبد..كان
منهمكا في عمله الذي يحب حتى الموت.....

يقول الغريب:

"لو حد في البلد دى قال إنه يعرفنى يقى كذاب..أنا نفسى مش
فاكر أى حاجة قبل ما جى الجبل..أنا كنت ابن حمستاشر ساعتها
ومكتتش لسه بقت الغريب..هربت لأنى مكتتش لاقى أكل..هربت
لأن مكانش ليه أهل وضهر يحموى وكان سهل جدا أبقي عبد
ومرمطون للى يوكلى..سرفت وقتلت وهربت على الجبل..وهنا
بقى دراعى هوا اللى يوكلى وبقى الكل يخاف منى..فى الأول كان
ممكن أنهب أى حد..بعدين عرفت مين اللى ينتهب ومين اللى
يتساب فى حاله علشان ميقاش فى يوم من الأيام زى..ويكون ذنبه
فى رقبتي"

"بس الكلام ده جاء متأخر قوى..الناس مكتتش فاكرالى غير
اللى شفوه منى فى الأول..على العموم مش هتفرق..فى النهاية الناس
تخاف منى أحسن متستهيفنى والناس فى بلدنا كده..يا تخاف يا
تستهيف..يبقى تخاف أحسن"

"المهم إني أقدر أحمى نفسى..ويوم ما أقع زى ما وقعت الأقى
ضهر أقوم عليه..وده اللى حصل"

"الغريب مش هيرجع ضعيف تانى..مهما حصل"

...

الثالث.....

الاسم: محمد إبراهيم عبد المنعم

المهنة: فلاح كبير

العمر: خمسة وأربعون عاما

الحالة الاجتماعية: متزوج

مستوى التعليم: الاعدادية

تمدد الرجل المنهك على قطعة ثوب مهللة غطت الرمال الباردة
من تحته..افترش الفراغ وأراح وجهه إلى القمر..كانت ملاحه
البيدنة تشي بكرم صادق وأبوية عميقة..كذا المعانة..كان كل شئ
من حوله لا يصدق.....

يقول الحاج (محمد):

"أنا فعلا تعبت..مش علشان كنت في وسط بلدى مرتاح
وميسور الحال..لأني في الأصل متولدتش كده..وياما اتبهذلت وياما
صبرت..بس اللي تعبتى بجد إني اتخدت غدر..أنا مستحقش بعد
العمر ده كله إني أكون في مكان زى ده..اللي يستحق المكان ده
ناس غيرى قعدة ولا على بالها..عملت ايه أنا علشان أهرب ذى
المطاريد في الجبل"

"كثير عليا في السن ده أهرب واستخى من الناس وأنا اللي لو
غبت يوم كان الكل يبسأل عليا..كان ليا مكانى وهيتي في
بلدى..دلوقت أنا هنا..مستخى زى الفيران..هربان من أيه؟..مش
عارف"

"مكنتش أعرف إن بعد الاحترام والهيبة وسط الناس ممكن انتهى
هنا..وأموت وسط الجبل..لا حول ولا قوة إلا بالله..قدر الله وما
شاء فعل"

...

الرابع.....

الاسم: بهانة الأسود هريدى

المهنة: ست بيت

العمر: ثلاثة وثلاثون عاما

الحالة الاجتماعية: زوجة الحاج (محمد)

مستوى التعليم:

دخلت السيدة الطيبة وسط الكهف الصغير مسترة بغطاء واسع..جلست بجوار النار..وجهها البدين كوجه طفل في المهد..حنون لكنه لا يقوى على الحزن..كنت تراقب الرجال من بعيد ولم تكن تتكلم..فقط تنفّس في توتر.....

تقول (هانة):

"أنا تجاوزت الحاج محمد من زمان..طبعاً أنا كنت عيلة ومكانش ليا رأى بس لو كانوا سألوني كنت طبعاً وافقت..طول عمر الحاج محمد صيته في البلد إنه راجل محترم وملوى هدمومه..وبصراحة لما عشرته عرفت قد ايه هي حنين وطيب..فعلاً أنا ربنا كرمنى بيه"

"حاجة واحدة كانت بتعكن عليا بس عمرى ماكنت أرضى أكلمه فيها وأزعله..هي حكاية أن وقت كله ضايع مع الناس..البيت مش ييفضى..بس أنا عارفة كويس إن الناس بتجبه وتحترمه ودى حاجة تفرحني..علشان كده مكنتش بكلمه في الموضوع ده نهائى"

"كان أسود يوم في عمرى يوم ماخذلوا رجلى منى..واتسجن..أنا عارفة إن العمدة المفترى أكيد ورا القصة دى بس مكنتش عارفة أعمل ايه..ومصدقتش نفسى لما عرفت إنه هرب..في الآخر جم شوية رجال الله يسترهم دلونى علي مكانه"

"مين كان يصدق إن بيت العز بيت الحاج (محمد) ينتهى بيه
الحال كده..منك الله ياللى كنت السبب..بس فى النهاية ده
جوزى..والست ورا رجلها مهما يتبدل بيه الحال..وربنا كرم"

...

الخامس.....

الاسم: جمصان جمعة

المهنة: عاطل..يهوى التكنولوجيا وكتابة الشعر..والسياسة
وأشياء أخرى..ويلعب دور المثقف فى بلد لا تعرف شيئا عن الثقافة

العمر: خمسة وعشرون عاما

الحالة الاجتماعية: أعذب

مستوى التعليم: ثانوية عامة..أكثر أو أقل لا توجد معلومة
أكيدة.

كان نحيفا كما ينبغي أن تكون النحافة..شعره كثيف مجعد
وعيناه غائرتان بين ملامح وجهه المغيرة..كانت السجارة فى فمه
وقد جلس فى منتصف المجلس بين الناس..هكذا كان يفعل كل
مساء.....

يقول (جمصان):

"أنا عشت عمرى كله فى البلد دى..محدث سمعلنا حس ولا أحنا
سمعلنا من الناس حس..لحد ما أبويا مات..ساعتها بس أفنكرونى

لزوم الجدةانة..طبعا طبطبوها عليا لحد ما كتفى اتخلع وعيطولى
بضمير وقالولى شد حيلك يا بنى..عمامى عملوا كده برضوه وفى
الآخر خلدوا الأرض..بعدها طبعا الناس نسيتمنى تانى وأنا
نسيتمهم..اتيهدت علشان ألقى لقمة العيش..وطبعا سبت
التعليم..ودى كانت فعلا النهاية لواحد زى".

"آخرها بقيت هنا..مش مهم ازاي..دى نهاية طبيعية لعيشة بنى
آدم زى..بنى آدم منقرض..مش مهم".

"فى الآخر كله محصل بعضه"

فى ليلة باردة عاد إليهم بعض رجال الجبل بالمؤن والسحائر
كعادتهم..هكذا جلس (جمضان) وسط الناس وتناول
سيجارة..جلس الغريب بجواره ثم جاء أحد الرجال وأشعل النار
أمامهم بمعرفة سابقة أن السهرة قد بدأت..مادام الغريب و(جمضان)
فى نفس المكان فإن الحديث سوف يبدأ..بعد دقائق تجتمع الوجوه
الباقية تدريجيا ليتبادلوا الحديث حول أى شئ..كان هذا ما يحدث
كل يوم.....

قال (جمضان):

"رغم إن الحياة هنا صعبة بس هو ده اللى يعمل الرجالة..كمان
البعد عن الناس غنيمة"

"ولا أیه یا عم (أبو هاشم)؟"

انتفض (أبو هاشم) كمن كان يحلم..ضحك (الغريب) ضحكة قصيرة وقال:

"أیه یا عم (أبو هاشم)؟..فينك؟"

"سرحت حبتين"

لم يسأله أحد..و ظل هو يحرق في النيران التي أنارت عينيه حتى كادت صورته أن تعكس عليها..أجاب بلا سؤال:

"لحد أمي هنفصل كده؟..عايشين زى الفيران فى الجحر..كل اللي نعرفه عن الدنيا بنعرفه من الرجالة اللي بتزل للبلد من وقت للثاني..غير كذا أحنأ أموات"

قال الحاج (محمد):

"يا سيدى مش أحسن من السجن والبهدلة.."

قال (جمضان):

"ثم يا حاج أنت عايز ايه من البلد..أنت مقطوع من شجرة..ايه اللي ممكن يربطك غير أهلك؟..غير كده الجبل والبلد واحد"

"عايز ترجع لأيه؟..ولمين؟..البلد معدتش بلدك يا عم (أبو هاشم)"

"أزاي الكلام ده بس يا بني؟"

اعتدل (جھسان) لیڈا حدیثہ المطول لكل ليلة:

"یا عم (أبو هاشم)..من ثلاثين سنة أيام ما كنت أنت في عزك
يمكن كانت البلد فعلا بلدكم..بس دلوقت خلاص..فيه العملة
والمأمور..فيه عضو مجلس شعب وشورى وعضو الحزب..فيه
أصحاب أراضى وعقارات..دول هم اللى البلد بلدهم یا عم (أبو
هاشم)..أنت ترتيك متأخر قوى"

ضحك (أبو هاشم) وقال:

"ما هو على كلامك ده یا بنى يبقى عمرها ما كانت
بلدى..زمان وأنا صغير كنت أسمع عن البشوات وأصحاب
السرايات..بعد كده بقى فيه حاجة أسماها رجالة الحكومة..بعد
كده أصحاب الأراضى والحزب وناس كده..مش معنى كده إن
البلد دى مش بلدى..كله بيروح ويبنى وأنا اللى قاعد یا بنى..أنا
الأصل حتى لو تحت الأرض".

قال الحاج (محمد):

"المشكلة أهم زى ما أنت قلت..بيروحوا ويبحوا لكن عمرهم
ما بيختلفوا..بس دا حال الدنيا كلها..ربنا خلق الناس
درجات..وفى كل حنة فى الدنيا فيه اللى يملك واللى
معندوش..ولا ايه یا (جھسان) یا بنى؟"

احتد (جھسان) وقال:

"يمكن... بس مينفعش يكون. المستول. اللي. بيأخذ مرتبه علشان يشوف مصلحتك حاله كده.. وأنتم حالك كده.. أكلك وشربك وفلوسك وصحتك كده.. وهو. أكله وشربه وفلوسه كده.. وبيعاملك كده وبيتحكم فيك كده.. لدرجة إنك بتكرهه وتمنى إنه يزول.. بس مش بمزاجك.. بيفضل برضوه فوق رقبتك.. فكرك ده يحصل فى الدنيا كلها؟"

قال الحاج (محمد):

"لأن الناس بتخاف.. وهتفضل تخاف يا بني.. الناس بتشتكى بصوت واطى ويتدور على حد يحلها حقها.. جد مين محدش عارف؟"

تكلم (الغريب):

"كل الناس بتخاف.. ويوم ما شعرهم بيض يرجعوا يسألوا أنفسهم هم فضلوا عمرهم كله خايفين من ايه"

قال (جمضان) وهو يحدق:

"فى النهاية الناس كلها مستنية فارس.. مستنية حد من عالم تانى.. حد عظيم مفهوش عيب.. هوا اللي يفكر ويحارب ويجمع الناس وهما عليهم يجروا وراءه ويهتفوله.. ويتقدوا أوامره وأفكاره.. الفارس فى نظر الناس هو الجنى اللي هيحل كل المشاكل فى غمضة عين".

قال الحاج (محمد):

"كل زمن وليه فارس..ايه المشكلة؟..بس المهم يكون فعلا فارس..وأن اللي يمشوا وراه يكونوا فعلا فرسان..مش العدد في الليمون"

أشار له (جمضان) وأعقب:

"عارف يا حاج (محمد)..وأنا صغير كان فيه انتخابات مجلس شعب..كان أول مرة يترشح فيها (حمدى) بيه ضد (زكى) بيه اللي كان هو العضو ساعتها..الناس كانت بتكره (زكى) بيه طبعا بس أنا مكنتش فاهم هما ليه كانوا بيعجبوا (حمدى) ده..الناس مشيت وراه وكان عيال البلد دائما يقولولى إنه باين عليه راجل طيب..راجل كويس..واهو أحسن من (زكى)..مع إننا كنا أول مرة نشوفه لكن الناس كانت فعلا بتكره (زكى) ده..(حمدى) قال إنه مختلف والناس طبعا كانت عايزة تصدق..نفسها تصدق إنه فعلا الفارس..أدى الحكاية..وفى الآخر (حمدى) بيه اللي فاز..فاز بالناس أو علشان كان هو مرشح الحزب مش مهم..المهم إننا كلنا عارفين إن (حمدى) ده طلع أظلم وأضل سيلا..وأديه قاعد..دول فرسان الزمان ده".

قال أبو هاشم وهو يسعل:

"مفيش حاجة اسمها فارس..بتاع أيه هيجلنا بيه من البهوات
علشان يحللنا مشكلتنا؟..وعلشان أيه؟..علشان يا حرام صعبانين
عليه..الحقيقة إن الناس دى بتأخذ مننا مش بتدينا..فى كم واحد
ممكن يدافع عن حقك وبينيلك من غير ما يكون تمن ده كرسى من
الكراسى؟..وكرسى يكسبه كويس قوى كمان..مين ممكن يعمل
ده لوجه الله؟".

يقول الحاج محمد:

"برضوه فى ناس بتعمل لوجه الله يا أبو هاشم".

قال جمصان:

"وبتكشف فى الآخر إنهم بيدفعوا عن حقنا علشان يخطوا فى
ناس تانية..واحيانا علشان يتشافوا ويخشوا فى الدائرة".
"يا عم جمصان أنت بتقول كلام كبير قوى..أنت بتحيوه
مين".

ابتسم جمصان فى مرارة ولم يرد.....

فى الليلة التالية تواصل الحديث.....

جمصان جالساً وبجواره الجمع..كان يقول:

"أحنا مفيش حد حاسس بينا هنا..إحنا بالنسبة للناس
عالة..مصدر مشاكل..جهل فقر ومرض وانفجار سكانى..أنا

متهيألى الأماكن النائية اللى زينا كثير من المسئولين بيحلموا أنها
تزول من الخريطة..بيحسوا إن ملايهمم بترمى فى الأرض لما
يصرفوها علينا".

الجميع يهزون رؤوسهم فى اقتناع.....

فى اليوم التالى قال حمصان:

"أنت أيه فرصتك فى العيشة هنا..هتعيش وتموت جاهل..من غير
طموح..ممكن تسافر تعملك قرشين وتعيش تتفشخر بيهم على أهل
بلدك..لكن أكثر من كده أيه..دا أنت أما بتسافر بره البلد لحنة فيها
شوارع أسفلت بتعتبر إنك سفرت للخارج..أحنا برا حسبة الأكابر
خالص".

"صح والله".

فى اليوم التالى كان رجال الجبل قد أحاطوا بجمصان كمؤتمر
انتخابي..!!

"عمرك ما شوفت نظرة الناس فى المدينة لك لو سفرت بجلييتك
دى هنا ولا هنا لما يعرفوا إنك فلاح..يقولوك إنك عبيط وجاي
من ورا الجاموسة..لو كنت جاهل فلأن القرش اللى بيستخسروا
الكبار يصرفوه عليك بيتصرف عليهم..وبعد كدا نشتكى إن الغرب
بيضطهدنا..أما أحنا أهو بنتضهد نفسنا".

في اليوم التالي سأل الحاج محمد:

"وأمتي الوضع ده هيتغير؟"

"عمره ما هيتغير.. حتى لو أتغير في الدنيا كلها التغير عمره ما هيوصلك لأن الناس مش شايفاك أساساً.. بالعكس الوضع هيبقى أسوأ.. هيكون الناس في الأماكن النضيغة بيعلموا أولادهم في أحسن مدارس ويبربوهم على الكمبيوتر والانترنت وأنتوا هنا أقرب مدرسة على بعد اثنين كيلو.. يعني يا تطلع عينك علشان تودي ابنك مدرسة في آخر الدنيا ويا عالم بحالها علشان ابنك يتعلم أى تعليم وخالص يا يفيض بيك وتقول بلاها علام.. ساعتها هتكون بتزود عدد الجهلة في البلد".

بمحص أبو الليل شفتيه ويقول:

"وساعتها إعلانات التلفزيون مش هترحمنا".

في اليوم التالي قال جمصان:

"المشكلة إنهم مش عارفين الحقيقة.. وأحنا كمان مش حاسين بقيمتنا.. أحنا عندنا رجالة تفوت في الحديد.. جدعنة وأصالة وشرف.. وفوق كده عندنا أسلحة أكثر من اللي في وزارة الداخلية!!!.. ومع ذلك راضين بالعيشة دى".

ضحك الغريب.. وهو نادرا ما يفعل...

"والله بيتكلم صح".

في اليوم التالي كانت العصبية هي السائدة..كان الأحساس العام هو الغضب من هذا الوضع الذي لا ينتهى....
ولم يجتمعوا هذه الليلة....

في اليوم التالي لم يجتمع أحد أيضا..كان جمصان يسند ظهره على الحائط الصخري ويفكر بعمق..يحسب أشياء ويخطط على الرمال..لم يكن مستعدا للحديث وهكذا لاحظ الناس فلم يتحدث إليه أحد....

بالمثل..في اليوم التالي.....

في اليوم الذى يليه كان جمصان قد انتهى..كان متحمسا وكان حريصا على جلسة كل يوم.....

"أحنا مش هنستنى فرسان يا أخوانا..أحنا اللي هنكون الفرسان..وهنعلم العالم كله".

"يعنى أيه يا بنى الكلام ده".

انطلق جمصان فى الكلام وهو يؤدي كمثل مسرحى..وقف بجوار النار حتى بدأ كالعلاق..أنظار الحشد عليه وهو يقول:

"أحنا أهو قدام الدنيا كلها..ناس عايشة فى الجبل على حدود قرية ملهاش وجود..فرصة أغلبتنا فى التعليم كانت ضعيفة..لكننا

أقوى بكثير من أى حد ونقدر نرفض أوضاعنا ونغيرها..أحنا مش
عالة بالعكس..أحنا ممكن نغير التاريخ".

"يعنى ايه الكلام ده؟"

قالها أبو الليل متعجبا....

"يعنى أحنا هناخد رجالتنا ومالنا وحلنا ونترل رفيعين السلاح فى
البلد".

قاطعها الغريب:

"هنحارب الحكومة ولا أيه؟"

"بالظبط كده".

قالها حمصان فى حماس وأردف:

"مش بس المأمور..أحنا هنجمع معانا كل رجالة الجبل..هنوصل
لكل جحر مستخفى فيه حد طفح من العيشة..هنترل
بالسلاح..وهنحارب لحد ما نمسك البلد كلها"

نظرات ذاهلة...

"وبعدها"

"هى لسه فيها بعدها؟!".

"بعدها هنطلع مع البلاد اللي حولينا لحد ما نوصل
للمدينة..ممكن يسموه انقلاب لكن أنا هأسميه ثورة ويوم ما
هندخلها هتكون دى حدود بلدنا الجديدة..جمهورية شولاط".

نفس النظرات الذاهلة..ثم تكلم أبو الليل:

"روح يا حمصان نام شكلك تقلت في الشرب".

"شرب أيه؟"

"شرب أى حاجة.. ما أنت أكيد لقيت حاجة تشربها في الصحرا
دى".

"عيب يا أبو الليل مش كده".

قالها الحاج محمد ثم استدار لحمصان وقال:

"أيوه يا بني بس ده كلام خيالى قوى".

ثم قال الغريب:

"والله الكلام ده عخش نفوحتى.. أنا حبيت الحكاية دى.. بس
برضوه أنا مع الحاج محمد.. دى وسعت منك قوى يا حمصان".

هتف حمصان في حماس:

"يا جماعة لا وسعت ولا حاجة.. أنا حاسب كل حاجة
بالملى.. أحنا فعلا نقدر نجهز عدد كبير من الرجالة والأسلحة.. كله
هنا قلبه ميت ومش خايف على حاجة.. والقوة الحقيقية فى السرعة
والمفاجأة.. الكلام ده كله ممكن يتعمل فى نص ساعة".

"يا شيخ؟".

هكذا بدأ الناس فى الانسحاب من حول النار كلا إلى مكان
نومه.. تنهد حمصان لكنه لم يستسلم.....

وعاد بمزيد من التفكير.....

في اليوم التالي أصر جمصان على فرصة ليشرح خطته.....

كان ناجحا في طريقة عرضه..قويا في شخصيته وكنت العقول
من حوله أضعف منه كثيرا..هكذا استمعوا إليه إلى النهاية وقد
أصابتهم الحيرة....

"أفذكروا كلامي كويس..عيشة الجبل مفيش فيها
رجوع..وهتتحكم عليكم لآخر العمر مفيش كلام..معتدكوش
حاجة تخسروها..وأحنا لا عيل ولا تيل".. هكذا سادت حالة من
الصمت وبدأت الأصوات تتعالى على استحياء.....

في خلال أسبوع كان جمصان قد كسب معركة..لم يكن
يصدق لكنه تعامل مع الموقف في سرعة..وبدأ حديثا مطولا مع
الحاج محمد والغريب.....

كانت الشمس قد أوشكت على الشروق حين فرغ جمصان من
كلامه....

وكان راضيا للغاية.....

الهوجة

(شؤلاط. حكاية بلد مش ع الخريطة)

(١)

عادة ما يأتي الصباح ساكنا كصفحة المياه في مثل تلك القرى الصغيرة.. نشيط لا شك لكنه هادئ.. عادة ما يفكر الناس حين يأتيهم النهار فيما يحمله يومهم هذا من تقلبات القدر.. يحدث في كل مكان لكنه عادة لا يحدث بين ثانيا هذا البلد الساكن.. لا أحد يفكر أو يبحث عن شيء لا يتوقعه وعادة ما تصدق توقعاته.. فقط يفاجئهم الموت أحيانا فيكون يجنون ويشقون الجيوب أو تأتيهم لحظات الميلاد بالفرح الأحمق حين تصير.. هي أشياء يختص الدفء صعوبتها ويعظم حزن الناس بمحتها.. في النهاية تبقى حقيقة أن في هذا منبع السكينة وثقل خطوات هؤلاء القوم.. هذا باختصار هو صباح هذا اليوم وكل صباح.....

فقط لم تمتد القوانين هنا لأحضان الجبل.. ولم ينم أحد بعد ليلة الأمس الطويلة.. كان الغريب في المقدمة وإلى جواره أبو الليل وكانا منهكين في إعداد كل شيء.. بينما بقي الآخرون تحت أمر جمصان ورجلى الجبل.....

كانت الشمس قد بدأت رحلتها ككل يوم حين انهمى الرجال استعدادهم بالفعل.. تسربت بعض العناصر من قلب الجبل لتوزع في نقاط معينة بعيدة وخلفهم تحرك السلاح.. على القمة كان جمصان.. يراقب كل شيء في توتر ويتحرك كالطيف بين المهرولين هنا وهناك.. تنهكه أفكاره فيجلس على صخرة ويلتقط أنفاسه من بين شقوق السماء لتحرق صدره.. كان الحاج محمد بجواره وقد صار عجوزا جدا.....

"يا بنى أنت مصدق إن ده ممكن ينفع..دا خيال"

يهز الشاب رأسه....

"هيحصل..هيحصل لأننا بعيد جدا عن الأماكن اللي بيعيش فيها الناس..الناس اللي بيعتبروهم ناس..أحنا منبوذين فى الجبل..منبوذين فى البلد كلها..وعقبال ما يخذوا خبر ويتحركوا هيكون كل شئ تحت أيدينا"

"والشرطة؟"

"كلنا عارفين إن مفيش حكومة دخلت بلدنا تقدر على الجبل ولا على رجالته والسلاح اللي معاها..أما شرطة المركز فالغريب واللى معاها مظبطين أكثر من نص رجالتهم وفى بينهم كلمة ومصالح..هنلعب على ده علشان نخدوهم شوية ونكسب وقت لحد ما نوصل"

أخرج الحاج محمد أنفاسا محترقا من صدره..فكر ثم عاود السؤال:

"والمحافضة؟"

"السلاح كثير والرجالة أكثر..ثم أحنا محافضة مسلمة محدش يسأل عليها أو يخاف منها..يعنى الأمن مريح ومش جاهز للحاجة زى كده..وأحنا محتاجين مجرد دقائق..متخفش"

"متخفش؟..دا كلها كام يوم يا بنى والبلد كلها هتقلب علينا"

استدار (جمضان) برأسه فى بطة..ابتسم ضاغطا على حروف جملته:

"ساعتها هيحي دور اللعب على الأعضاب.. التلميح بحاجات
 ممكن تخوفهم وتربك حساباتهم.. متخفش.. أنا عارف كويس أنا
 بأعمل ايه" ..
 ثم نهض من جلسته وتنازل عنها للاحكام وقد تناسى رقيقة
 الجالس.. اندفع وقد استرد رجته القاسية بقفزة غاضبة لم يجرعوه
 الرجال يحثهم على الحركة.. بدأ كمجرم قديم بينهم.....
 "أنت مش خايف؟.. أنت بتعمل كده ليه؟"
 أتاه صوت الحاج (محمد) فرد الشاب دون أن ينظر:

"أنا مش خايف يا حاج (محمد).. مش غلشان أنا أسد لكن لأن
 معنديش حاجة أحسرها.. معنديش حد أبكى عليه أو يبكى
 عليّ.. يا حاج (محمد) أنا عارف الناس اللي تحت الجبل كويس
 وعارف تقبى بينهم.. عارف قد ايه إهم.. غلابة ولنا أظبط واجبة
 فيهم.. بس أنا عارف أكثر منهم هم ممكن يقولوا ايه.. هم فكروا إن
 الدنيا آخرها كده وإن مفيش أحسن من اللي هم عايشينه.. حتى
 اللي عارف ميقدروش يعمل حاجة.. كله خايف.. خايف على نفسه
 وأهله وأكل عيشه.. مفيش غير واحد زي حالتي هو اللي ممكن
 يعمل الحاجة اللي كل الناس عايز تعملها ومش قدرة.. مش لأن
 أحسن واحد لكن لأن مفيش عندي حاجة أضيعها.. حتى الحرية
 ضاعت"

"والغريب؟"
 صمت (جمضان) ليرة.....

"الله أعلم به..بس الأكيد إنه زهق من لعبة الجبل ونفسه يورى
وشه للنفس..نفسه يعيش زى البنى آدمين"

ثم استدار إلى الحاج (محمد) واتسم في مرارة..بدا وكأنه
يسأل..هكذا رد الرجل وقد أعياه القلق:

"مش عارف..قلبي يقول إنكم صح..ربنا بستر."

ابتسم (حمضان) راضيا ثم قال:

"بركة دعاك يا رجل يا طيب"

ثم وأصل ما كان يفعل وانصرف الرجل معه.....

الشمس توشك على الظهور من خلف الأسوار الباهتة..يسير
الغريب حاملا ظله الضخم أمام قدميه حتى وصل إلى حدود
(حمضان) الذى أقمك فيما هو فيه..قال له بصوت قوي:

"الرجالة في البلاد الثلاثة اللي حولينا أدونا الإشارة بأن كله تمام
عندهم..(أبو الليل) كمان وصل لحدود المركز وفرش رجالة وسط
الزرع مستنى الإشارة"

"وبالنسبة ل(ضاحي)؟"

"(ضاحي) رجل جبل عتيق..وأحنا محتجين له..من حسن الحظ
إن في رقبته جمائل كثير لى هيردها من غير سؤال أو مقابل..وقوة
الراجل ده هتغطى أماكن واسعة بعيدة عن أيدينا..هو لحد دلوقت
عندى كلمته من غير سؤال"

"يقي أنت هتكون على رأس رجالتك وأنا والحاج (محمد) هنكون معاكم فى البداية..لحد ما نوصل بيت العمدة..هيفضل الحاج (محمد) هناك علشان يسيطر على أهل البلد..الناس بتثق فى الحاج (محمد) وهتسمعه..أنا هأكمل معاك لحد محطة الإذاعة..أهم حاجة اللي يقع تحت أيد الرجالة يخلوه..هنحتاج كل حاجة".

"وجودك معنا خطر عليك..بس ده شر لابد منه"

مهرولا يأتى (أبو الليل) قادمًا من اللا مكان..يتلع ريقه ويقول من بين أنفاسه اللاهنة:

"الرجالة مستنيينك يا كبير..وعلى أمر منك"

يرى (جمضان) الحاج (محمد) وقد فرغ من صلاته فى ذلك المكان البعيد الذى حوله الرجل لركن يتعبد فيه..اتجه نحوه فى حين أشار الغريب إلى (أبو الليل) كى يتبعه..من بعيد يتعالى السعال المجروح فيعرف الجمع أنه ولا شك (أبو هاشم)..يتحرك من حجره قادمًا نحوه..هكذا توقف له الحاج (محمد) وتعالى صوت حنجرتة يستحته:

"ياله يا (أبو هاشم)..أمر الله نفذ..هتقدر تكون معنا"

"أنا صحى حديد"

كان يكابر كما يفعل دائما..لكن الوقت لم يكن يسمح بالكثير أو القليل من الماطلة..أشفق الحاج (محمد) على عظامه لكنه أخيره بالترتيب فى عجل.....

من بعيد وقف (جمضان) والهواء اللافت يضرب روحه..أطال النظر إلى الجموع الهائلة وصناديق الذخيرة التي لا تحصى تحت أقدامها..على السيارات التي دارت في انتظار الكلمة..جيش كامل يتحرك تحت الظل لكنه لم يتطلع يوما لغير النهب..اليوم جاء من يحسن قيادته..أخذ نفسا طويلا كقبلة الحياة ثم استدار إلى الغريب الواقف كالصخرة وقال:

"على بركة الله"

ثم تناول سلاحا من جانبه.....

الساعة السادسة صباحا.....

في البداية بدا للقرية الصغيرة وكأن زلزلا قد هز أوصالها العجوز..بعد برهة استطاعوا أن يميزوا بين الوجوه المندفعة ملامح رجال الغريب..أصابعهم الفزع..لم يفهموا سر هذه الأعداد المهولة وهذا التسليح وسيارات النقل..كذلك ظهورهم في النهار..من ثم أنقبضت قلوب الجميع وهروا إلى منازلهم محتمين وقد توقعوا الأسوأ..وحين انتشر الرجال في أركان القرية ورفعوا السلاح أمرين الجميع الالتزام ببيوتهم أدرك الجميع في ذعر أن مذبحة تار من تلك التي تشهدها القرية من حين لآخر على وشك الحدوث..لكن ما علاقة الغريب بالتأر..وهل يحتاج التأر لهذه الترسانة!!!

فر الجميع في ذعر هستيري في لحظة بصر وتركوا القرية كالبساط..هكذا اتخذت فرقة طريقها نحو مركز الشرطة وأخرى نحو دوار العمدة.....

يرفع الغريب مدفعه ليعثر الرصاص في الهواء.. يصرخ بصوت
ملتهب:

"هنا قبركم يا كلاب"

الساعة السادسة والنصف....

انتهت الدقائق الدامية بسرعة البرق.. تعالى صراخ الناس من كل
مكان خلف حوائط المنازل غير الآمنة وهم يرددون الدعاء ويصلون
في فزع وقد تبعثر صوت طلقات النار من حولهم.. لم يكن أحدهم
يتعدى حدود الجهل في الإدراك لكنهم كانوا على يقين بأن الأمر
هذه المرة يختلف.. كان (عوض) أحد أبناء القرية وكان يملك كل
الشجاع كي يختلس نظرة من خلف النافذة.. هكذا عرف أن جثة
العمدة قد أُلقيت أمام داره وأن قسم الشرطة قد احترق وأن عددا
غير هين من الجثث قد أحاطه كالسور.. صرخ مذهولا وعاد يخبئ
من جديد.. هكذا انتهت المهمة القاسية واندفعت الجموع المقاتلة
وعلى رأسها الغريب تغادر القرية تاركة خلفها الحاج (محمد) وعدد
محدود من الرجال كي يؤدوا دورهم.. هكذا سار الرجل حتى توسط
القرية وصاح من فوق جواده ورجاله يحملون الأجساد المتكومة
على الأرض:

"يا بلد.. أنا الحاج (محمد).. أسمعوني.. متخفوش محدش هيتعرض
لكم"

هكذا بدأت الرؤوس تطل مرتجفة من خلف النوافذ.. كانت قلوبهم تثق بالرجل لكن الأمر كله كان بالنسبة لهم لحظة من الجنون....

واصل هو:

"أتوا عارفين أنا مين.. وأنا بقولكم إنكم في أمان.. لو مش فاهمين اللي حصل النهاردة أنا هقولكم"

ثم سحب اللحام ليحرك حصانه وأكمل:

"أحنا شلنا عنكم هم إنكم تقولوا لأ.. جينا من الجبل علشان نرفع الظلم اللي أنتوا بتتنفسوه من سنين.. لدرجة إن أولادكم نفسهم معدوش عارفين إن ده ظلم.."

"أحنا جينا نرجعكم أسياد من جديد.. جينا نرجعكم حقوقكم ونعيشكم العيشة اللي تستحقوها.. خير بلدكم مش هيروح لحد - مهما كان - غيركم.. في اللحظة دي رجالتنا في كل حنة بينضفوا البلد من كلاهما.. وفي ساعات هتكون المحافظة كلها بتاعتنا.. خلاص يا رجالة.. من النهاردة هتكون بلدنا زى التلفزيون.. ويمكن أحلى"

هكذا تعالى التهليل الطيب وبعض التصفيق غير المنظم.. يفهم أو لا يفهم لكنه يؤيد.. تأييد جبان بعض الشيء.. كان صوت الحج (محمد) عاليا لكن صوت السلاح كان بالطبع أعلى....

والآن.....

كانت جيوش (الغريب) الزاحفة كالزئبق إلى القرى المجاورة تمر بقرية فالأخرى فتجدها خرابا.. ثم تنضم الجيوش الصغيرة المخربة إلى

الجيش الكبير لتصنع جيشاً أكبر..عند نهاية الطريق ظهر الجيش الأعظم..جيش (ضاحي) وقد أدى ما عليه..عمليات متتابعة على القرى الصغيرة لم تصل بعد إلى مسامع الكبار في هذه الساعات المبكرة..هكذا التأمّت الجموع في اتجاه المدينة..كنت الحشد الضخم الآن أكبر من ألا يلاحظه أحد.....

هنا بدأ (جمضان) مرتجفا يتحدث وسط الناس وإلى جواره الغريب..كان الرجال قد صاروا في قمة النشوة..كل هذا القتال وهذا البطش..لحظات متعة ما كانوا ليحلموا بها أبدا مهما كان المقابل..كانوا كالسكارى.....

"(مصطفى)..خذ رجالتك وعلى محطة التلفزيون..(ضاحي)..رجالتك على مديرية الأمن وخذ معاك (أبو الليل) وخذوا معاكم العربيات والقنابل وكل اللي هبتوه.. (أبو الليل) ورجاله هيحتلوا محطة القطر وبعدها هيخلدوا المصالح الحكومية واحدة ورا الثانية"

هكذا أطلق الغريب صيحته ليفعل الأحلام:

"ياله يا رجاله..البلد بتاعتنا".

ثم أنتشر السواد في طرق المدينة التي بالكاد استيقظت..فقط لثمن من الدهشة بأكثر مما أثارت من الذعر..الوجوه السوداء داخل السيارات وخلفها أعداد ضخمة من الرجال فوق الخيول..مشهد سينمائي عجيب لكنه منفر..هكذا تراجع الناس من أمامهم ولم يجرأ أحد على اعتراض هذه المسيرة المظلمة.....

وأمام محطة البث المحلية تراجع أفراد الأمن البائسين في
ذعر.. حاولوا تحليل راتبهم لكن قنبلة دخان أراحت ضمائرهم.. لم
تفت ثوان إلا والجميع بداخل المبنى.. بقت مجموعة صغيرة يرأسها
(جمضان) بينما أنسال الباقون لمساعدة (ضاحي).....

بداخل المبنى وقف (جمضان) حاملا سلاحه.. لا يصدق ما
يحدث.. لكنه منفعل.. منفعل ومتحمس.....

"طلعي على الهوا"

قالها (جمضان) فاندفع مخلص من القوم رافعا سلاحه نحو العاملين
القابعين في ركن القاعة كاللدجاج وصاح في غلظة:

"(جمضان) بيه بيقولكم طلعه على الهوا.. بسرعة لفجر
دمغاتكم"

تقدم نحوهم شاب يرتجف وقال وهو لا يقوى على النهوض:

"يا باشا والله تحت أمرك بس أنا منصحكش"

"ليه؟"

"يا بيه أحنا قناة محلية.. يعني مفيش غير المدام والأولاد بيتفرجوا
عليها.. إهدار مال عام يعني.. لو فيه حاجة عايز تقولها للمدام
والأولاد قولها وأنا أوصلهم ومتعبش نفسك حضرتك.. أكثر من
كده أحنا مش هنفيديك"

"مش شغلك.. طلعي على الهوا"

ارتجف الرجل وهو يرى السلاح في وجهه.. قال من بين أنفاسه:

"اللى تشوفه حضرتك"

ثم أشار إلى فريقه وتحرك معهم في حذر..بينما لم يغادر السلاح
مجال رؤوسهم قط....

"أيها الناس..أبناء هذه المحافظة الكريمة..اليوم يوم
مجيد..عظيم..كبير..بالنسبة لكم جميعا..بعد احتلال غاشم دام
الآلاف السنين من قوى عديدة تابعت على هذا البلد..اليوم واليوم
فقط يتغير التاريخ..يتحور ويتجمل ويعود إلى رشده..اليوم واليوم
فقط صارت هذه المحافظة الطيبة في مكانها الطبيعي..من اليوم أعلنها
جمهورية..جمهورية..جمهورية"

"أيها الناس..هذه الخطوة العظيمة التي دفعنا ثمنها من العرق
والدم..هذه الخطوة التي تأخرت كثيرا لأن أحدا لم يجرأ على أن
يفعلها..الآن صارت واقعا صادقا نراه بدماء الأبطال..الآن صار
الخير كله لكم..لن يسرق ولن ينهب..والأهم..لن تكونوا أقل من
العواصم والمدن الكبرى..لن تمشوا ولن تكونوا في الظل..أنتم الآن
دولة لها كيان..وقيمة..مبارك عليكم أيها الشعب العظيم"

كان (حمزة) شابا من طبقة المطحونين..دفعته صدفته أن يشاهد هذا
المراء..ربما كان الوحيد.....

"هو الراحل ده بيقول أيه؟..أنا أيه اللى خلاني أجيب القناة الواقعة
دى"

"المسلسل يا حيوان..هات القناة اللى عليها المسلسل"

لم يشاهد (جمضان) مجزرة الأمن.. لكنها أنهى الأرسال وظل
هناك يرتجف في انتظار الإشارة.....

كان أخاه الصغير في ذهنه.. ذلك الطفل المنتظر في الجبل.. لكن
العملية كانت في ذهنه أكثر.. جسده يشتعل بالحماس والخوف حتى
أحمرت مقلتيه.. لا يستطيع أن يكبح عقله المجنون.....
أنهى الإرسال وبقي ينتظر بين رجاله.....

وحين جاءت إشارة النجاح لم يصدق.. إشارة انتهاء معركة الأمن
واحتلال مبنى المحافظة...

ثوان ثم تم احتلال المداخل.....

يتعالى الهتاف المتحمس وتتصاعد أصوات الحناجر.. الآن يتماسك
(جمضان) من الدوار المحيط برأسه.. يرتجف ويعدو كالمجنون.. يصبح
في رجاله ثم في المخرج كى يظهره على الهواء.. حتى المخرج أصابته
حمى الحماس وقد شعر للحظة بمنتهى الأهمية المفقدة.. يعدو هنا
وهناك ويلقى أوامره.....

"مبروك يا باشا.. ربنا يجعل عنتبها فتحة خير عليك إن شاء الله"

ثم يشير إليه كى يتكلم من خلف الكاميرا.. يتوسط (جمضان)
مقعده ويقول بصوت مرتجف وقد تدفقت الدماء في وجهه:

"أيها الناس.. لقد فعلها الرجال.. الأبطال.. الآن أعلن عن عودة
الوطن الغائب.. اليوم أعلن عن مولد الجمهورية.. لن نهمش من
جديد.. وسوف نصنع قيمتنا بأيدينا.. من اليوم لن نخاف.. لن
نخاف.. اليوم هو مولد جمهورية برشوط الحرة".

"بيان رقم ١: إعلان قيام جمهورية برشوط الحرة وعاصمتها قرية شولأط مركز مرتاحة غرب."

"بيان رقم ٢: تولى شئون البلاد - بصورة مؤقتة ولحين اختيار العناصر المناسبة وانتخابها - لمجلس قيادة الحركة الشعبية:

- السيد : جمسان جمعة رئيسا للمجلس.
- السيد : الغريب سيد وزيرا للداخلية.
- السيد : ضاحى الصابر وزيرا للدفاع.
- السيد : محمد إبراهيم عبد المنعم وزيرا للزراعة.
- السيد : أبو الليل وزيرا للخارجية.
- السيد : أبو هاشم هاشم وزيرا للصحة.
- السيد : عمرو أبو الليل وزيرا للصناعة.
- السيدة : بهانة الأسود هريدى وزيرا للثقافة.

على أن تتم أول الاجتماعات اليوم الساعة الثامنة مساءا..وسوف يتم إعلان نتائج جميع الاجتماعات بصورة مفصلة بعيدا عما اعتادته الجماهير من عبارات رنانة: مباحثات مثمرة..جهود متواصلة..بحث سبل تدعيم كذا وكذا"

"بيان رقم ٣: سوف يمر البلاد بمرحلة كاملة من التغيير والتطوير والشفافية..سوف تشهد عودة الحقوق واعطاء الفرصة لجميع الموهوبين والقادرين بعيدا عن الاسم أو الوساطة..كلكم أبناء هذا الوطن والوطن يحتاجكم جميعا"

(٢)

العاصمة القديمة....

نفس اليوم..بعد الأحداث الدامية بدقائق..كثيرة نوعا.....

قاعة اجتماعات مجلس الوزراء.....

"دى فضيحة..كارثة..مهزلة..خيبة ثقيلة"

انكمش المجلس كله أمام الغضب الهادر المنبعث من حنجرة
رئيس الوزراء..كان وجهه محتقنا كإطار سيارة لم يلمس
الأسفلت..يطوح بكفيه هنا وهناك في الهواء كمايسترو..كان الجو
العام أقرب إلى الانفجار..البعض يغلى والبعض ينقر على الخشب
بلا انقطاع فيبدو الايقاع كخليفة مشهد يوشك على
الانفجار..لكن البعض ايضا - وعلى الرغم من ذلك - لم يكن
متوترا بالفعل.....

"كنتوا فين يا جدعان لحد ما حصل الكلام ده..دول احتلوا
المحافظة ومبنى الإذاعة..ناقص أيه كمان؟"

مسح وزير التأمينات والشئون الاجتماعية الرزاز عن وجهه
وقال:

"طيب أنا ذنبى ايه تصحون الساعة ١٢ الظهر علشان الحكاية
دى..أنا وزير التأمينات"

"خلاص يا سيادة الوزير..اتفضل كمل نوم في بيتكم بدل بقت كده وأحنا أسفين على إزعاك..ونوعدك مش هنصحى سعادتك غير لما تقال الوزارة".

تصاعدت المهمات بأن (قال الله ولا فالك) وأشياء من هذا القبيل لكن نظراته الغاضبة أسكتت هذا اللفظ سريعا..هكذا رفع وزير أخر يده يطلب الكلمة وقال:

"حضرتك طيب أنا برضوا وزير البيئة..أروّح معاه!!"

يصيح رئيس الوزراء في هياج:

"يا سيدى كلها ساعات ونريح كلنا في البيت..متخفش..واحتمال نهرب بره البلد".

انكمش الوزير أمام هذا الهجوم اليائس في حين تحدث أحد الوزراء في وقار وقال:

"بصفى وزير الثقافة أحب أشير بأصبع الاتهام وبشكل مهذب متحضر ولكنه في نفس الوقت حازم ومؤثر إلى وزير الداخلية"

هكذا انتفض وزير الداخلية واقفا وصاح:

"نعم؟..مش فاضل غيرك يا وزير الثقافة..يا بتاع الشو الروسى والطبل والزمامير ومهرجان السيرك القومى..متخليك محترم زى اللى سيقوك".

هكذا يتدخل رئيس الوزراء غاضبا ويقول:

"متقول لنفسا.....ك"

"كفا.....ية"

هكذا صاح رئيس الوزراء..صمت الجمع للحظة فالتقط نفسا قصيرا وأردف:

"أنتوا هتخنفوا قدامى وتنسوا المصيبة السودا اللى حلت علينا..سيادة الرئيس بنفسه مستنى تقرير باللى حصل"

هكذا تراجع كل وزير فى مقعده وأنكمش فيه..مرت لحظات من الصمت قبل أن يقول وزير الصناعة فى ضيق:

"يا باشا بناقص محافظة..دى حتى كانت فقر ومش جاية همها" حدق فيه رئيس الوزراء فى كراهية فخرس....

قال وزير الداخلية فى حزم:

"متخفش يا باشا..احنا هنقطع عليهم الميه والنور".

"بعد ايه؟..بعد ما كرمتنا اتبعثرت"

"الموضوع هيتلم فى ثوانى قبل ما يكبر يا فندم"

ثم أردف:

"الموضوع بسيط..هو بس وزير الدفاع يطلع الجيش....."

قاطعه وزير الدفاع كالمجنون:

"تأ.....نى..يا سيدى أعمل حاجة مفيدة لنفسك وبلاش

فضايح..تدخل الجيش ده عار عليكم".

كاد الاشتباك الأحق أن يحدث لولا أن تعالى رنين الهاتف
الخاص فأمسكه رئيس الوزراء مسرعا وأجاب:

"تمام يا فندم"

هكذا حرس الجميع وقد عرفوا طبيعة المتكلم..تسمروا كالتماثيل
حتى أن وزير الدفاع لم يعد لجلسته....

"تمام يا فندم"

ثم ابتلع ريقه في توتره.....

"تمام يا فندم"

ثم أغلق الهاتف وراح يمسح وجهه بكفيه في توتر..همس وزير
الداخلية في قلق:

"يا فندم أحنا مش محتاجين جيش ولا حاجة..أنا هخلص
الموضوع ده في دقائق..أينعم أنا مش عارف قوقم بالظبط بس
مفيش مشكلة"

"لا يا سيادة الوزير..أصير شوية"

قالها رئيس الوزراء ببطء فتراجع وزير الداخلية مندهشا.....

"سيادة الرئيس حبيب نتروى شوية لحد منفهم بالظبط الكلام
الى اتقال في البيان بتعهم..بتاع الدول الصديقة ده"
"حضرتك تقصد..."

"كلام الرئيس صح..ممكن القصة كلها تكون لعبة كبيرة بتلعب علينا..يعنى أى تحرك أمنى أو عسكرى ممكن يستغل ضدنا..ونخش فى دايرة حقوق الإنسان وقوات أجنبية لحفظ السلام وألخ ألخ..."

"الموضوع لازم يدرس بحرص"

تسمر الجميع.....

هكذا مسح رئيس الوزراء على رأسه مجددا وقد تمالكه شعور

عارم بالضياح.....

للحكومة ضدنا..إحنا لسه قدمنا نضال كبير علشان نقول إننا
عدينا".

"علشان كده بقولكم إننا علشان نوصل لازم يكون الشعب
ورانا..هو ده سندنا الحقيقى وأساس قوتنا والداعم لينا..وهو سبب
الثورة..علشان كده عايزين فى خلال الفترة القصيرة القادمة ثورة
تغيير..مفيش أكل ولا شرب ولا نوم..فيه سهر وتعب علشان نقدر
نطرح مشاريع حقيقية تسعد الشعب وتغير من شكل البلد دى
تماما..عايزين نكون البلد اللى نستحقها".

"أنا الفترة الجاية هغيب فى المدينة ومعايا (ضاحى) علشان ندعم
إجراءات الأمن والدفاع ونكون على اتصال بالحكومة لمحاولة تحقيق
استقرار للموقف..الحاج (محمد) مكان الفترة دى..عايز أرجع
بعدها ألاقى الناس بتزغروا فى الشوارع..عايز نتائج".

هز الجمع رأسه فى حين أمسك (جمضان) الورق الذى أمامه
وراح يقلبها فى تركيز..قال:

"مهم يكون الاجتماع ده محاط بأكبر قدر من السرية زى ما كنا
بتكلم".

قتل أبو الليل شاربه وقال نافخا صدره العملاق:

"وأنا بنفسى أشرفت على إجراءات الأمن يا ريس".

"عظيم..أول موضوع مطروح للمناقشة..بخصوص الخارجية
وتنسيق العلاقات مع الدول المجاورة أولا والدول العظمى ثانية".

يرد (أبو الليل):

"تمام يا ريس..أحنا ماشيين بمبدأ (اللى مينفعنيش
ميلزمني..أحنا هنمد علاقتنا مع الدول المتقدمة وهناك أنا طبعاً
حبايب..لكن بالنسبة للحيران فنظامنا صباح الخير يا جارى..أحنا
مش هنضيع فلوسنا وأرواحنا على مشكلهم اللى مبتخلصش وفى
الأخر نتشتم على الفضائيات..أحنا دلوقت بعيد عن كل المشاكل
وحدودنا نضيقة..يقى نكير دماغنا ونوفر..وأحنا اللى هنتدى
نشتم الناس فى الفضائيات..وده لوحده هيعملنا جبهة مش قليلة".

ينظر إليه (جمضان) متعجباً:

"أه ده ؟..جبت الكلام الجامد ده منين يا (أبو الليل)؟"

"تريبتك يا أستاذ".

"عظيم..عظيم..استمر".

"بس يا ولد....!!"

كان هذا الصوت الهادر المهدد من حنجرة (أبو الليل) ناهراً ولداً
صغيراً كان قد تسلق الشجرة بجوار النافذة وراح يتابع الاجتماع فى
شغف..هكذا قفز الولد من فوق الشجرة ما بين الذعر والضحك
وراح يعدو....

ابتلع أبو الليل ريقه فى حرج وتحاشى نظرات جمضان العاتبة..ثم
تنحى وقال:

"باين في حاجة غلط حصلت في إجراءات الأمن..بعد إذنك يا ريس أنا هكلم الرجالة في التلفون علشان الأمن يستتب".

هكذا تناول سماعة الهاتف وهم بالكلام..لكنه انكتم بفترة قبل أن يفعل وعقد حاجبيه وهو ينصت..كان قد سمع في هاتفه:

"مش عايزة كلام في الموضوع ده يا نحمده".

"يعنى أيه يا كاتعة..هتسبيه يتحوز عليكى وتسكتي له؟"

"يتحوز على مين؟..ده أنا كنت شرحته ورميته للكلاب تشمشم في ماصرينه..وتحول وتموت".

هكذا أغلق أبو الليل سماعة هاتفه مبهورا وسط نظرات الجمع المتسائلة..ثم تدارك نفسه فابتسم باضطراب وقال:

"كله تمام يا رجاله..بس فكروني أغير التلفون ده علشان مش أمان قوى يعنى!!"

هز جمصان رأسه في لا مبالة ثم راح يقلب في أوراقه مجددا.....

"الموضوع التاني..بيخص وزير الدفاع..سيد (ضاحي)..طبعاً هيكون معايا اليومين الجايين في مبنى المحافظة القلم علشان نخط الاستراتيجية الدفاعية واثمنى تكون فعلاً جاهزة".

"جاهزة يا ريس".

"على بركة الله".

"ہم فین؟.. ہم فین؟"

تنہد (جھصان) وقال:

"مش ضرورى يا (عمرو).. المهم الاجتماع الجاى تكون الخطة جاهزة علشان ننقشها".

"یعنی اسی سبب سے اسے اسبوع الجہا؟"

"عمرؤ؟"

ثم قلب الورق وقال:

"الموضوع الرابع يخص الصحة..عايزين نظام صحى متكامل يدعم الطبقات الفقيرة..وعايزين حرب قاسية على الأمراض المتوطنة..طبعا أنت راجل خيرة وأكيد المناسب".

"طبعاً..طبعاً..الأفكار كلها في دماغى".

قَالَهَا (أَبُو هَاشِمٍ).....

"بس يا ولد".

صاح بها (أبو الليل) مجددا وقد فار دمه.. صوت ضحكات طفولية وأقدام تعدو.. هكذا هز جمصان رأسه مجددا بلا تعليق.....

"الموضوع الخامس والأخير يخصص دعم الانتاج الزراعى وتحقيق الاكتفاء، التصدير.. طبعاً الحاج (محمد) يعرف أزاى يحقق ده"

"بالنسبة لحضرتك يا ست (هانة) وكوزيرة للثقافة.. اه.. اه.. اه.. أعمللنا.."

ثم فكر لبرهة قصيرة وقال:

"أعمللنا أى حاجة حلوة كده تجي في دماغك".

نظرت إليه هانة في بلاهة.. هكذا تنحنح وقال:

"كلام عظيم.. الخطط دى هتأخذ على الأقل أسبوعين لتجهيزها وده ميعاد الاجتماع القادم معاكم لما أرجع من المدينة إن شاء الله.. بس دى مدة كبيرة.. أنا عايز تبلغوني في خلال يومين بخطط مبدئية.. تتنفذ بسرعة وتعلن بصورة يومية على الناس في التلفزيون.. عايزين المواطن يحس بالفرق بسرعة علشان يكون معانا.. تمام؟"

"تمام يا ريس؟"

"وأنا يا ريس؟"

قالتها (هانة) فقال (جمضان):

"ريحي اليومين دول يا ست الكل أنتي تعبتي اليومين اللي فاتوا.."

ثم أردف وكأنما تذكر شيئا:

"ويا ريت كمان حضرتك تمسكى مع وزارة الثقافة وزارة البيئة والتأمينات.. يبقى كده كثر خيرك!!!"

(٤)

الإعلام اليوم

جريدة الإجمام وهى جريدة حكومية:

"أنباء عن بعض القلاقل فى إحدى القرى الصغيرة جنوب البلاد..شغب من بعض المواطنين بسبب الخلاف على قطعة أرض ينتهى بأحداث عنيفة فى قسم الشرطة..والأمن يسيطر على الموقف"

جريدة ضيق البلعوم وهى جريدة معارضة:

"انقلاب عنيف بالجنوب..مجموعة من الإرهابيين يقومون بانقلاب مسلح وينفصلون بالمحافظة معلنين قيام الجمهورية..والحكومة مازالت تائهة..والفضيحة تهرز الإعلام المحلى والأجنى"

جريدة صوت شؤلاط وهى جريدة جديدة حلت محل الجريدة المحلية السابقة:

"أبطال من الجنوب..يحققون الحرية والكرامة..الجماهير فى الشوارع ترقص وتغنى ابتهاجا بيوم الاستقلال".

قناة البحيرة:

يستدير المقدم بكرسيه اتجاه الشاشة الأولى ويقول:

"أستاذ مسعود العضو النشط بالحزب الحاكم..رجاء ما ردك على ما أثير بخصوص الانقلاب الحادث في جنوب البلاد وفشل الحكومة في السيطرة عليه؟"

يظهر الوجه المكتنز على الشاشة..يميل حتى يتلع الكدر ويقول في بطاء:

"والله أنا اعتقد إن - في كثير من الأحيان - يستغل بعض الناس المعروفين للجميع أحداث شغب عارضة جدا جدا بتحصيل كل يوم في أى حنة في العالم هز صورة الدولة وتلفيق أحداث خيالية وسخيفة والأغرب دفعنا دفعاً إننا نؤكد الأحداث دى وإلا نتهم قال أياه إننا بنخفي الحقائق..ده كلام مضحك ومعتلش إن في حد يصدقه خصوصاً....."

"حسناً..حسناً"

ثم يدور ويتحدث إلى الشاشة الثانية:

"أستاذ عثمان..بصفة حضرتك من قادة حزب (بكرة حد جميل) المعارض..تعليقك على أحداث (شولأط)؟"

"هو أيش عرفه هو؟..هو كان قمر صناعى؟..ده...."

كان هذا صوت الرجل على الشاشة الأولى من ثم تم حجب الصوت عنه..هكذا تكلم الصوت من الشاشة الثانية في عصبية:

"اعتقد أنه من السخافة إن الحكومة تتعامل معانا بمبدأ ثلاثين سنة فاتوا قبل الدش وتعدد دور الصحافة..يعنى تنكر حاجة العالم كله

أتكلم عنها وتناولها بالصور والتحليل.. أين الشفافية؟.. أين
المصداقية؟"

تنحى المقدم وقال:

"أستاذ عثمان.. القضية كبيرة.. ألا يوجد عنك تعليق إضافي؟"
"آه.. آه نعم نعم.. أكيد فيه كلام كثير.. نحن نرفض.. نرفض أى
نوع من.. من التعقيم.. الشفافية يا أخوانا.. الشفافية" الشفافية

تمدد (بسطاوى) تحت ظل شجرة ضخمة وقد أعيا الكفاح
ذراعه.. هو مواطن من أبناء القرية البائسة وقد عاد إلى عمله في فجر
اليوم الثانى كجموع الفلاحين بعد أن استقرت بهم الأحوال وبعد
وعود الحاج محمد الواضحة بالأمان.. كان الانهاك قد أصابه فقرّر أن
يستريح تحت ظل الشجرة العجوز وبجواره تمدد زميله (سعد).. كان
هذا الأخير قد فرد منديلا به طعام ودعا زميله كى يشاركه.. رفض
في البداية لكنه استجاب تحت إلحاحه وتناول أقرب شيئا لأمس كفه
وهو لا يكذب يراه.. سأل متثاقلا:

"أنت فهمت حاجة من اللى حصل أمبارح فى البلد ده يا واد يا
سعد؟"

"والله يا (بسطاوى) ما فهمت حاجة.. هو تقريبا رجالة الجبل
قلبوا العمدة ومسكوا هم العمودية.. بس لحد دلوقت مش عارف
إزاي الحكومة مخربتش الدنيا؟"

"يا عم (سعد) الحكاية مش كده.. أنت مشفتش الدشر؟.. دول مسكوا الحكم فى المحافظة كلها.. ده الموضوع كبير.. ده بيقولك أنا بقينا جمهورية لوحدنا.. وبلدنا الصغيرة دى بقت العاصمة.. كلام غريب قوى"

"يا عم بسطاوى أنت بتصدق؟.. ما أنا شوفت القناة الأولى وقلك كل ده إشاعات"

"يا عم أولى آيه بس؟ بقولك دا اللي حصل فعلا"

"وفكرك ده حاجة كويسة؟"

تنهد (بسطاوى) وقال:

"والله أى حاجة أحسن من الغلب اللي أحنا كنا فيه ده.. مين عارف؟.. نصبر.. يمكن الناس دى تكون نيتها خير".

"ويمكن جاين ينهاها"

ضحك (بسطاوى) وقال:

"أش يأخذ الريح من البلاط.. كله محصل بعضه يعنى أحنا كنا بناخذ آيه؟.. بس أحنا كلنا عارفين الحاج (محمد).. دا راجل أيده نظيفة.. ربنا بيركلوه".

يحك (سعد) رأسه غير فاهم.....

"طب كل كل".

القيادة الأمريكية

ينطق الصوت الحازم من بين أنفاس سحائره قائلا:

"عايز أكبر كم من المعلومات عن الموضوع ده..عن الناس دى وخلفياتهم السياسية والدينية..٢٤ ساعة..فهمنى؟"

يفرد مساعده هامته الطويلة وهو يجيب كالآلة:

"أمرك يا فندم"

سعل الرجل الكبير فى قبضته ثم أشار له قائلا فى جدية:

"نفذ..الموضع التالى"

(٥)

مكتب رئيس الوزراء....

اليوم الثاني للانقلاب.....

أغلق رئيس الوزراء هاتفه وعيناه تقتران بالإحباط.. ثم استدار
برأسه إلى وزير خارجيته الجالس أمامه.. هكذا مال عليه وزير
الخارجية وقال له في بطة:

"خير يا فندم"

"أنا مستاء جدا"

"ليه يا فندم؟"

"علشان دخان السيجار اللي عمانى دى يا (فتحى)"

انتبه وزير الخارجية فأطفأها محرجا.....

"بص يا (فتحى).. الموقف زى الزيت.. رئاسة الجمهورية عملت
اتصالاتها وكان رد الدول العظمى مابع ومش مريح"

"أزاي يا فندم؟"

"أمريكا بتقول إننا لازم نتروى قبل إتخاذ قرار عنيف من شأنه
الإضرار بسلامة المواطن.. كلام عام لا هو معانا ولا علينا".

تسأل وزير الخارجية في قلق:

"يعنى فعلا الناس دول ممكن يكونوا مزقوقين علينا من
بره..وتكون لعبة من أياهم"

دعك رئيس الوزراء عينيه فى عصبية وإتهاك:

"وارد جدا..الرد مش واضح..علشان كده الرئيس أمر بإرسال
وفد رفيع المستوى وعلى رأسه هتكون سيادتك".

رد الوزير مبتهجا:

"أخيرا الرئيس رضى عني..دا أنا عفنت من الجولات الأفريقية
بتاعت تدعيم العلاقات".

عض رئيس الوزراء شفتيه فى يأس..حذق فى وجه وزير الخارجية
للحظة ثم قال:

"يا سيدى هى مسألة رضا؟..هو مسفرك عقد عمل؟"

"خلاص يا فندم..دقايق وأكون جاهز"

تذكر رئيس الوزراء شيئا

"صحيح يا (فتحي)..أبقى خد معاك وزير الثقافة"

"ليه يا فندم إن شاء الله..ده لسه رايح أمريكا الأسبوع اللي
فات!!"

قالها فى غل فتنهد رئيس الوزراء وقال فى تودة:

"يا عم هى فسحة فى القناطر؟..أحنا عايزين وفد كبير ثم إن
وجود وزير الثقافة ده تمويه..روح يا حج جهز نفسك"

"مايجراش حاجة"

قالها ثم استدار منصرفا فتبعه رئيس الوزراء بنظره للحظات قبل أن يتناول هاتفه ويقول:

"أيوه يا بنى..وصلنى بوزير الداخلية"

ثوان ثم.....

"أيوه يا (فهيمى)..بص..أنا عايزك تجهز قواتك..استعداد فقط..أيوه استعداد لإحتمال التدخل بالقوة فى أى لحظة".

ثم أمسك سماعة الهاتف حتى ذابت بين أصابعه وصاح:

"يا (فهيمى) ملكش دعوة بوزير الدفاع..جهز نفسك أنت بس..نفذ"

مبنى المحافظة القديم.....

نفس اليوم صباحا.....

تترلق العربة الفارحة فى نعومة لتتهادى أمام السلم الرئيسى لمبنى المحافظة السابق..فى انتظارها عدد غير قليل من الموظفين فى حلال أنيقة وكذلك جمع من رجال الجبل..كان الجمع الأول ينتظر بياقات الورود وكذلك الجمع الآخر بالطلقات النارية.....

لحظات من الترقب الأبله والعيون كلها متعلقة بباب السيارة الأنيقة..ينفتح تدريجيا فتتسع العيون الخائفة وتتسابق الأعناق

مترقبة..ثم يظهر (جمضان) من خلفه ويتبعه (ضاحي) المتعثر في
جلبابه فتباين ردود الأفعال لكن أحدا لا ينطق..كان الأخير يقول:
"(زيد) ده من أخلص رجالتي..هو اللي كان مسيطر على المدينة
لحد ما نورقها".

سمع اسمه فاندفع (زيد) من وسط الجمع ليصافح (جمضان) في
حرارة..حرك الأخير رأسه وقال:

"تمام تمام..شد حيلك يا (زيد)"

"إن شاء الله يا ريس"

وما إن سحب (زيد) كفه حتى اندفع الموظفون القدامى لمصافحة
(جمضان) في نسق محدد..هكذا أستوقفهم الأخير بيديه ثم أشار لهم
قائلا:

"يا أخونا رايحين فين؟..أنسوا الأيام دي خلاص..أحنا مش
جايين نكبس عليكم ونعطل شغلكم..كل واحد في شغله وأحنا
اللي هنعدى عليكم واحد واحد".

هكذا نظر الجميع إلى (زيد) في قلق فأشار لهم مخرجاً
بالانصراف.....

"خف على الناس شوية يا (زيد)..مش عايزين نعمل زى اللي
سبقونا..أهم حاجة المعاملة الطيبة والمرونة".

ثم استدار إلى السيارة الفخمة قائلاً:

"وبخصوص عربيات المحافظة كلها تتباع وفلوسها كلها تروح على خزينة المحافظة..أشترروا مكائها عربيات عادية..وبالفصال..إحنا بلد فقيرة..إزاي الناس هتصدق ده وأنت ماشي بعربيات زى دى فى الشارع..خلاص..عهد اللى..الى..الى هو ده كان زمان ده خلاص انتهى".

هز الجميع رؤوسهم فى استحسان مبتذل ثم قال (زيد) وقد فرش أجنحة الطاعة:

"أمرك يا زعيم".

هكذا تبعثرت المتافات المتحمسة من كل مكان باسم (جمضان) فأشار لهم بكفيه أن لا..أشار إلى (زيد) كى يقودهم إلى أعمالهم فاستدار الأخير وأشار لهم فى غلظة..تحركت الجموع فى تأن وشعور بالخلاص يروى أرواحهم..من بين الجمع المنصرف يهمس أحدهم فى أذن زميله:

"شفّت الحركات القرعة..فاكرنا هناكل من الكلام ده..قليلة وشفناها كثير..هى بتندى كده بس وبعدين الشفط هيشغل..هو فاكركنا جداد ولا إيه؟".

ثم استدار فوجد (زيد) فى ظهره..هكذا خرس تماماً واكتفى بمراقبة (جمضان) وهو يسير متجهاً إلى مكتبه.....

دوار العمدة....

الحاج (محمد) على رأس المائدة التي تتوسط هو الدار..جالسا
وحوله وجوه الأشباح..(عمرو) و(أبو الليل) و (أبو هاشم) وقد ملأ
العرق أحاديذ تفاصيلها..كان شاحبا وهم يغطى وجهه كالوشاح
فلا ترى من ملامحه شيئا سوى القلق وكان متكئا على عصاه كمن
ينتظر الفرج.....

لحظات ثم قرر الحاج (محمد) أن يبعثر التراب ويتكلم:

"لازم يكون عندنا حلول واضحة الناس تحسها في ظرف اليومين
دول..المفروض أسمع اقتراحاتكم وأبلغها للرئيس النهاردة بالليل
علشان يتم تنفيذها من بكرة وإعلانها للناس..التلفزيون كمان لازم
يذيع".

"أحنا قدها..قدها..قداااا"

"يااااا (عمرو)"

قالت الحاج (محمد) في غيظ..لم يكن يحتاج المزيد من
التوتر.....

"الموضوع مش سهل..أحنا كنا نحب اللي يخطط لنا يكون ناس
دارسة وفاهمة لكن أدى الله وأدى حكمته..أدينا بنسد لحد ما ربنا
يفرجها..أحنا منقدرش نشق في حد غير فينا"

"على العموم يا حاج (محمد) أحنا مجهزين حبة أفكار تمام بس
نحب نتكلم فيها مع بعض ومع الرئيس الأول قبل ما نلفح بيها
الجمهور..النظام حلو بردوا".

"خلاص..على خيرة الله..أحب أسمع..الناس عشمها فينا كبير يا
أخونا"

هز (أبو هاشم) رأسه وقال:

"أكيد يا حاج..أنت بس متخفش وخليها على الله..أحنا قد
المستولية بردوه".

"على خيرة الله"

ثم رفع الحاج محمد رأسه كالديك وصاح:

"الشأى يا بهانة"

مطار واشنطن الدولى.....

الوفد الحكومى على المستوى يصل إلى أرض المطار....

الجو الملبد ينذر بالهطول..هكذا استغرق الاستقبال الرسمى دقائق
معدودة ثم استقل الجمع سيارات الموكب..كان وزير الخارجية
شديد التوتر وكانت العجلة تناسبه..لم تكن زيارة صداقة وود على
أى حال بل كانت - بوضوح - مهمة رسمية عاجلة..هكذا أدرك

المستقبلون للوفد لكن وجوههم الباردة لم تكشف شيئا مما يفهموه جيدا....

دقائق قليلة ثم تحرك الموكب.....

"ايه القرف ده يا أخى؟..من الدار للنار كده!!..على طول على البيت الأبيض..دا أحنأ لما بيجلنا ضيف بنفسحه ونعمل معاه أحلى واجب"

قالها وزير الثقافة فاستدار إليه وزير الخارجية غير مصدق..كانت نظراته تقطر غلا.....

"أنت عايز أيه يا أخى ما أنت كنت هنا من أسبوع..ثم أحنأ جايين نلعب؟"

"لأ..بس الزيارة لازم يكون فيها جانب ثقافى..أمال أنا جاي ليه؟"

ابتسم وزير الخارجية ابتسامة صفراء وقال:

"بلاش أقولك أنت جاي ليه..أتفرج من الشباك وأنت ساكت"

هكذا استدار وزير الثقافة إلى النافذة ولم يتكلم.....

دوار العمدة.....

كان الحماس الجارف يتدفق فى كل ركن بدار العمدة..فى البهو الكبير كان اجتماع الوزراء قد تجاوز الساعة..لم يكن اجتماعا كما

جرت العادة إذ غلبت عليه الحركة بأكثر مما سادته السكون.. الكل يهرول في كل اتجاه والهاتف في كف الحاج (محمد) لا يفارقه ما بين مفاوضات لخمصان أو لغيره بينما الأصوات العالية من حوله لا تنقطع.....

كان (عمرو أبو الليل) في ركن البهو أيضا.. كان وجهه أحمر كالدم وكان يصرخ في الهاتف:

"كلمت الاستديو.. استعجلهم على الشغل.. لازم في خلال ساعتين يبقى جاهز.. لحسن والله اضربه بالنار".

ثم أغلق الهاتف وانذفع إلى الغرفة المقبلة حتى كاد يصطدم بالحاج (محمد) وكان هذا الأخير يعلو نحو الباب.....

"يا (زكريا)..يا (زكريا)..أنت فين يا واد؟..جهز العربية".

ثم استدار إلى الخلف وصاح:

"يا عم (أبو هاشم).. فينك؟.. جهزت ورقك؟"

"جاهز يا حاج (محمد).. العربية جاهزة؟"

"الواد (زکریا) ییجهزها"

هكذا رفع الحاج (محمد) رأسه وصاح:

"يا (مليونين)"

كانت هي الأخرى في طرف البهو تطل برأسها من إحدى
الأبواب فأجفلت وهرعت إليه....

"أيوه يا سى (محمد)".

"يا (هانة)..كلمتى التلفزيون".

هكذا حدثت فيه في بلاهة.....

"التلفزيون؟..وأنا مالى؟..أنا (ثقافة)"

"جرى أيه يا (هانة)؟..يعنى هخلى وزير الداخلية يمسك
التلفزيون؟؟!..أه هى بتحصل أحيانا بس دلوقت أنا القائم بأعمال
الرئيس وبقولك تكلمى التلفزيون علشان تستعجليهم".

"ماشى يا أخويا..ومالوا"

ثم انصرفت مع المنصرفين..هنا تعالى صوت طلق نارى على
المدخل..التفتت العيون ثم ظهر ظل (أبو الليل).....

"مش ياله ولا أيه؟..أنا جاهز"

"جاهزين يا (أبو الليل)..أيه بس الداخلة دى؟"

"يعنى أنا كنت بأضرب نار من أيام ما كنت فى الجبل..مش
هضرب نار دلوقت وأنا وزير"

استدار الحاج (محمد) يخاطب الجمع ووجهه مزدحم بالأفكار:

"ياله يا جدعان..المؤتمر ده هيشوفه الرئيس فى التلفزيون"

قال (أبو هاشم) غير مصدق:
"الرئيس بنفسه!!"
حدق فيه الحاج محمد للحظة ثم قال:
"يا عم (أبو هاشم) الرئيس بتاعنا"
هز (أبو هاشم) رأسه في خيبة أمل.. كذلك فعلت (هانة) وهي
تغلق هاتف الدار وتميل على رأس زوجها قائلة:
"الرئيس بتاعنا؟.. بلا وكسة.. مش كنت أنت أولى"
رمقها الحاج (محمد) بنظرة غيظ ولم يرد....
"على العموم يقوللك في التلفزيون إنهم الساعة ٤ بالدقيقة
هيكونوا هنا علشان يغطوا المؤتمر".
رفع الحاج (محمد) سماعة هاتفه من جديد وقال في حماس:
"الو..أيوه يا ريس.."
مد (أبو هاشم) رقبته في لفظة غير مصدق فمط الحاج (محمد)
شفتيه مقهورا.. أدار للعجوز ظهره ثم استدرك:
"أيوه معاك.. الساعة أربعة ونص تفتح التلفزيون.. هتلاقى المؤتمر
متذاع.. تمام يا ريس"
ثم استدأر إلى (أبو الليل)....
"على بركة الله"

مكتب رئيس الوزراء.....

وزير الداخلية يتكلم فى حدة ورئيس الوزراء يستمع فى
تأمل.....

"أنا جهزت كل حاجة زى ما الأوامر صدرت..ومن غير
مساعدة....."

"وزير الدفاع..مفهوم"

"بالظبط..ومستعد أتحرك..بس أنا مش فاهم أمتى أتحرك..."

زفر رئيس الوزراء حمما من العناء وهو يجيب:

"تانى الموضوع ده..أمال أحنا بعتنا الوفد بتاعنا ليه؟..مش لازم
ندرس الموقف كويس..الموضوع مش لعبة..وممكن جدا يكون جر
رجل..لازم نرجع الأول للقوى العظمى ونحاول نستشف موقفهم
من الحادث ده آيه..دول ولاد أبالسة؟"

"وأيش عرفنا إنهم هيتكلموا معانا بصدق؟..مش ممكن يخدعونا
ويدونا الأمان"

"وممكن لأ..ممكن يقولوا ببساطة إنهم مع الحريات وإنهم بيدعموا
الناس دى..فيه مليون احتمال بس أحنا بنحاول نجمع كل
الملايسات علشان ناخذ القرار السليم..وتقارير المخابرات هتأكد
برضوه".

مال وزير الداخلية بجسده على المكتب وهو يقول في إصرار:
"الموضوع كله مش منطقي.. احنا عندنا جهاز مخبرات قوى
ومحترم.. ازاي هيحصل الاتصال ما بين الناس دى ودول أجنبية
للتخطيط لعمل انقلاب وكمان تنفيذه من غير ما نشم خبر"

"كل الاحتمالات واردة"

انفعل وزير الداخلية وقال:

"بس على الأقل نعمل حاجة.. نقطع النور أو الميه أو التلفونات"

"mmmmmmmmmm"

قَالَهَا الرَّجُلُ مَذْعُورًا.....

"كله إلا ده.. بلاش عبط.. دى هى دى الحجة اللي ممكن أى قوة عظمى تستغلها ضدنا.. والكلام هيكثر على الشعب المسكين اللي ملوش ذنب واللعب على نغمة الحصار والتجويع وشرحه .. فيه أيه؟"

قال وزير الداخلية ياسا:

"طیب و بعدین؟.. الناس هتقول علینا ایہ؟.. ہوا؟.. مفیش ای رد فعل.. مفیش حزم؟"

رد رئيس الوزراء في غيظ:

"الظبط كده.. لما الناس تسألك قولهم مفيش!!!! بص يا سيدى
آخر الكلام هنتظر عودة الوفد إن شاء الله بالسلامة وعلى أساس
تقريرهم هنقرر ونتحرك.. إبدأ التحفيز والتعبئة من دلوقت.. عايزك
خلال ساعتين تكون مستعد وعلى الإشارة"

أطلق الوزير ألسنة من الهواء في أنفاسه وهو يقول:

"وأمتى يحصل الكلام ده؟"

"مسألة ساعات"

ثم نظر إلى ساعته....

"الصبر".

القيادة الأمريكية

يتحدث الصوت الحازم من بين أنفاس سحائره قائلاً:

"المعلومات دى موثوق فيها؟"

يفرد مساعده هامته الطويلة وهو يجيب:

"كلها..الناس اللي قاموا بالإنقلاب ملهوش أى خلفيات
سياسية أو دينية ومش على اتصال بأى جهة أجنبية..باختصار
السكة ليهم مفتوحة".

تراجع الرجل بظهره مرتاحاً وشبك كفيه قائلاً:

"ناس بمائين صحيح..معقولة فيه ناس بالتهور ده فى بلد زى
دى!!..تهورهم ده وفر علينا سنين شغل وأدانا فرصة العمر"

ثم سعل فى قبضته وأشار له قائلاً فى جدية:

"ممتاز..الموضع التالى"

(٦)

الساحة الشعبية في قلب القرية.....

الساعة الرابعة والنصف عصرا.....

الحاج (محمد) بقامته المهيبة وسط جماعة الوزراء أعلى المنصة.. كان المشهد شديد الشبه بسرايق حملات الانتخاب.. الأعداد الغفيرة تملأ الكراسي الخشبية وحشود أخرى من البشر تفتش الثرى.. وهناك أعداد من الصحفيين تتوزع بين أركان السرايق كيفما اتفق.. وبينما يتصاعد صوت اللغط في كل أركان المكان الممتلئ بلحوم البشر وقف الرجل المهيبة يناشد الناس أن يتكلم وكلنا قبضتيه على مكبر الصوت....

"هدوء.. يا رجاله هدوء من فضلكم".

هكذا هم (أبو الليل) برفع سلاحه حين أمسك (أبو هاشم) كفه في اللحظة الأخيرة وهمس في إذنه مذعورا:

"تعمل ايه؟.. أنت ناسي كلام الرئيس؟.. مفيش أسلحة.. ده المؤمر متصور..".

"أنا مكتتش هموت.. أنا كنت هصيب بس!!".

"هدوء.. هددووووووووو"

هكذا كرر الحاج (محمد) فبدأت الأصوات الهوجاء في الانحسار تدريجيا.. وتكلم هو:

"كل سنة وأنتوا طيبين يا رجالة"

"وأنت طيب يا حاج (محمد)"

"ربنا يخليك يا حاج (محمد)"

"وأنت بألف صحة يا حاج"

"يا رب يباركلك"

"والله أنت راجل فل".

"يا حاج محمد..والله أنت تستاهل كل خير".

هكذا أدرك الرجل - مرتبكا - أنه قد فقد السيطرة من جديد..كانت شعبية الرجل جارفة....

"هدووووووووو"

هكذا انسحبت الأصوات مجددا..انتظر لحظة ثم عاود الحديث...

"يا رجالة..أنا هنا بالنيابة عن الرئيس (جمضان) واللى كلفنى أنا وكل الوزرا إننا نبذل أقصى جهدنا علشان نحقق احتياجات أهل بلدنا اللي ياما استحملوا..الناس اللي ياما أهملشت واتنس..ولأننا منكم قررنا إن كلمنا معاكم يكون من غير حواجز..مش عن طريق التلفزيون والجرايد..علشان كده اخترنا المؤتمرات الشعبية..كده الأمور تكون واضحة للكل..أحنا معندناش حاجة نخبيها".

ثم استدرك قبل أن تتعالى أصوات التهليل الأعمى:

"ومن غير ما طول عليكم أحب أعرض باختصار الخطة المبدئية لتطوير البلد...يا ريت تركزوا معايا شوية".

أشرأبت الأعناق كدليل واضح على التركيز....

"بصفتي وزير الزراعة هتكلم معاكم عن الجزء اللي يخصني وهدي الفرصة لأخوانكم الوزرا لعرض أفكارهم عليكم"

"بخصوص الزراعة..أحنا في الأساس بلد زراعي..ولازم نعتز بده..أجدادنا علمونا كده..وعلشان كده جميع الأراضي اللي وقعت تحت أيدينا من أملاك العمدة ورجالته هينم توزيعها بالعدل بين أصحاب العائلات بحيث تكون الأراضي ملك ليهم ويتم تقسيم ربح المحصول آخر العام بحيث تحصل الحكومة على الربع..ولو حب حد إنه يخلي الربح كله له يبقى يشتري الأرض من الحكومة بنص الثمن ويبقى ربحها كله حلال عليه ولو عايز يتنازل عن الأرض لينا يبقى هندفع له نص تمناها برضوه حلال عليه".

"بخصوص الأراضي الصحراوية اللي حولين الأراضي الزراعية فتقسم على دائرتين..دايرة قرية ودايرة أبعد..الدائرة الأولى هتعرض عليكم تملكوها ببلاش والربح هيتقسم بنفس الطريقة أما الدائرة الثانية فالربح هيروح بالكامل لصاحب الأرض"

"في النهاية هيكون توزيع الأراضي على خريجي كلية الزراعة بالبحان لتشجيعهم والاستفادة منهم..مش معقول هيعدوا على قهوة

في بلد كلها طين..توزيع الأراضي سيكون تحت إشرافي أنا شخصيا
لمنع التلاعب..ومن أولها كده مفيش زعل..مفيش حاجة أسمها
حبيبي يا حج محمد..وأنا أخوك يا حاج محمد..الحق حق قدام
ربنا..دى أمانة..شكرا يا رجالة".

هكذا تراجعت الأعناق وتعالى التهافتات المتحمسة بين جنات
السراى فجلس الحاج محمد وقد أعياه الحماس..ثم قام (أبو الليل)
فخرس الجميع....

"سلام عليكم..يا رجالة أنا حاليا وزير الخارجية فمتخفوش".
تصاعدت الهمسات والأصوات المستريحة..هكذا عبث (أبو
الليل) وأستدرك:

"دلوقت (الغريب) عمنا هو اللي ماسك الداخلية"

هكذا خرس الجميع مجددا....

"بالنسبة ليا أنا بوعدكم إني هلف العالم وهخلي العالم كله
يزورنا..كل يوم خواجه شكل..هخلي علاقاتنا بكل الدول زى
الفل..وأكيد هنعرف نعمل مع الناس دى شغل كويس وهنسفركم
كلكم تعملولكم قرشين".

"وأحنا مش محتاجين سفارات..أحنا بلد كرم..وأى سفير
هيجلنا هياخد واجبه وهيضاف كل يوم فى بيت شكل..وأول ليلة
هتكون عندى..وعلشان...."

هنا تعالى رنين هاتفه المحمول ليقاطع كلماته.. كان
(جهمان).....

لم يفهم لكن الحاج (محمد) أشار له عرجا أن أجلس.. ثم تناول
منه (الميكروفون) قبل أن يفهم وتحدث ململما الموقف:

"عظيم جدا يا سلام.. يا سلام شكرا جدا يا (أبو الليل).. (أبو
الليل) طبعاً بيدى الفرصة لأبنة (عمرو) إنه يتكلم علشان
يعرض...."

لكنه كذلك لم يكمل.. ذلك لأن (عمرو) ما إن سمع اسمه حتى
انتفض واقفا...

"أيوه أيوه.. طبعاً يدينى الفرصة.. ميدنيش الفرصة ليه.. مش
أبويا؟.. أيوه أبويا.. طبعاً يدينى الفرصة.. دا أبويا يا ناس.. أبوييسا"

ربت الحاج محمد على كتفه مهدئا فأبتلع ريقه وأردف:

"الإنتاج والصناعة فى بلدنا هتطور.. أنتوا الطاقة يا رجالة وإنتوا
اللى هتتحركوا العجلة.. من بكرة الصبح هنمر على بيوتك بيت
بيت.. هنعرف منكم أنتوا بتعرفوا تشتغلوا أيه.. ولادكم يعرفوا
يعملوا أيه؟.. لو عندكم مشاريع صغيرة هنبقى شركاء
معاكم.. هنمول المشاريع دى علشان تبقى مشاريع كبيرة
ومصانع.. مفيش حاجة مهما كانت صغيرة غير وهنتم بيها.. لأن
المصلحة واحدة.. مصلحتكم ومصلحة البلد.."

"أما أى منتج مش بتتصنع جوا بلدنا فمممكن تجيويه من برا..من غير جمارك..أى حاجة مش بتتصنع هنا معلهاش جمارك..يعنى مش هتخبوا الفيديو فى الهدوم تانى..وعيش وسينى أعيش"

هكذا تعالت المهممات الراضية..كان للكلام عن الفيديو وقع السحر على أنفسهم....

"وشكرا"

ثم جلس (عمرو) منتشيا ومن خلفه نهض (أبو هاشم)..كان الحاج (محمد) قد لكره فانتفض..هكذا قام وهو يسعل وتمنى الجميع ألا يضعف ذلك الهزال من قوة كلماته:

"السلام عليكم"

"ألف سلامة يا حاج"

"الله يسلمكم..النهاردة أنا وزير الصحة يا رجالة..وأنا أكثر واحد فيكى يا بلد لف ودار على مستشفيات..من النهاردة هلف على المستشفيات من جديد علشان أمشى اللى فيها على العجين..دكاترة الجامعة مش هيفتحوا عيادات..هيقعدوا ليل نهار فى المستشفيات يشوفوا الغلابة وإلا يسيبوها..ياده ياده بلاش أفترى..المستشفيات الخاصة هيترفع من عليها الضرايب ، كل مستشفى ملزومة بفتح قسم مجانى وإحنا كوزارة صحة اللى هنتولى الإشراف عليه وندعمه..كده يبقى كأن الضرايب وصلت للناس مباشرة".

"تكلفة الكشف في العيادة ستكون عليها رقابة صارمة.. وبرضوه
الأدوية.. وأحنا بنوعدكم إننا نلتزم بكل الوعود دى حرفيا".
"وحسبى الله ونعم الوكيل"

ثم سقط على كرسیه من فرط الإعياء.. هكذا استعادت الجماهير
حماس الأيام الخوالى وبدأت الحناجر تتصاعد بما توارثته من قاموس
التهافتات (الانتخابية) تحية للوزراء.. أرادت (هانة) أن تأخذ دورها
وأن يخرج صوتهما من بين الحناجر الصارخة فلم تستطع.. لاحظ
الحاج (محمد) فأشار بطرف خفى لـ (أبو الليل) لينهض الأخير في
بطء فيتلع الناس ألسنتهم في ثوان ويسود الصمت المدعور.. عاد
للجلوس مجددا وقد ترك البساط الصامت لـ (هانة) كي
تحدث.. هكذا استطاعت أن تقف للحظة وكانت مرتبكة....
"وأنا.. وأنا هافتح مكتبة"

أشار لها الحاج (محمد) بالجلوس في حزم وقال:

"شكرا لكل الوزراء اللى أتكلّموا وشكرا للشعب العظيم اللى
حضر.. شكرا ليكم.. وأحنا مش أكبر منكم يا رجاله.. أحنا هنا
علشان نخدمكم.. وعلشان نخدمكم لازم نكون دائما محترمين في
نظركم وإلا يبقى أحنا بنفتري وبنأمر وننهى فيكم بالفتوانة.. وهو
ده الفرق بينا وبين اللى قبلنا.. علشان كده قررنا إننا نجتمع بكم كل
أسبوع.. علشان نسمعكم وتسمعونا ولو في غلط نتحاسب.. أحنا
مقيش على روسنا بطحة.. وعلى فكرة ده مش كلامي.. ده كلام
سيادة الرئيس"

انكمش الكل في ذعر وساد الصمت كالقيمة.. لم يفهم الحاج
(محمد) لكنه استدار إلى يمينه فوجد (أبو هاشم) يحدق فيه مرتعدا
فاستدرك:

"الرئيس (جمضان) يا أخونا"

تنفس الناس من جديد في حين قال هو:

"انتهت الجلسة..أى أسئلة"

هكذا عاد المتفادات الحارقة من جديد.....

مبنى المحافظة السابق.....

مكتب المحافظ.....

تناول (جمضان) هاتفه في رضا..كان جالسا خلف مكتبه
الضخم وقد ارتدى حلة سمراء غير مقنعة..التلفاز في مواجهته بينما
يحدثه الحاج (محمد) وقد بدا صوته متحمسا.....

"أيوه يا حاج (محمد)..شغل كويس..المهم عندي رد فعل
ال جماهير..وتكونوا سبتوا الناس تسأل وتستفسر بعد المؤتمر..ده مهم
جدا"

صمت لبرهة..ثم.....

"عظيم جدا..أكثر من ممتاز..أهم نقطة ملخص المؤتمر يتزل بكرة
في الحزال..مش عايزين قوانين من اللى محدش يفهمها

دى..القانون اللى مش بيتفهّم يبقى قانون مايع ممكن يتلعب فيه..المشاريع تشتغل فورا..الناس لازم تتأكد إنه مش كلام ويس..مفهوم؟..وصوروا الناس فى التلفزيون بمناسبة ومن غير مناسبة..الناس بتحب ده".

صمت آخر ثم....

"تسلم يا حاج (محمد)..تمام جدا..بص يا حاج..بعد ثلاث أيام بالظبط وبعد ما الناس تشوف بنفسها إن وعودنا دى بتنفذ إنك تعلن إن كل المزايا الجديدة دى هتطبق بس على المتعلمين..وأفتح مراكز لنحو الأمية بعد الظهر فى المدارس تشرف عليه بنفسك..وتجبلهم أحسن مدرسين".

صمت مرة أخرى..وهذه المرة فكر كثيرا...

"مش بيلاش..خليه برسوم..رمزية علشان توفر دخل للمراكز".

كان الهاتف على أذنه حين سمع طرقات منتظمة على الباب..لحظات ثم ظهر (ضاحى) بجسده الضخم وجلبابه الفاتح..هكذا أشار له (جمضان) بيده أن أدخل فتقدم (ضاحى) وما زال (جمضان) يستمع إلى الحاج (محمد) مصغيا..مال (ضاحى) يجزعه ثم وضع ورقة أمام بصر (جمضان) وهمس:

"السكرتير بيقول إن الجواب ده لسه جاي على الجهاز اللى اسمه...."

"الفاكس؟"

"تمام جنابك بسم الله ما شاء الله..ريس بصحيح".

ألقى (جمضان) نظرة خاطفة على محتوى الورقة ثم انتفض..هكذا تحدث مسرعا:

"خلاص يا حاج (محمد) نفذ وأنا هتابع معاك..أعمل حسابك أني هتأخر هنا شوية علشان أطبط الدنيا ..البلد أمانة في رقبته..تسلم يا حاج..سلام عليكم"

ثم أغلق هاتفه في حين تكلم (ضاحي) حيث وجد المساحة وقال:

"كله تمام يا ريس؟..الموضوع ثقیل ربنا يقويك"

تناول (جمضان) الورقة في اهتمام وأجاب دون أن يلقي عينه على رجله:

"ربنا يبارك في الحاج (محمد)..راجل ممتاز وفعلا خايف على مصلحة الناس..ربنا يخلي نيتنا دائما لوجه الله"

كانت عيناه تقرأن الفاكس كمن يجري خلف حبيته..ارتجف وقد قرأ ما قرأ ثم التفت إلى (ضاحي) والذي لم يفهم شيئا من الورقة أو من تعبير وجه (جمضان)..أكتفى بالصمت الأحق حتى استدار (جمضان) وكان الحماس يسيل من عينيه.....

"(ضاحي)..عايز أعمل اجتماع مع نخبة من أساتذة الجامعة
هنا..ياريت يكونوا حوالى عشرين ومن كل الكليات..وجهنلى
ندوة فى الجامعة بعد بكرة"

صمت الرجل لوهلة كمن يزن المعنى فى عقله..يسقط فيلتقطه
من جديد.....

"أساتذة جامعة؟"

"هتفهم كل حاجة يا عم (ضاحي)..كله فى وقته..شد حيلك
بس ونفذ"

هز الرجل رأسه فى عدم اقتناع..حيرة..ثم بعض القلق..لكنه فى
النهاية أجاب:

"ماشى يا ريس"

أعطاه (جمضان) ابتسامة اعتزاز..هكذا هدأت نفس الرجل
ودار..ظل (جمضان) يتابعه بنظره كأنما ما بداخله من ضجر
وضيق..ومع صوت الباب المكتوم وجد نفسه يعيد قراءة ما رأى
وفى روحه شعور عارم بالحماس والثقة..كان هذا يفوق توقعاته..فى
هذه اللحظة على الأقل.....

حينها أجرى اتصالا جديدا بالحاج (محمد)....

"أيوه يا حاج (محمد)..أسمع اللي هأقولهولك وأفهمه كويس بس
متوصلش الكلام لحد من الناس..ده هيبقى وسط مجلسنا بس.."

"وصلنى فاكس دلوقت..من السفارة الأمريكية..الرسالة باختصار إنهم سعداء بالمؤتمر اللى تم عقده دلوقت واللى أكد لهم إننا بنسعى لإنشاء مجتمع متعاون وتحقيق تجربة ديمقراطية ناجحة فى إحدى دول العالم الثالث..وإنهم بالتالى بيحبوا يدوا لينا الفرصة الكاملة لإثبات إخلاصنا فى رغبتنا رفع الظلم عن كاهل أبناء الشعب..يعنى إحنا دلوقت لينا ظهر ولحد ما نقف على رجلينا".

فهم (جمضان) من رد الحاج (محمد) أنه لم يعنى أهمية ما قال بالقدر الذى تمنى لكنه لم يعقب..فقط قال:

"بص يا حاج (محمد)..هكلمك كمان شوية..بس زى ما فهمتك..مفيش حاجة تخرج بره..خاصة للناس..أنت عارف أنا بثق فيك و بحبك قد أیه يا حاج (محمد)".

صمت ثم.....

"ربنا بيركلى فيك يا حاج (محمد)..مع السلامة"

أغلق الهاتف..لحظات وكان (ضاحى) قد عاد إلى المكتب وكان ثابتا....

"كله تمام يا ريس..كلمنا رئيس الجامعة وهو جاي بنفسه ومعه الوفد فى خلال نص ساعة".

صمت (جمضان) لوهلة يفكر..فكر كثيرا حتى شعر (ضاحى) بالخدر فى ساقیه..ثم استدار إليه أخيرا وقال فى بطء:

"فيه مهمة لو عرفت تنفذها يا (ضاحى) مش هخلى نفسك فى حاجة طول ما أنت معايا"
"رقبى"

"أنا عايزك تجهز رجلك..عايزك تنقى أذكاهم وأصغرهم ويا ريت يكونوا لقوا وداروا وعارفين البلد دى كويس..رجلك دول هيكونوا معايا دائما..هيكونوا عيونا اللى بنشوف بيها وهيكون دائما وسط الناس وشبه الناس..عايزهم فى المحافظة هنا وكمان فى بلدنا وفى كل بلد..وأول مهمة هكلفهم بيها هى إنهم يدبوا دوب جوه الجامعة..حبة منهم طلبة..حبة موظفين..حبة عمال..أى حاجة..فى النهاية عايزهم فى أسرع وقت يرجعولى بالتقارير.."
"تقارير؟"

"عايز أعرف أيه اللى بيحصل فى الجامعة؟..الشباب يفكر فى أيه؟..عايز أعرف مين من أساتذة الجامعة محل ثقة وفعلًا نظيف ويمكن يعتمد عليه..مش مهم سنه ومنصبه..عايز أعرف مين أصحاب السمعة الطيبة ومين بيجرى ورا السلطة والفلوس..وخاصة اللى ماسكين مناصب حاليا..وعايز ده فى أسرع وقت"
فكر (ضاحى) لبرهة..كان تائها لكنه حسم أمره وقال:
"تمام يا ريس"

صمت (جمشان) من جديد وفكر..نظر ل(ضاحى) من جديد
ثم واصل التفكير.....

فندق كبير بالعاصمة الأمريكية....

من داخل جناح راق بالفندق....

وزير خارجية البلد الرئيس وقد أمسك هاتفه وراح يتكلم.. كان
منفعلا وجسده يدور في المكان بلا انقطاع.....

"يا سيادة رئيس الوزراء زى ما بقولك كده.. الناس دى بتلعب
بيننا.. أنا كنت متصور إن الكلام معاهم مسألة شكلية مش
أكثر.. آخر حاجة كنت أتصورها إنى أسمع الكلام العالم ده.. دول
قعدوا يقولوا إنهم لسه مكنوش فكرة كافية عن الانقلاب ده
والقائمين عليه.. وإنه من التسرع عمل أى شئ فى الوقت
الحالى.. وكمان نصحونا بضرورة التروى قبل اتخاذ أى خطوة ممكن
تودى بحياة أبرياء"

لحظات استماع ثم...

"زى ما بقولك كده يا فندم.. الموضوع خطير.. واضح إنهم مش
فى ضهرنا.. ويمكن كمان ضدنا.. الأخطر والأقرب للعقل إنهم
يكونوا ورا الجماعة دول"

صمت ثم...

"بالظبط يا فندم.. أنا الموضوع من الأول مش داخل
دماغى.. معقولة شوية فلاحين جهلة هيخططوا وينفذوا كل
ده.. لازم يكون وراهم أبالسة.. واضح إنهم قرروا يقلبوا علينا يا
فندم"

صمت مجدد ثم...

"أنا شايف برضوا إن رئيس الجمهورية لازم يتحط في الصورة فوراً.. أنا هستنى مكالمة سيادتك ومش هرجع غير..."

"خلاص يا فندم هأرجع فوراً على أول طيارة"

سؤال ثم...

"وزير الثقافة؟؟؟"

صمت طويل ثم...

"بيشتري شوية حاجات للأولاد سيدتك.. هرن عليه وهنرجع فوراً يا فندم"

برهة ثم...

"تمام يا فندم".

هكذا أنهى الوزير اتصاله المقتضب.. وظل يحرق لدقائق في هاتفه وكأنما نسي كل شيء.. ابتلع ريقه وعاد للواقع.. هكذا رفع هاتفه من جديد وأجرى اتصالاً آخر.....

كان متوتراً حتى أنه قد أخطأ الاتصال عدة مرات

(٧)

الإعلام اليوم

جريدة الإجرام وهى جريدة حكومية:

"تراجع أحداث الشغب فى شولاط..التدخل الأمنى الحازم يعيد الهدوء إلى القرية والقبض على عشرين مواطن من مثيرى الشغب"

جريدة ضيق البلعوم وهى جريدة معارضة:

"الانقلاب السافر يدخل يومه الرابع ومازال الصمت الأمنى للعجيب يثير علامات الإستفهام..وفد رفيع المستوى يغادر إلى الولايات المتحدة وسط تساؤلات عن حيثيات هذه الزيارة فى هذا التوقيت تحديداً"

جريدة صوت شولاط وهى جريدة جديدة حلت محل الجريدة المحلية السابقة:

"أبطال من الجنوب..عودة الحرية والكرامة.. الجماهير فى الشوارع ما زالت ترقص وتغنى ابتهاجا بيوم الاستقلال".

قناة البحيرة:

عدل المقدم رباط عنقه ثم استدار بكرسيه تجاه الشاشة الأولى وقال:

"أستاذ مصطفى العضو النشط بالحزب الحاكم..رجاء ما هو ردك على ما أثير بخصوص الصمت الأمنى تجاه الانقلاب الحادث فى

جنوب البلاد وعدم القدرة على السيطرة عليه حتى الآن...وبخصوص
زيارة الولايات المتحدة في هذا التوقيت بالذات؟..هل هو نوع من
الاستئذان قبل القيام بأية تحركات عسكرية؟"

ثم يظهر وجه نحيف على الشاشة..يميل لكنه لا يستطيع أن يتلع
الكتر ويقول في بطة:

"ده كلام غريب جدا جدا الحقيقة..أنا شايف إن القصة كلها
من نسج خيال بعض الإعلاميين اللي كبروا قصة الجماعة دي..دي
مجرد أعمال شغب محدودة في إحدى القرى لكنهم عملوا منها فيلم
محدث الحقيقة ممكن يصلقه..والمواطن عندنا من الذكاء بحيث إنه
يعرف يميز الحق من الباطل..أما الزيارة فدى زيارة عادية جدا
وكان مقرر لها تتم منذ أكثر من سنة ونص وده من أجل بحث
سبل....."

"حسنا..حسنا"

ثم يدور ويتحدث إلى الشاشة الثانية:

"أستاذ عيسى..بصفة حضرتك من قادة حزب (بكرة حد لذيذ)
المعارض..تعليقك على أحداث (شولأط)؟"
"مين عيسى ده كمان!!!!!"

كان هذا صوت الشاشة الأولى ثم تم قطع الصوت..هكذا تكلم
الصوت من الشاشة الثانية وكان غاضبا:

"اعتقد إنه ما زلت الحكومة بتحاول تكسب وقت من خلال اللجوء لتصريحات بعيدة جدا عن الواقع..العالم كله عارف حقيقة اللي بيحصل فى شؤلاط والحقيقة إن وضع رى ده عادة ما ينتهى باستقالة الوزارة..لكن طبعا مش عندنا حيث الوزير لا يستقيل ولكن فقط يقال..نحن نعاني يا سادة من نقص حاد فى الشفافية..الشفافــــــــــــة"

ثم سكت فتنحنح المقدم وقال:

"أستاذ عيسى.. القضية كبيرة.. ألا يوجد عنك تعليق إضافي؟"
 "آه.. آه نعم نعم.. أكيد فيه كلام كثير.. نحن نرفض.. نرفض أى نوع من.. من التعقيم.. الشفافية.. الشفافية!!!!!! افية"

القرية.....

استند (بسطاوى) على جزع الشجرة فى اهاك وقد غطى العرق تفاصيل روحه.. بجواره جلس (سعد) ومعه مندبل الطعام الضخم.. هز (بسطاوى) رأسه ثم أشار لزميله أن يفتح كيس الطعام.. فعلها زميله من ثم مد الأول يده فى هم وهن وراح يتكلم من بين أشلاء الطعام قائلا:

"كلام عجيب اللى أتقال أمبارح يا (سعد) يا أخويا"

"والله يا (بسطاوی) أنا متفائل..أنت عارف الحاج
(محمد)..راجل من ضرر راجل..وعینه ملیانه..وده یخلینی ماحفش

حتى لو حوله رجاله الجبل..مش هيكون بردك أسخم من العمدة
ورجالته"

"فكرك يا (سعد) إنهم فعلا هيعملوا اللي وعدوا بيه ده"
"طبعا يا (بسطاوى)..أنت مشفتش الحاجات اللي اتعملت على
مدخل البلد..دول شغالين فى مكاتب توزيع الأراضى دلوقت..مش
بس كده..دول يقولوا هيعدوا على البيوت كمان".
حدق فيه بسطاوى..

"بالسرعة دى؟"

"دول يقولوا على آخر الشهر هيكونوا وزعوا الأراضى..كفاية
إن الصوان ده هيتعمل كل أسبوع علشان يبقى فيه مراجعة وعلى
عينك يا تاجر"

"كلام جميل والله"

أكمل سعد وقد أخذه الحماس:

"دول عملوا صناديق جزاز للشكاوى والتظلمات فى كل حارة
ويقولوا إننا هتوصل لهم شخصيا كل أسبوع وهيترد على أصحابها
عن طريق التلفزيون والجوابات.

تنهد (بسطاوى) وقال:

"والله الواحد يخاف يصدق"

"منصدق يا سيدى..هنخسر ايه يعنى؟"

ضحك (بسطاوى) وقال:

"على قولك..ولو مصدقناش هنعمل ايه يعنى؟"

ثم فرد ذراعيه فى كل اتجاه واستدرك:

"بيننا على الغيط ياض قبل النهار ما يعدى"

(٨)

مقر دوار العمدة.....

الحاج (محمد) يغلق هاتفه ثم يشرّد للحظة.. كان حائرا حتى أنه قد سار كالمخدر حتى أستلقى على أريكته وعقله مازال يفوص في محيط ما قاله له (جمضان).. كان - كعادته منذ أيام الجبل - يثق بعقله الصغير الحاذق وعلمه بشئون الدنيا مما أكد يقينه بأهمية ما أخبره به منذ اللحظات.. لكنه من حين لآخر كان يسترجع ما تعلمه من ألعيب السياسة التي طالما كان (جمضان) يتحاكى بها في جلساتهم بالجبل.. وكانت هذه المساندة الغربية تقلقه.. فهمه للحياة هو أيضا علمه ألا شيء بلا ثمن.. لكن - كذلك - اعترف لنفسه أنه رضا (جمضان) بهذا الأمر قد جعله مطمئنا.....

"يا حاج (محمد)"

يستدير وقد فاق من بحر أفكاره لتجف من عليه قطرات حيرته وقد رأى خفير الدار يناديه.. كان شابا عديم الحيلة وكان يمت له ولزوجته بصلة قرابة بعيدة.. هكذا جعل منه خفيرا للدوار عل هذا يحميه يوما من نوبات الزمن واستخفاف الناس.. قال الخفير:

"كله بقى تمام"

"جهزتوا المكاتب والناس اللي هتلف على البيوت؟"

"تمام جنابك"

"عايزهم يبدأوا من بكرة الصبح..وعايز الكلام ده يتصور
ويتذاع على التلفزيون..عايزين الناس تفرح..وصناديق
الشكاوى..الإعلان بتاعها يطلع كل ربع ساعة..مفهوم؟"

"تمام يا حاج"

"وجهزلى العربية دلوقت"

"خير يا حاج؟"

فرض الحاج (محمد) وقال:

"هلف على البلد كلها..عايز أتكلم مع الناس بنفسى..لازم
الناس يحسوا إننا قرييين منهم وإن الكلام بجد"

"يا حاج (محمد) الناس كلها عرفاك كويس وبتحبك..دا أنت
منهم وعليهم"

"وأيه يعنى؟..ما (زيد) بتاع مجلس الشعب كان من هنا برضوا"

ثم دار إلى غرفته وقال:

"جهز العربية يا بنى الله يرضى عليك..ولا أقولك..أنا هتمشى
أحسن"

مكتب رئيس مجلس الوزراء....

رئيس مجلس الوزراء جالسا خلف مكتبه..يحدق فى وجه وزير
خارجيته ويده المرتعشة ترتشف من الماء لتبل شففيه الجافتين

بقطرات باردة.. كان الأخير متوترا بدوره وقد راحت أصابعه المكتزة تنقر على طرف المكتب في إلحاح.. قال في قلق:

"زى ما بقولك يا فندم.. الإجابات كلها كانت متحفظة.. وتحمل كل المعاني.. لكن الأكيد إن أمريكا كالعادة مش بعيدة عن الصورة.. يعنى إما إنها مع الناس دى أو على الأقل مدياهم الضوء الأخضر"

جفف رئيس الوزراء عرقه ثم قال بكل ما استطاع أن يجمعه من حزم:

"أرفع تقريرى للرئيس على أسس كده؟"

"أكيد يا أفندم.. والأيام هتبت لحضرتك إن الأمريكان ورا اللعبة ده.. حاجة زى قصة أفغانستان.. علشان كده أن أحب إن حضرتك تحظر سيادة ال..."

"مفهوم يا سيادة الوزير.. مفهوم.. متشكر.. ممكن تفضل"

قاطع رئيس الوزراء في جفاء.. كان ذائبا في التفكير.. هكذا نهض الوزير وأغلق سترته....
"العفو يا فندم".

ثم استدار منصرفا بينما رفع رئيس الوزراء سماعة هاتفه وقال:

"هاتلى يا بنى وزير ال.. هو كان الدفاع ولا الداخلية؟.. هاتلى اللى كان يجهز للهجوم"

كان يتكلم.. كذلك كان وزير الخارجية.. كان قد بلغ سيارته في لحظات وكان هاتفه في يده.. كان يقول في توتر:

**Yes sir, they have received your
'message**

صباح اليوم التالى.....

مبنى المحافظة القديم.....

نظر (جمضان) إلى المرأة طويلا يتأمل مظهره الجديد وكان (ضاحي) بجواره.. كان واقفا في حلة تكاد تنفجر تحت دفع جسده الضخم وقد حذق في (جمضان) الذى تغير شكله بشدة في حلته الفاخرة.. هكذا قال (جمضان):

"آيه الأخبار يا (ضاحي)؟"

"كله تمام يا باشا.. الدكاترة موجودين في القاعة.. وبقاهم ساعة

منتظرين"

"وأخبار الرجال بتوعك؟"

"جهّزت مجموعة كويسة من رجالتي من اللي خلطوا كثير مع أهل المدينة ويعرفوا يلبسوا ويتكلموا زيهم بالظبط.. دول من بكرة هيكونوا جوا الجامعة.. منهم اللي هينفع طلبة واللى هينفع عمال وخلافه.. دول هينقلولونا دبة النملة جوا الجامعة.. وكمان فيه طقم جديد بجهزه علشان يتوزع جوا البلد ويودى دوره".

"أهم حاجة عندى الجامعة يا (ضاحى)..الخطورة كلها بتيجي من هناك..من الدكاترة والطلبة وحتى العمال..فاهم يا (ضاحى)؟"
"فاهم يا باشا"

عاد (جمضان) إلى آخر نظرة فى المرأة..ثم قال:
"أكلنا على الله يا (ضاحى)".

"بعد إذنك يا باشا"
أستوقفه فتوقف..

"خير يا (ضاحى)"

"أنا من رأى إنك تخش عليهم ومعاك اتنين ثلاثة من رجالتي..كحراسة يعنى..دول عمليين زى البغال والسلاح اللي فى أديهم هيدى لحضرتك هية برضوه"
ابتسم (جمضان) وقال:

"مظبوط يا (ضاحى)..بس مش دلوقت..أنا محتاج للناس دى..والبلد دى كمان محتاجهم..واللى هينخليهم فى أيدي مش خوفهم منى..لكن رفضهم للأوضاع السابقة..هو ده سلاحى لعقولهم"

لم يبدو على (ضاحى) أنه قد فهم شيئاً..فاستدرك (جمضان):
"ثم إن التلفزيون هيصور .. مش هيكون منظر يعنى"

هكذا أفسح له (ضاحي) وتركه يتقدم في ثقة نحو الباب..يفتحه..يتقدم خطوة نحو القاعة الفسيحة..هل كان متوترا..لا أحد يدري لكنه لو كان كذلك فقد أجاد إخفاء ما بداخل روحه..الأضواء المبهرة والقاعة الفسيحة الفخمة التي لا تتماشى مع فقر الوطن..ثم هؤلاء الذين يملأون القاعة..فكر لحظة..نظر إلى الوجوه..كانوا ينهضون في بطء حريص..أعينهم تفكر في صمت وكأنهم يقولون من أنت؟..هي نظرة الخوف من المجهول..مما تخفيه هذه الأعين وهذه الحلة..هكذا أدرك أنه - بلا شك - قوى قوى وأن عليه ألا يخسر هذا..تقدم خطوة ثانية واثقة ثم وقف عند المنصة....

كانوا صامتين..

هكذا تكلم..قال كلمة أعدها الليل بطوله كي يهرهم:
"السادة الأفاضل..أهل العلم..بعد سنين طويلة جدا تم تمهيشكم فيها إلى أقصى الحدود..وتم التعامل مع علمكم وثقافتكم الاستثنائيين كشئ عادي..وترك أمر إدارة هذا البلد لرجال الأمن والجيش وأصحاب المال دون النظر إلى معايير العلم والثقافة والفكر..جاء الأوان لكي يقدم الوطن لكم إعتذاره..وبشدة"
هكذا رأى ما كان يريد أن يراه في أعين الحاضرين.....

ابتسم بداخله في ثقة.....

وهكذا أكمل.....

القرية من جديد....

وهكذا جلس (الغريب) متشيا.....

لم يكن أى من الأحداث التى سبقت بمسه بشكل شخصى.. فقط هو الآن شديد الرضا.. هو الآن حر.. وكان يدرك محوارية ما عليه أن يفعله.. الآن هو مهم أيضا...

كان جالسا على كرسى ضخم بمنزل أحد الأعيان الذى صار من اليوم منزله.. جسده القح يجد أخيرا أثاثا حنوناً يحتويه.. أمامه عدد من الرجال والنساء من أعمار متنوعة.. أثواب وأعمار مختلفة.. وكانوا جميعا يحدقون فى بلاءة وخوف كالجبال.....

"أنا (الغريب).. وزير الداخلية"

قالها فى صرامة.. واستمع لصوت ريق جماعى يتلجج.. هكذا أكمل:

"وأنتم أول مجموعة هتشتغل معايا.. طبعا (ضاحى) هو الذى اختركم بنفسه.. كلكم مقطعوين من شجرة وينفع تتحشروا فى أى حته.. ودلوقت أنتوا بقيتوا تحت تصرفى"

ثم هب واقفا بينهم وراح يتأملهم فى تركيز.. لم يكن ينتظر معجزة ما لكنه حاول.. أشار لواحد منهم تبدو عليه بعض من خبرة الحياة.. ربما تصل إلى حد الخسة كذلك.. هكذا اندفع هذا الشاب فى نفاق واضح وقال:

"أمرك يا باشا يا كبير"

لم يتلغ (الغريب) أسلوبه المبالغ فيه كثيرا لكنه - كذلك - لم يجد الأفضل....

"أسمك أيه؟"

"(عوض) يا باشا"

"بص يا (عوض)..أنت المسئول عن المجموعة دى..وأنت اللي هتكون على إتصال بيا..مفهوم؟"

انتشى الفنى....

"مش هتندم أبدا يا باشا"

"عايز أعرف الأمور فى البلد ماشية أزاى..الهدف من وراكم مش الوز على الناس..أنا أحب بس أطمئن على رضاهم عن الحكم ورد فعلهم على أى حاجة بنعملها..مهمتكم الأساسية هى الرقابة على تنفيذ القرارات اللي أحننا بنعملها..هل فعلا الخدمة بتوصل للناس..هل فعلا مفيش مجاملات أو محسوبية..عايز أطمئن إن كل حاجة ماشية زى ما الناس عايزة".

تعجب (عوض) لحظة لكنه تظاهر بالفهم..شد عوده وقال:

"أمرك يا باشا"

"عايز أنبسط منك يا (عوض)..وكم ان الرئيس (جمضان)..دا هيتابع الموضوع بنفسه..وهيتابع التقرير اليومى..فاهم؟"
"أمرك يا كبير"

أشار لهم (الغريب) كى ينصرفوا ففعلوا..كان متشيا بدوره الجديد فى الرقابة على الحكومة نفسها..كان هذا حين رن هاتفه.....

"أيوه يا حاج (محمد)..الاجتماع؟..أنا فى الطريق"
كان يتكلم حين رأى (عمرو أبو الليل) من خلف نافذة بيته..كان بالخارج يصرخ فى وجه من حوله.....
"أتأنا لسه مخلصتوش..الاجتماع بعد ربع ساعة..حرام دانا ماتمتش من أمبارح..يا مجانيسيين"

كان البائس يجرى خلف رجاله بنفسه فى رحلة مرورهم بالبيوت..كانوا يمرون بالاستمارات فى تعجل وهو يجرى بالسلاح خلفهم.....

"يا مجانيسيين"

القصر الجمهورى.....

"سعادة الباشا"

كان رئيس الوزراء يسير مهرولاً عبر الممر الطويل حين لحق به وزير الداخلية.. صافحه في سرعة ثم تحركا معا مسرعين....

"اهلا سيادة الوزير.."

"تعتقد يا فندم الرئيس هيفكر في الموقف أزاى؟"

لم يجب.. فقد زفر وقال:

"كلها ثوانى ونعرف.. وزير الدفاع جوه ومعاه وزير الاقتصاد.. الاجتماع مصغر وفي خلال دقائق هنعرف كل حاجة"

"ووضع القوات؟"

"أوامر الرئيس"

ثم توقف أمام الباب الرئيسى ومعه وقف الوزير.....

كانت لحظات عصيبة.....

القيادة الأمريكية

يتحدث صوت حازم من خلال الهاتف:

"أوامرك سيادة الرئيس"

"فعلا الموضوع غريب سيادتك.. بس القصة مؤكدة.. وملهاش
أى خلفيات دينية أو أيديولوجية.. وتحريتنا لحد دلوقت بتأكد إن
مفيش أى صلة بين الكيان الجديد وبين أى دولة معادية أو حتى
صديقة.. خاصة الدول الإسلامية والشيوعية".

تراجع الرجل بظهره مرتاحا وهو يستمع.. ثم أجاب ببطء:
"قرر حكيم من حضرتك.. يا ريت يا فندم نتقل معاهم للدرجة
الأعلى".

"أكيد.. التقرير النهائي لموقف الفئة دى هيكون قدام المكتب فى
خلال ساعة.. بعدها يا فندم هنتظر من حضرتك تحديد الخطوة
القادمة".

ثم علت وجهه ابتسامة عملية وهو يقول:

"طبعا يا فندم مدرك.. دى ضربة العمر".

بدأت ابتسامته العملية تتلاشى تدريجيا من فرط الإنصات
والتركيز.. هكذا رد وقد التمعت عيناه مع تتابع أفكاره:

"أكيد.. لو حضرتك قررت إنك تتحرك خطوة لقدام هكون
حريصين إننا نوصل للعالم وبصورة غير مباشرة إننا وراهم من
الأول.. الرسالة واضحة يا فندم.. الكل لازم يعرف إحنا مين.. ولازم
يخاف"

"تمام يا فندم".

ثم....

تيت تيت تيت.....

مبنى المحافظة القديم.....

القاعة الرئيسية.....

(جمضان) واقفا عند المنصة..عيناه في أعين الجموع فلا تعرف لمن

تنظر....

"السادة الأفاضل..أهل العلم..بعد سنين طويلة جدا تم قميشكم فيها إلى أقصى الحدود..وتم التعامل مع علمكم وثقافتكم الاستثنائيين كشيء عادي..وترك أمر إدارة هذا البلد لرجال الأمن والجيش وأصحاب المال دون النظر إلى معايير العلم والثقافة والفكر..جاء الأوان لكي يقدم الوطن لكم اعتذاره..وبشدة"

كانت النظرات عاجزة عن الفهم.....

تكلم (جمضان)....

"بدون تحميل للحديث..أنا هكلمكم ببساطة لأنى أكيد مش هأقدر أجاريكم لا فى الثقافة ولا فى طلاقة اللسان..أنا جمعتكم لأنى بمحاول إنى أوصل ببلدى لأعظم وأكبر مكانة تستحقها فى نظرى..أنا كنت بتمنى لدولة من العالم الثالث وكنت واحد من القطيع..دلوقت أنا صاحب قرار وقرارى إن بلدى مش هتكون فى وسط العالم الثالث..الطموح أكيد مش بفلوس..علشان كده مش هستخسر فى نفسى الطموح..ولا المفروض حد متنا يستخسر فى

نفسه الطموح..الطموح إنى أكون رئيس لدولة من العالم الأول..والطموح إنكم تكونوا أساتذة فى جامعات عالمية..إن إسمك واسم جامعتك يكون ليهم مصداقية فى العالم كله"

"فى رأى إن شرائح المجتمع فى بلدنا اتغيرت كثير فى الفترة الأخيرة..لو راجعتم أسماء كبار المسؤولين فى كل المجالات حتى الرياضة والسياحة هتلاقى أسماء رجال الأعمال..الشرطة..الجيش..نادرا ما نجد أسماء من العلماء وأساتذة الجامعات..كنت دائما بسأل..ليه..؟..رجل الأعمال يزنى هائل..رجل الشرطة ليه حس أمنى كبير..رجل الجيش مقاتل على أعلى مستوى..لكن أيه علاقة ده بالإدارة والتعمير والرياضة؟..وليه دائما نفس الفئات..العالم كله بيقدر أساتذة الجامعة ويحترمهم..لأنهم علماء..فى كل مجال..هندسة..زراعة..طب..تجارة..وأوقات كثير إداريين شطار"

"مرة زمان أتكلت مع واحد عزيز عليا..كان معيد فى كلية التجارة..سألته..وللأسف رده كان قاسى..قلى إن الجامعة معدتش زى زمان..ودورها السياسى والوطنى وحتى العلمى اللى كان بيأهلها إنما تقود مجتمع خلاص انتهى..المستوى العلمى للجامعة انحسر بشدة بعد انحسار دورها السياسى..وللأسف أيضا ده معروف لصالح مين؟"

"أعتقد إن الوقت قد حان إننا نستغل العقول اللي الدولة صرفت عليها ملايين لصالح الدولة.. أنا مش مستعد بعد دلوقت إني أسيب البلد لحد مش مؤهل إنه يمسكها بحجة الالتزام والانضباط.. كذلك أنا عايز أعيد بناء الجامعة وعقلية أبنائها وعايز أرجعلكم قيمتكم الحقيقية في المجتمع.. وده حقكم.. لكني برضوه منتظر تضحية مماثلة منكم علشان نبني ظروف جيدة للبلد"

هنا انقلبت الوجوه.. لم يجب أحد تلك الكلمة الأخيرة.. لكن (جهمان) استدرك فابتسم وأكمل:

"إنكم كمان تحترموا البلد.. وكيافها.. وتنتموا وبصدق للجامعة اللي أنتوا فيها.. تقبلوا سياستنا الجديدة لتطوير الجامعة وتساعدونا فيها.. وتساعدوا في تحقيق مرحلة انتقالية ناجحة نحو إدارة الجمهورية.. يا ريت ننسى الذات والفلوس والماديات.. ونفكر بطريقة زمان.. يوم ما الجامعة دى أثبتت على أكتاف رجال مخلصين كانوا بينظروا للغرب بغيرة وكانوا بيتمنوا يخلصوا الفرق"

تباينت ردود الأفعال في العيون.. فصمت للحظة لا تسمح بكثير من التفكير.....

"أنا جمعتكم لأنى محتاجكم لخطوة تغيير كبيرة.. بوضوح أكثر بحاجة ليكم لتكوين مجالس استشارية رفيعة المستوى للوزرات المختلفة.. في الواقع أحنا مخترنناش أسماء محددة لكن اختيارنا مش هيعتمد على أصحاب المناصب الحالية لأنى عارف إن اختيارهم مبنى

على الأقدمية وشوية حاجات ثانية أنا مش بحبها..دائرة الاختيار
تتضمن الكل من المعيدين وحتى الأساتذة المتفرغين..طبعا المجالس
دى هتكون بداية..ونمهد لإحتلالكم أماكن قيادية عديدة فى البلد
طبقا لاختصاصتكم وكفاءتكم.."

ثم صمت برهة..وأضاف ببطء:

"متظنين منكم كثير..أتمنى تفاجؤنا بحماسكم"

تعالى تصفيق أعلى من ذلك الذى سحب دخوله..كان تحديا له
وقد نجح حتى أنه قد كتم تنهيدة ارتياح كادت تخرج من بين شفثيه
بصعوبة..كان بحاجة حمة للاقناع..كان بحاجة لدعم هؤلاء
القوم.....

من بين الأصوات صدر صوت متحشرج..متردد نعم لكنه
شجاع..وعنيف أيضا.....

"حضرتك جايينا علشان كله فعلا..ولا علشان تحيدنا وتعيد
طلبة الجامعات من قضية الانقلاب؟"

استدارت الرقاب دفعة واحدة إلى مصدر الصوت العنيف
والعيون تطلق صافرات التحذير والذعر..تعالى الهمهمات بينما توقع
البعض أن يسمع طلق النار..البعض انكمش فى مقعده
بالفعل.....

ابتسم (جمضان) ابتسامة رحمة وقال:

"أستاذى الفاضل...؟"

"د عبد المنعم إسماعيل أستاذ بكلية التربية"

"دكتور عبد المنعم..أعتقد إنى مش محتاج أحيدكم بالطريقة دى لأنكم عشتُم سنين متحيدين أنتم وطلبتكم..وبالقوة..وحضرتك فاهم أكيد.. حتى الاعتراضات والأصوات الضعيفة مكش بيكونلها صدى..أنا بعرض عليكم العرض ده بإخلاص حقيقى يا دكتور"

صمت الرجل فى حين قال (جمضان) فى حزم:

"حضرات الأفاضل ده مجرد إجتماع مبدئى للتعارف..لكن اجتماعنا الحقيقى هيكون لما أزور الجامعة السبت القادم..هلتقى بيكم تانى وهبلغكم باختياراتنا وخططنا لتطوير الجامعة".

"تقدروا تفضلوا..فقط هستأذنكم ثوانى فى الدكتور عبد المنعم..شكرا لحضوركم".

هكذا بدأ الجمع فى انصراف أقرب للفرار وأعينهم متعلقة بالدكتور (عبد المنعم)..كان الأخير ثابتا فى مكانه وعينه تتجبان النظرات المشفقة من عيون المنصرفين..توترت عضلاته لكنه تكتم وتظاهر بالثبات..فقط نظر لجمضان الذى ظل يمدق فيه حتى خلت القاعة.....

من ثم أشار له.....

"د عبد المنعم"

ابتلع الأخير ريقه وقال:

"أنا قلت وجهة نظري..حضرتك اللي بتحاول..."

"أنا مش ضد وجهة نظرك..من حقتك إنك تشك..أنا مش هغير الصورة اللي اترسمت من قرون في ثوان..لكني بجد بمحاول..وهتعرف في يوم من الأيام إني صادق..أنا كنت عايز رأيك في نقطة ثانية"
"نقطة أيه؟"

قالها متعجبا..هكذا أشار إليه (جمضان) كي يجلس في تسامح..جلس ببطء..هكذا تكلم الأول وقد مال على الأخير كصديق:

"أنا واثق من علمك وقدرتك على التفكير والتحليل..علشان كده حابب استشيرك بصورة مش رسمية..عن الفاكس ده"
كان د (عبد المنعم) مذهولا من الحديث لكنه لم يعقب..ناولته (جمضان) الفاكس فتناوله..وقرأ ما فيه....
تركه (جمضان) ثوان ثم سأله:

"أيه رأيك؟"

"حضرتك عايز تعرف رأي الوطني ولا رأي السياسى؟"

"أكيد السياسى هو اللي محتاج رأى حضرتك"

صمت د (عبد المنعم) لحظة مفكرا ثم همس وهو يقابل نظرات (جمضان) بعينيه:

"وإيه اللي يخليك تتصور إن هكون مخلص في نصحتي لك؟"
نظر إليه (جمضان) وقال ضاغطا على حروف الكلام كمن
توقع:

"لأن عندك الشجاعة الكافية إنك ترفض تكون معايا..حتى
بالنصيحة"

هكذا اهتز د (عبد المنعم)..شرد ثم تغير وجهه فجأة ليكتسب
قناعا جدا واثقا:

"رأى إن العرض ده فرصة ذهبية لحماية دولتك..أكيد قوات
الحكومة على حدودك منتظرة الإشارة..أمريكا عارفة كده..وطبعا
مصالحها في المنطقة هتخليها تحاول تستغل الوضع..أنا دلوقت بس
فهمت إزاي محدش تصدى لإنقلابك..العرض الأمريكي أكيد وصل
للحكومة وده هو اللي بيحميك حاليا..المطلوب منك تتعامل مع
العرض الأمريكي بإيجابية وبأسرع وقت ممكن بحيث تقتنع الحكومة
إن أمريكا هي القوة المساندة لك وبالعكس..إن أمريكا هي اللي
ورا الموضوع من البداية..حاول تحقق ده من زيارة..تقارير
تلفزيون..أى حاجة..ونفس الوقت توصل للطرف الأمريكي إننا
سعداء بالتعاون ده ما دام مش هياثر على أهداف الثورة..يعنى
توصلهم سعادتك بالتعاون ولكن من غير تنازلات..لازم نحسس
أمريكا إن المصلحة مشتركة ومفيش طرف أقوى وطرف أضعف".

هكذا صمت (جصان) وشرد للحظة كى يهضم ما سمع..بينما
صمت د (عبد المنعم) وتأمل وجه الأول فى تركيز.....
"شكرا د (عبد المنعم)..رأى طيب وأكيد هنستفيد منه".
ثم أشار له كى ينصرف..هكذا قام د (عبد المنعم) مرتبكا....
"بس رجاء د (عبد المنعم)..كأنك مسمعتش حاجة"
قالها هلدوء..ولكن بصرامة.....

القرية....

دوار العمدة....

كان الدار مزدحما كالقطار..عن قطارات الدرجة الثالثة أتحدث
بالطبع..وكانت العصبية سائدة..كان موعد الاجتماع....

من بين الأجساد يبدو جسد الحاج (محمد) القوى وسط الوزراء
الجالسين على الطاولة..كانوا حوله كالشمس وقد شمر جلبابه وراح
يتكلم:

"هلدوء يا رجاله..واضح إن كلكم موجودين وحاضرين..أحب
أسمع أخبار حلوة"

هكذا هب (عمرو) من بينهم وشظايا لعبه تتطاير فى كل
صوب:

"حلوة؟..طبعاً حلوة..مش حلوة ليه..لازم الأخبار تكون حلوة..أمال أنا مانتش من ثلاث أيام ليه؟..علشان تطلع أى كلام ولا أيه؟..دى أخبأاااااااااااا زى الفل..دى..".

"تمام تمام يا (عمرو)..مقلناش حاجة..أنا بس بعد إذنك عايز أعرف إيه هي؟"

"ليه؟"

"ما هو يا بنى أنا رئيس الوزراء"

"أه أه تمام..هقولك"

"لو مش عايز بلاش"

"لا هأقوووووول..هو أنا صغير..هأقوووول طبعاً"

ثم وقف وأردف:

"أنا جمعت رجالي كلهم ولفوا على البلد بيت بيت وحة حة بالاستثمارات..وجمعوا معلومات كويسة عن الحرف اللي الشباب هنا بيعرف يشتغلها ومحتاجين فلوس قد أيه علشان يمشوا شغلهم ده..وكله يا ريس ملا الاستثمارات..مفيش كلب فكر يزوغ..وفى ظرف أسبوع يكون الواد (فضل) بتاع الكمبيوتر طلع النتائج علشان نحدد المشاريع اللي هنبندى بيها".

"أهم حاجة يا بنى أوعى يمكن رجالتك حاملوا حد أو ظبطوا حد..دى أكثر حاجة شدد عليها الرئيس".

"عيسب...عيسب"

قاطع الحاج (محمد) صوته الجنوني وأشار ل(أبو هاشم) الذى صاح:

"بس يا ابني مفايش حيل أرفع صوتي"

ثم استدار للحاج (محمد) وقال:

"كله تمام..أنا مریت بالوحدة الصحية بنفسى وقابلت الدكتور اللى فى الوحدة"

"هو لوحده؟"

"لا بس هو اللى كان موجود..الخمسة وثمانين ممرضة والثلاثين موظف والعشرين عامل الباقين ماضين حضور على الورقة بس..كويس إني لحقت اثنين منهم كانوا على السلم وكان فيه ممرضة شايلة ابنها وكانت بتجرى ماشفتنيش".

"وبعدين؟"

"رغم إني كنت بغلى لكنى جبت الواد الدكتور واتكلمت معاه..وعرفت منه حاجات كثير..الولد كان صريح معايا يمكن لدرجة الهبل..ده اللى شجعتنى أناقش معاه أزاى نطور المخروبة اللى هو قاعد فيها دى..ما هو مينفعش نقعد فى بيوتنا ونقترح..اللى يعرف بجد هو اللى قاعد فى المكان..الواد كان متحمس بس قالى

أهم حاجة تطور بأى حاجة غير السيراميك..البلد كلها أتطورت
بالسيراميك..دى بقت ثورة السيراميك.. ده اللي قاله".

"وبعدين؟"

ناوله الرجل رزمة من الأوراق وقال:

"دا تقريرى بخصوص اللي شفته ومعاه أفكارى للتطوير..وإن
شاء الله بمجرد ما تتعرض على الرئيس ويوافق هنتصل
بالتلفزيون..ونجيب المخرج علشان يعملنا حملة لتعريف الناس
بالتطوير والخدمات الجديدة علشان ميضحكش عليهم..ربنا يقدرنا
ونعمل...".

قاطعه (عمرو) كالمجنون:

"بس أنا خدت المخرج علشان الحملة بتاعتي".

"يا بنى هو أنت هتأخذه تناويه ولا هتخنقه وترميه فى
الترعة..ما هو هيفضل معانا وأنا يا سيدى هأخدوا بعدك".

هنا تعال الصوت الخنجرى الغليظ:

"وأنا يا عم (محمد)".

"أيوه يا (أبو الليل)"

ضرب (أبو الليل) طلقتين فى الهواء فأخرس الجمع....

"الله ينور يا أبا".

كان هذا (عمرو)..ثم تقدم (أبو الليل) نحو الحاج (محمد) خطوتين وقال:

"يا حاج أنا مش عارف أتحرك..هوا ينفع أحقق حاجة من غير اتصالات الرئيس..أنا عايزك بس توصلوه إني محتاج سكك للإتصال بدول العالم".

"محتاج أيه بالضبط؟"

صمت (أبو الليل) لحظة كمن يفكر..ثم قال:

"نمر التليفونات..!!"

"نعم؟"

انفعل (أبو الليل).....

"أيوه نمر التليفونات..وأنا هجيها منين يعني!!"

"طيب وأنت عايز تتصل بمين يعني؟"

"أنا سألت وأتأصت وعرفت إن أكبر حاجة في العالم..هي أمريكا وروسيا وفيه كمان أوروبا..بلغ الكبير إني عايز أكرم بتوع أمريكا وبتاع روسيا كمان..!!"

"بس؟"

"ما بعدها الدول هتجر بعضها..فيه الإنجليز..والطلانية..بس واحدة واحدة..دا أنا واعد العيال كلها بعقود عمل..هطلع عيل يعني؟"

ثم ناول الحاج (محمد) بعض الأوراق....
"عندى واد حديق اسمه (زكى) هو الذى حط البرنامج علشان
أول ما السادة الضيوف يجيوا..نفسحهم ونروقهم".
ثم سعل وأكمل:
"بس تشقولنا النمر".
هنا تدخلت (هانة)..قالت:
"وأنا يا ريس"
"أنا مش ريس يا (هانة)..أنا رئيس وزرا".
قالها فى غيظ ففقدت حاجيه لكنه استدركت ما دار فى ذهنها
بسرعة وهمست:
"أنا عن نفسى يا حاج خطيت عنى على حنة أرض علشان
أعملها مكتبة..ونجيب فيها..."
"شكرا شكرا يا (هانة)"
ثم استدار برأسه إلى (عمرو) وقال:
"بقولك يا (عمرو)..هو الأستاذ (صدقى) الذى كان ناظر مدرسة
لسه عايش؟"
"معرفوش؟..والله ما أعرفه..والله ما أعرفه" ما أعرفه"
هكذا اندفع (أبو الليل) يعرقل ابنه كى يخرس..وقال:

"عائزہ فی آیہ یا حاج؟"

"أبدا.. سيادة الرئيس كان حبيب عسكره التعليم.. اتصرفوا وحيبوه لأن الرئيس عايز المناهج تتغير في خلال اليومين دول.. المدارس قربت واللى بيخدوا العيال دلوقت ده مش هينفع"

"هي المدارس قربت؟"

"الرئيس هو اللي قال".

"تمام تمام... بس انا فاكر ايني طخيت الأستاذ (صدقی) ده قبل
 كده"

"والعمل؟"

"يا عم مسك (عمرو) التعليم.. ما هو يعرف يفك الخط".

هكذا نهض (عمرو) من سقطته وقال:

"أنا قدها"

"قد میں؟.. یا سیدی مش وقت التعليم خالص.. الرئيس (جمضان)
مش مستعجل"

ثم استدار إلى الجمع من الوزراء ورجالهم وصاح:

"الصوت يا رجالة.. الصوت"

毒害劇

(١٠)

الإعلام اليوم

جريدة الإحرام وهى جريدة حكومية:

"انتهاء أحداث الشغب بشولاط..عمدة القرية يشكر الجهات الأمنية على سرعة التدخل والحفاظ على سلامة المواطنين"

جريدة ضيق البلعوم وهى جريدة معارضة:

"استقرار الأمور بصورة نهائية فى شولاط وقيام الجمهورية..وضربة قاسية للنظام"

جريدة صوت شولاط وهى جريدة جديدة حلت محل الجريدة المحلية السابقة:

"قرارات عظيمة لقيادات النظام الجديد..الوزراء بأنفسهم يسرون وسط الجمهور للتأكد من سير العمل وسط ثورة من الحب والتأييد".

قناة البحيرة:

يستدير المقدم بكرسيه اتجاه الشاشة الأولى ويقول:

"أستاذ هشام العضو النشط بالحزب الحاكم..ما ردك عما تردد من عجز الجهات الأمنية التام عن التدخل لوقف المهزلة الحادثة فى شولاط؟..وما يعكسه من تعرض الحكومة لضغوط لكى تتعامل مع الموقف بدبلوماسية ودون اللجوء للقوة؟"

يظهر وجه عصي على الشاشة يميل نحو الكاميرا ويقول في انفعال:

"نحن لا نقبل بأى طريقة التلاعب بالألفاظ..ضغوط على أیه بالظبط؟..أحنا قلنا أكثر من مرة إن الموضوع لا يتعدى مجرد أحداث شغب عادية والأمن الداخلى مسيطر عليها..القصة مش محتاجة أكثر من قوة الأمن اللى موجودة فى المركز..وهى فعلا مسيطرة..جرى أیه..ده حتى.....!!"

"حسنا..حسنا"

ثم يلور ويتحدث إلى الشاشة الثانية:

"أستاذ (علاء)..بصفة حضرتك من قادة حزب (الريجة فاحت) المعارض..تعليقك على أحداث (شولأط) وما يقوله السيد (هشام)؟"

"حزب مين!!!!!!"

كان هذا صوت الشاشة الأولى ثم تم قطع الصوت كالعادة..هكذا تكلم الصوت من الشاشة الثانية وكان غاضبا ايضا:
"مش عارف بصراحة الدماغ بتاعت الحكومة فيها أیه؟..كذب كذب..ما انتهى عهد الأولى والثانية والناس دلوقت بتفرج على الفضائيات..يعنى خلاص محمش يسمع الأكاذيب دى"

ثم سكت..هكذا اعتدل المقدم وقال:

"أستاذ علاء..هل يوجد لديك تعليق إضافي؟"

"آه..آه..أكيد..يا جماعة متنسوش إن أى نظام ناجح فى أى
دول فى العالم يعتمد على الصدق..على الجدعة..على
الشفافية"

"لا إله إلا الله"

القرية.....

راح (بسطاوى) يضرب فتات الأرض بفأسه كالمقاتل..بجواره
كان (سعد) وكان واقفا فى وجه الشمس قاطبا وجهه من لفحها
والزحاجة على فمه..جرع جرعه ثم قال:

"تصدق يا (بسطاوى) مين عدى علينا "

"مين؟"

"الحاج محمد بذات نفسه..كان بيتأكد إن كل حاجة تمام وإننا
مبسوطين".

"والله شكلك بتفشر".

استفد سعد فأقسم:

"والنعمة دى حصل".

"طب كمل كمل".

"هوا جلنا على الظهر وكان..."

رمقه بسطاوی قائل:

"أقصد كمل شغل یا خفیف"

قاعة مجلس الوزراء.....

رئيس الوزراء على قمة الطاولة.. وجهه شاحب كالأصفر
والأنفاس الجائعة من حوله تقطع عن صدره ذرات الهواء.. كان
يقول:

"بخصوص الأزمة الأخيرة".

خرج صوته هزيعا كطرف سيجارة مشتعلة.. فتاته يتساقط بين
الجالسين.. كانت الهزيمة هي الوصف الدقيق....

"الموضوع حاليا بقى معقد.. محتاج حكمة وخطوات محسوبة".

تحدث وزير الدفاع في صلابة:

"وضع قواتى حاليا؟"

"هتراجع مسافة عشرة كيلو.. وهشيت في مكانها.. المكان ده من
كلامك قريب من العمار.. وده مطلوب".

"أفهم من كده إن الموضوع هيطول".

"التفاصيل كلها مع سيادة الرئيس.. في اجتماعكم المغلق يا سيادة
الوزير".

"مفهوم".

هكذا قال ثم صمت بوجه مقتضب.. وتحدث وزير الداخلية من
خلفه:

"وبالنسبة لقوات الأمن وبعد الأحداث الأخيرة..أحب أعرف المطلوب مني تحديدا..خاصة بعد تراجع قوات الجيش".

قالها وهو يضغط على الحروف الأخيرة في قسوة ويلقى نظرة رزيلة على الحاضر أمامه..هكذا تنهد رئيس الوزراء وبعثر المزيد من الرماد...

"ولا حاجة..خليكم على استعداد مش أكثر".

ثم استدار ببطء كتمثال حجري..كان الصمت كحجارة ذائبة في الهواء.....

"سيادة وزير الإعلام.."

نظر إليه الأخير نظرة بائسة..

"مطلوب منك تفرقع أى قضية اليومين دول..أى حاجة..حدث رياضى..اعتداءت..تصريحات سياسية غريبة مستفزة..عايزين الحدث ووراه البرامج التحليلية وخلافه..بس يكون الموضوع كافى يغطى أكثر من أسبوعين".

تنهد وزير الإعلام كمن عاد إلى الحياة..عبارة تقول: "بسيطة"
هكذا تأمل رئيس الوزراء المجلس في نظرة سريعة..سؤال طاف برأسه قبل أن يكمل هذا الاجتماع الكئيب..لماذا يفكر الجميع بمبدأ الحساب...؟؟؟

لكنه ابتلع ريقه وواصل:

"حد عنده حاجة يقولها؟"

القيادة الأمريكية

المستول الكبير يعدل وضع ياقته ويحديق في وجه الجالس أمامه.. مستول أمني على الأرجح.. كان الاجتماع قد دام ما يقرب الساعتين وقد قرر المستول أن ما توصل إليه حتماً يكفى.. هذا قال كلمته:

"يعنى رأيك إننا نقدر نأخذ خطوة للأمام في علاقتنا معاهم".

"أكيد.. هو ده الوقت المناسب".

"إقتراحك".

"دعوة".

رفع المستول الكبير حاجبه كأنه عقله يفكر....

"أو كى.."

ثم أعقب:

"أبعث دعوة رسمية لرئيسهم.. زيارة رسمية الأسبوع القادم".

هكذا ابتسم المستول الأمني بصورة رسمية ولم يتكلم.. فقط

أستأذن وسحب ورقه معلنا انتهاء مهمته.....

مبنى المحافظة القديم.....

(جمضان) سائرا وفي يده حقيبة أوراقه..تسارع خطواته نحو
مكتبه وإلى جواره يعدو (ضاحي) حاملا حفنة من الأوراق في ملف
وقد انكمشت أنفاسه وصار وجهه أقرب إلى الإزرقاق.....

"تقارير الرجال يا باشا".

"مش عايز أسمع اللي نفسى فيه..عايز أسمع اللي يحصل يا
(ضاحي)".

هكذا تردد (ضاحي) لكن نظرة (جمضان) التي حملتها استدارته
حسمت له الكثير من أفكاره.....

تكلم وكانا قد دلفا إلى المكتب فجلس (جمضان) ومن ثم جلس
هو...

"واللى جامع المعلومات دى...؟"

قاطعه (ضاحي) كمن يمتحن:

"كلهم طلبة جامعة..بلديتنا..ومعظمهم معروف عنهم التفوق
والذكاء".

ابتسم (جمضان)..ابتسامة معلم راض عن تلميذه....

"أنا سعيد بيك يا (ضاحي)..رغم إنك تقريبا متعلمتش..لكن
دماغك توزن بلد..ده يهمنى"

لم يظهر (ضاحي) تعبيراً واضحاً يرد به على ما سمع.. فقط نظرة فيها بعض الاحترام.. الامتنان.. الفخر.. وأشياء أخرى....

"الدرس الأول في التقارير - لو عايز تقارير بجد مش تقارير تضحك بيها على نفسك - إن اللي يجمعها يكونوا - بقدر الإمكان - أذكاء ومتعلمين.. وسمعتهم طيبة.. وإلهم - بقدر الإمكان برضوا - ميكونش ليهم مصلحة.. إنت للأسف صعب تلاقى حد يقبل ينقل أخبار عن ناس ويكون في نفس الوقت أعلى منهم في الثقافة والفكر والأخلاق.. فعلى الأقل ماتعتمدش على حد وضع في نقل أخبار عن ناس في الأساس مش موضع اتمام.. وإلا هتخلي شوية حثالة يلعبوا بيك ويكسبوا كثير من وراك".

"تمام يا ريس".

"فيه كام مجموعة معاك؟"

"أربعة يا ريس زى ما أمرت"

ابتسم (جمضان) أكثر.. قال:

"الدرس الثاني.. دائماً خلي معاك أكثر من مجموعة تجمع معلومات.. مهم يكونوا ميعرفوش بعض.. تقاريرهم لازم تتقارن في النهاية.. التناقض معناه ببساطة.. إما التلاعب أو عدم الدقة.. في الحالتين لازم توصل لكل مجموعة لوحدها إن المعلومات اللي جمعتها كذب.. لازم تخطهم تحت ضغط الإتهام.. لازم ناخذ عليهم بنط.. ويبتدوا يحسوا إن الحبل مش متسابلهم على الغارب".

كان (ضاحي) غارقا فيما يقوله (جمضان).....

"المهم..تقريرك يا (ضاحي)".

هكذا أفاق (ضاحي) لأصل الحوار..وقدم الأوراق ل(جمضان).....

"اللى فهمتوا يا ريس إن معظم الموجودين فى مناصب كبيرة فى الجامعة من رجاله الحكومة السابقة..ومعظمهم برضوه مش مشهود ليهم بأى حاجة..قليل منهم من أصحاب السمعة الطيبة..كثير منهم رجاله مناصب وفلوس وده معروف عنهم".
"فى أسامى محترمة؟".

"كثير..بس فيهم ناس صغيرة فى السن وفيهم دكاترة على المعاش..معظم المناصب بتبقى لناس قرية من سن المعاش..أقدمية يعنى".

"ده مش مهم..الأقدمية - يا (ضاحي) - نظام أتحط علشان يأكد عدم الثقة فى حيادية ونزاهة الاختيار".

"تمام يا فندم".

"المهم....."

"قدام حضرتك أسامى كل الأساتذة أصحاب السمعة الطيبة".

هكذا تناول (جمضان) الأوراق التى أمامه.....

"أوامر سعادتك".

تكلم (جمضان) ومازالت عيناه تتشبان بالكلمات:

"زى ما أنت..أصحاب المناصب القديمة هيفضلوا..ومش
هيحسوا بحاجة..لحد ما أدرس الأسامي الجديدة".

ثم تذكر.....

"أخبار حملة التلفزيون أيه؟"

"تمام يافندم..أكثر من برنامج وخير عن العلاقات مع أوروبا
وأمریکا".

"عظيم..خليها جاهزة لحد ما أقولك..كلم الدكتور (عبد
المنعم)..عايزه فوراً"

"د (عبد المنعم)؟"

رددھا (ضاحی) بوجه لم يقدر على التحمد..كان من الواضح
أنه لم يفهم..أو أنه لم يحب ما سمع....

في النهاية هز رأسه كعادته وقال:

"أمرك يا ريس"....

المحافضة.....

الحرم الجامعى.....

كان التجمع الفقير منطقيا أمام قاعة المؤتمرات..وحيث وقفت
سيارة (جمضان) المتواضعة أمام الساحة لم يبدو الأمن متشددا
كالعادة..لم يكن الجو صائعا للرهبة لكن الرقاب كلها كانت
متشوقة لهذا الغامض القادم.....

وحين هبط من سيارته البسيطة كان - بهيئته - مثيرا للفضول.. كان صلبا لكنه كان شديد البساطة.....

ربما لم يقتنع الناس بدخوله كرئيس.. لكنهم كانوا متشوقين لمعرفة هذا الرجل الغريب.. آخرون أكثر حكمة كانوا يفكرون في مصائرهم المرتبط بهذا الغريب.. كان أكثرهم من الشباب.....

وحين دخل (جمصان) إلى القاعة تعمد أن يكون حازما في دخوله وحركته.. هكذا نهض الحشد الضخم من أصحاب الياقات وتعالى التصفيق البارد.. هكذا أشار لهم (جمصان) بالتوقف بنظرة متواضعة لكنها واضحة.....

هكذا جلس في منتصف المنصة ويجواره رجاله.....

استجمع قوته بينما الأعداد تجلس.. ثم تكلم.. هدهوء ولكن بقوة.. كانت الثقة قد صارت ملكه الآن.....

بدأ صوته الرنان يدوى في أركان القاعة.. كان يقول:

"أولا.. أشكر حضوركم المحترم.. وإهتمامكم الواضح بتلبية دعوتي"

"الواقع إن ده أول مؤتمر شعبي أعمله منذ قيام الثورة.. وإختياري للمكان ده طبعي ومنطقي.. لأن المكان ده فيه أعلى قوتين محركين للحضارة.. أساتذة الجامعة بعلمهم وثقافتهم والشباب اللي هو القوة والقدرة والمستقبل.. الطاقة اللي ممكن تحول العلم والثقافة دى لإنجازات ملموسة لو تم استغلالها بالشكل المطلوب.. مش بس علشان كده.. وعلشان إحنا مدينين للقوتين دول بالإعتذار عن

السنين الطويلة اللى تم فيها قميش دورهم..واللى أعتقد إننا دفعنا
تمنها كدولة من حاضرننا ومستقبلنا".

"أنا شايف إن كل حاجة هتبتدى من هنا..عقولكم
هتفكر..والشباب هينفذ..مفيش حاجة إسمها بطالة لأن مفيش إنجاز
ملوش ثمن..كل مجهود ليه ناس تقدره والطاقة البشرية هتفضل أكيد
هى رقم واحد".

"أنا بأسعى دلوقت لتوفير مجلس إستشارى من رجال الجامعة
الكبار..بعلمهم طبعا..من المعروف عنهم الخبرة والعلم
والإقتدار..علشان يشارك فى إيجاد الحلول وإتخاذ القرارات..المجلس
ده هيكون على إتصال تام بالشباب..ومدير لطافته وواضع
لإستراتيجيات تفعيل طاقته".

لم يكن هناك تصفيق..لكن (جمضان) لم يهتم..كان يعلم أن
حجم تركيزهم قد تعدى مرحلة الوعي.....

"كل ده تمهيدا لتفعيل دور الجامعة فى العمل السياسى..وبشكل
مماثل أحب أن أوضح إن طموحى فى إشراك الشباب فى العمل
السياسى بلا حدود..الشباب مش بس طاقة ولكن صدق..ونفوس
لم تتلوث بأطماع الحياة العملية..أنا ضد تحديد الشباب فى قالب
واحد..اتحادات الطلبة وخلافه..ولكنى أسعى لعمل مجلس استشارى
من طلبة الجامعة..بعضه بالإنتخاب وبعضه بالإختيار..الاختيار على
أسس من الشفافية والوضوح..على أسس التفوق والسمعة
الطيبة..أنا بوعدكم بعمل هذا المجلس من الشباب وإنى أدخله
تدريجيا فى العمل السياسى..تدريجيا حتى يكون قادرا على المشاركة

والتغير وعلى وعى تام بظروف وقضايا بلده.. وذلك تمهيدا لقيام هذا المجلس. بناء على أحزاب سياسية واجتماعية من أبناء الجامعة.. وداخل الجامعة".

هز الناس رؤوسهم.. بعضها رؤوس شابة اهتزت بالحماس وبعضها عاقلة تسخر من هذا الكلام ذى الصبغة الإعلامية.....
واصل الرجل:

"من الغباء أن يعتقد شخص أنه - وحيدا - يقدر على التغير.. ولا اثنين ولا أكثر.. لأنهم في النهاية لا يروا بغير عدد أعينهم.. لكن التغير يصنع عندما نترك أذننا نسمع كل الناس.. هكذا نستطيع أن نرى بألف عين.. من خلال عيونكم أقدر أعرف الأمور اللى يتدور في كل مكان.. من خلال عيني مش هقدر أشوف غير قدامي بس.. أنا بوعدكم بتفعيل كلامي.. وأحب إنى أسمع منكم"
نظرات شاردة.....

"وده مش الهدف.. دى خطوة لتغير شكل الجامعة في بلدنا الوليد.. أنا عايز أصنع عقول وكوادر تقدر تستغل الصلاحيات والحريات المتوفرة ليها بدون غشم أو جهل.. ده دور الجامعة اللى أنا محتاجه في الفترة القادمة".

هكذا بدأ صوت الاصطدام الضعيف يتعالى ليرقى إلى مرتبة التصفيق.. تصفيق بطئ لم يلبس أن تسارع ليغطي جنبات القاعة....
لم يتسم (جمضان).. بذل مجهودا خارقا كى لا يفعل لكنه اكتفى بأن أخذ نفسا عميقا ثم قال:

"سيتم إبلاغ السادة المرشحين للمجلس في خلال هذا الأسبوع.. في انتظار سماع أرائكم الكريمة".

القرية.....

دوار العمدة.....

الحاج (محمد) ينهى مكالمته مع (أبو هاشم) ثم يهز رأسه المتورم بالأفكار في إنفاك.. تقترب منه (هانة) متوجسة وقد أذهلها ما يفترشه أمامه من أوراق.....

كان منكبا لكنها قاطعته....

"جرى أيه يا حاج مش كفاية شغل؟"

أجفل الرجل من ثم رفع رأسه.....

"هانة؟.. هانت يا حاجة.. أنا لسه قافل مع (جمضان).. بصراحة أنا مبسوط جدا بإخلاصه وعازيز أساعده نعمل حاجة للناس"
"بس الطلبات دى كثير قوى".

"أنا عرضتها على (جمضان).. ولقينا حلول لمعظمها.. (جمضان) طلب مني أحاول أنفذ في أسرع وقت.. ده هيخلي الناس تثق فينا بصورة أكبر وأسرع ودى أكبر فائدة من اللي بنعمله ده".

"المهم يا حاج (محمد) الناس تحس باللى بنعمله علشانهم"

صمت الحاج (محمد) لحظة يفكر.. ثم رفع رأسه ببطء وقال:

"المهم إنه يتعمل وإخلاص".

ثم هز رأسه وقال في حزم:
"والناس كمان عارفة يا (هانة)..مين في البلد مش عارف؟"
نظرت إليه (هانة) بنظرة ظاهرة.....
"المهم يا (هانة)..فيه موضوع حريمى لستات البلد عايزينك
تمشى فيه؟"
لم يعجبها انحرافه عن مجرى الحديث لكنه امتصت ذلك وقالت:
"نعم يا حج"
ارتاح لإنصياعها..هكذا راح يبحث في عقله المكثود عن شئ
يقوله لها.....!!

الإعلام اليوم

جريدة الإحرام وهي جريدة حكومية:

"السيد الرئيس يقوم بجولة لزيارة عدد من الدول الأوربية في إطار المباحثات حول تداعيات الأزمة الاقتصادية الأخيرة".

جريدة ضيق البلعوم وهي جريدة معارضة:

"حالة من القبول تسود الجماهير في شولاط.. وقناعة بأن الحكومة الحالية قد تستمر".

جريدة صوت شولاط وهي جريدة جديدة حلت محل الجريدة المحلية السابقة:

"صدى واسع لزيارة الرئيس الناجحة للجامعة.. وقرارات سيادية فاصلة في تاريخ البلاد الأيام القادمة".

قناة البحيرة:

يستدير المقدم بكرسيه اتجاه الشاشة الأولى ويقول:

"أستاذ وليد عمران الصحفي بجريدة الإحرام.. ما تعليقك على أحداث شولاط الأخيرة والتي لا نرى أصداءه منذ زمن على صفحات الجريدة؟"

ثم يظهر الوجه الغاضب على الشاشة ويقول في ببطء:

"الحقيقة إن اعتمادنا وثقتنا العمياء في الإعلام الأجنبي خللنا بنمشی ورا كلامهم كأنه مُترل.. يا جماعة كلنا عارفين الناس برة غرضهم أيه من ترديد الكلام ده وشعبنا الذكي الواعي فاهم الكلام ده كويس.. الموضوع انتهى تماماً لكن الإعلام الأجنبي بيحاول يخلق حالة من التوتر والبلبله.. فهمنى؟.. أنا بقول..."

"حسنا.. حسنا"

ثم يلور ويتحدث إلى الشاشة الثانية:

"أستاذ حسام.. بصفة حضرتك من قادة حزب (بتوع الأتوبيس) المعارض.. تعليقك على أحداث (شولأط)؟"

"هأقول أيه!!!!!"

"ده فشل كارثى وتعتمد غير منطقى على قضية بتمس الأمن القومى.. مش قادر أفهم أحنأ هنأم لحد أمتى..الموضوع خطير..وواضح إن فيه أبدى خفية أجنبية بتدعم الموقف..أحنأ الأخبار بتوصلنا إن الجماعة اللى فى شولاوط بدأت تثبت أقدامها وبدأت أمورها تستقر..الأمر بقى أمر واقع..دى كارثة.. أين الشفافية..الشفافــــــــــــــــــــة؟"

"شکرا.. شکرا أستاذ.. (حسام)".

القرية.....

مدد (بسطاوى) قدميه وهو يفتش الغطاء بجوار أرضه.. ويجواره
جلس (سعد) ومعه منديل الطعام اياه.. قال (بسطاوى) وهو يمد يده
بادئا التناول:

"شفت اللى حصل يا (سعد)"

"خير يا (بسطاوى)؟"

"حاجة عجيبة.. أنا أمبارح لما لقيتهم فتحوا صناديق للى أسمها آيه
الشكاوى دى قلت أجرب.. بصراحة أنا كنت قلقان الأول وبعدين
قلت زى ما ترسى.. كتبت شكوى علشان الناس اللى بترمى الزباله
جنب البيت.. مفيش يومين يا خويا ولقيت الحاج (محمد) باعت
رجالته.. ظبطوا الدنيا وعاملولى لوحة كبيرة علشان محلى يرمى
زباله.. ده حتى أدولى غمرة تليفون كده علشان لو حصل الموضوع ده
تاني"

"معقول؟"

"أنا لحد دلوقت مش مصدق"

"ما أنا قولتلك يا (بسطاوى)؟.. الناس دى أحسن من العمدة
بكثير!!"

"والله أنا مصدقك يا (سعد) بس الواحد مش عارف"

"مش عارف آيه بس؟.. كل كل"

تنهد (بسطاوى) ثم مد يده أمامه ليتناول.....

مكتب رئيس الوزراء....

كان الرجل جالسا كالميت.. وحين دخل عليه وزير الخارجية
أيضا لم يحرك ساكنا....

"سعادة الباشا"

رفع الرجل رأسه في بطاء ثم أشار له كي يجلس دون أن
يتكلم....

"مالك يا باشا؟.. الموضوع أياه برضوه؟"

"هو فيه غيره؟.. خلاص يا معالي الوزير.. أنا مش عارف أتصرف
بالذات بعد ما بانّت نية الأمريكان.. والرئيس هيتجنن.. بيقول أزاى
الناس دى خططت ودبرت ونفذت وأحنا نايمن على ودنا".

"ده تخطيط من بره يا باشا"

"مش عذر.. كان لازم نحس.. كان لازم نشك.. كان سهل
مؤامرة زى دى تتمنع.. لكن دلوقت صعب.. خلاص يا معالي
الوزير.. الوزارة انتهت وأنا انتهيت"

"بس يا معالي الوزير الرئيس..."

قاطعه في عصبية:

"مش هيجل المجلس دلوقت.. أى حل للمجلس هيبقى تأكيد
للأحداث.. الرئيس منتظر الأمور تستقر الأول"

"طيب ما نحاول نستغل الفرصة ونحاول نسيطر على الموقف في
الفترة دى"

"صعب.. أنا مش هأقدر أتحرك من ورا ظهر الرئيس"

"ما هي كده كده خربانة"

"حتى لو فرضت..هنعمل أيه؟"

"نحاول نأخذ دعم الاتحاد الأوروبي..الاتحاد الأوروبي بيحاول
دلوقت يكون ليه مواقف سياسية قوية ومستقلة..ممكن"

"المواقف شيء والتحرك السياسي شيء تاني"

"أحنا بنحرب..الاتحاد الأوروبي ليه مصالح في المنطقة وأكد
السيطرة الأمريكية المطلقة ضد مصلحته"

"جميل..يس الاتحاد الأوروبي لسه موصلش لمرحلة..."

"مش هنخسر حاجة يا فندم"

"مممكن نأخذ وعد ميثاقش"

"نحرب ونوزن الأمور"

تنهد رئيس الوزراء كمن يأخذ نفسا من تحت الماء..صمت ولم
يعقب.....

كانت رأسه تنبض كالساعة..لم يكن قادرا حتى على تحويل
أفكاره إلى كلمات....

لكنه نظر لوزيره وعاود التفكير.....

مبنى المحافظة القديم.....

تنهد (جمضان) مرهقا.. كان واقفا بجملته الفاخرة أمام زجاج
مكبه وكان شاردا يراقب حركة الشارع.. بينما كان (ضاحي)
بحواره وكان منتشيا.....

"ولوني مش عارف دماغك فيها أيه.. لكن بصراحة القاعدة
بتاعت الجامعة دى عملت شغل جامد.. وفيه صحافة وإعلام كثير
غطى الخير"

ابتسم (جمضان) ولم يعقب.. صمت قليلا ثم سأله:

"أخبار رجالتك أيه؟"

"المجموعة اللي جوه الجامعة شغالة والتقارير بتعرف.. والناس اللي
فى البلد بدأت فعلا وعملت شغل حلو أوى".

استدار له جمضان وسأل:

"أزاي؟"

"التقارير بتقول إن الناس فى البلد كانت الأول مش مصدقة.
أفكرونا زى بتوع مجلس الشعب.. بس الناس دلوقت بدأت
تؤمن.. موضوع التظلمات اللي أتعلم الأسبوع اللي فات عمل
نتيجة والناس شايفة.. كمان وعود المجلس كلها بتحقق.. الناس
بتدعى للحاج (محمد) وليك صبح وليل".

"الحاج (محمد)؟"

صمت لحظة وشرد.. ثم لم يلبث أن هز رأسه كمن يبحث عن
مزيد من التركيز.. ثم رفع كفه وقال:

"أبعت للحاج (محمد) قوله يستمر..ويكلم الوزرا يؤكد عليهم أنهم يتابعوا الشغل بنفسمهم..وإن الناس دائما تشوفهم في كل مكان..قوله برضوا إن الناس تحب تشوف مش تسمع..يعني لازم تتبنى حاجات وتعمل قدامهم..حتى لو حاجات بسيطة..التلفزيون لازم يذيع كل شوية".

"أمرك يا فندم".

"الفاكس اللي وصل فين؟"

"موجود على المكتب".

"طيب دخلى الدكتور (عبد المنعم)".

"أمرك يا فندم".

هكذا انصرف (ضاحي) مغادرا الغرفة..خرج ثم ظهر من خلفه الدكتور (عبد المنعم)..لم يكن واثقا كالمرّة السابقة لكنه كان هادئا على كل حال...

دلف إلى الغرفة ثم أغلق الباب خلفه..أشار له (جمسان) كي يجلس فجلس ثم ناوله ورقة من فوق مكتبه وقال:

"الفاكس ده وصلني النهاردة..أيه رأيك؟"

تناوله الدكتور (عبد المنعم)..ألقي نظرة سريعة ثم ابتسم وقال:

"رأى كدكتور أو كمواطن أو...."

"رأيك كمستشار؟"

هز الرجل وكنم ما يستطيع من رد الفعل..

"يا سيادة الرئيس هكلمك بصراحة.. عقلك وإخلاصك اللي كان واضح في اجتماع الجامعة يخليني أنصحك بإخلاص مماثل.. الاتجاه الإعلامي بيشرح إنك قريب من أمريكا.. إيران بتعرض هنا إنها تكون أول دولة تعترف بوجودك في مقابل تفعيل علاقات سياسية وإقتصادية قوية معاها.. ده عرض كويس.. بس في الميزان هيخسرك كثير.. لأن أمريكا وإيران ميتحطوش في كفة واحدة.. ومحدث هيقبل إنك تلعب على الاثنين.. لو هتختار طبيعى تختار أمريكا.. لكن أمريكا مش مضمونة.. النهاردة مصلحتها معاك بكرة هتبقى عليك.. كمان أمريكا مش هتسمح إنك تكون الأقوى في المنطقة.. مش هتسلحك ومش هتتشك إقتصاديا إلا لحد معين مش أكثر.. إيران ممكن تساعدك في ده.. بس ساعتها هتخسر الدعم السياسى الأمريكى وبعض المساعدات المادية.. الخلاصة إنك لازم تختار بين الدعم السياسى وسقف الطموح المشروط وبين دعم اقتصادى أقل ودعم عسكرى غير مشروط.. أنا لو مكانك أمشى ورا أمريكا.. لأنى محتاجها.. دى مش مرحلة إيران.. على الأقل دلوقت.. أنت حاليا في مرحلة أمريكا.. بكرة ممكن تكون مرحلة إيران.. علشان كده ردك على إيران لازم ميكونش سريع ويكون مش واضح.. علق الأمور.. من ناحية علشان متخسرهمش ومن ناحية لأن الكلام ده كله بيوصل لجهات إتخاذ القرار في أمريكا.. ده هيخلي أمريكا تعرف إن ليك زباين وتكون أسخى في التعامل معاك"

"بصراحة يا ريس العرض ده زيه زى حاجات كثير جت في صلحك".

ابتسم (جمضان) ثم هز رأس قائلا:
"نصيحة مخلصه.. أنا واثق من كده".

"يعنى أستاذن يا ريس؟"

"تقدر تستأذن يا دكتور (عبد المنعم)..على لقاء بعد أسبوع مع
تعيين المجلس الاستشارى"

"ليه..هو أنا فى المجلس؟"

"أنت بتسأل؟"

قالها ثم ابتسم وأشار له أن ينصرف....

القرية.....

دوار العمدة....

الحاج (محمد) جالسا على قمة مائدته..يجواره (أبو هاشم) وعلى
مسافة كان (أبو الليل) و (عمرو) و (الغريب)..تكلم الحاج محمد
قائلا:

"الريس (جمضان) مبسوط على الآخر..وصله إن الناس بدأت
تنبسط وتثق فينا..بس التعليمات الجديدة إن الناس لازم تشوف
عمار..تحس إنها فى بلد كبير..الناس لازم تشوف التغيير مش
تسمعه".

قال (عمرو) بجدة:

"وفينه الريس (جمضان)؟..بيعمل ايه ده كله؟..مش ناوى يرجع"

"الراجل يعمل شغل مهم في المحافظة..ويضبط الدنيا علشان
الأمور تستقر..أدينا هو داخلين على أسبوعين..حد عرف يعملنا
حاجة".

"أيوه بس احنا فين من اللي هو يعمله ده؟"

"كل واحد بيشتغل في جهة..والريس (جمضان) عارف كويس
هو يعمل أيه"

يتكلم (أبو هاشم) مرهقا ويقول:

"يا أخونا خلينا في اللي أحنا فيه"

"أنا بقول كده برضوه"

ثم أستاذ الحاج (محمد) إلى الجمع..قال:

"باقى أيام على المؤتمر الشعبى التانى..في الفترة دى عايزين نفعل
الوعد أكثر..أنا بنفسى هأقوم بتسليم عقود الأراضى على الناس
ابتداء من بكرة..هيكون فيه اتفاق بالتراضى بين ملاك الأرض على
الأصناف اللي هيزرعوها علشان عملية الإنتاج تمشى في الصالح..أنا
كلمت الريس وكان متحمس جدا..وقال كمان أنه هيعتلتنا من
عنده أساتذة كبار في الجامعة في مجال الزراعة علشان تشرف على
المحاصيل بنفسها".

تكلم (أبو هاشم):

"بالنسبة لى أنا هأمر على المستشفيات والوحدات الصحية لظبط
المخالفات وتحديد المتوفر وغير المتوفر..عايز أتأكد إن الدكتور
موجود ٢٤ ساعة..وإن المريض مش هيغلب..كمان لازم نصنف

المستشفيات والوحدات التي عندنا لأماكن كويسة وأماكن أقل وأقل.. ده هيساعدنا نعرف كل عيان المفروض ياخذ علاجه فين ومن مين حسب حالته مش حسب وقت ومزاج الدكتور.. ده هيسهل مبدأ الثواب والعقاب.. مفيش مريض هيثم شور تاني بسبب وبدون سبب".

"تعليمات الرئيس (جمضان) إن الزيارات المفاجئة دى كلها تتصور وتتراع.. ده بيريح الناس ويزود الثقة".
"مفهوم.. مفهوم".

قال (عمرو):

"أنا برضوا ماشى فى قصة الصناعة دى ومش بأحمد.. الشباب مستحيب والإستثمارات اثلثت وبكرة الصبح هعمل معاهم قاعدة طويلة علشان افتح دماغهم وأشوف فيها أيه.. وأزاي ممكن ننفذ".
"أهم حاجة يا رجالة إن الناس تشوفكم.. ونحس بوجودكم".
الغريب صامتاً...

قال الحاج (محمد):

"جهزوا لقاعدة الأسبوع الجاى يا رجالة.. الأمور ماشية تمام.. مش عايزين نخستع!".
"تمام يا حاج (محمد)".
والغريب مازال صامتاً....

المدينة.....

الحرم الجامعى.....

وحين بدأ اليوم الدراسى مع دقائق الثامنة بدا لطلبة الجامعة بأنه
لثة أمر ما سيحدث هذا النهار.....

فى البداية تحرك طالب..اثنان ثم ازداد الجمع..تراكموا فى
الطريق..وبدأت اللافتات فى الظهور....

بعض الطلبة الواقفين كانوا أذكىاء بما يكفى كى يتراجعوا حين
رأوا طبيعة الطلبة المجتمعين ومظهرهم..البعض كان أقل ذكاء ولم
يتراجع إلا حين برزت اللافتات وعرفوا ما تحويه.....

"ربنا يستر".

ثم - فى عجلة - صعد الناس على الأعناق وأنطلق الجمع فى
تظاهر عنيف..ارتفعت اللافتات لأعلى ثم انطلق الصباح..كانوا
طلبة الاتجاهات الدينية وقد وجدوا فيما تعانیه البلد من اضطرابات
وفى مؤتمر (جمضان) فرصة لإعلان الوجود وتأكيد..هكذا
استشرى الجمع فى كل مكان يهتف بالدين..ويبلد الدين
وسياسته..هتاف رج الجامعة..ثم بنظام مدروس بدأ العدد فى
الزيادة..هكذا صارت الأيدى على القلوب وقد أدركوا أن المواجهة
الأمنية قادمة لا محالة..هذه ليست من المظاهرات إياه التى يحمل
أصحابها تصريح الأمن مسبقا..هذه مظاهرة حقيقية عنيفة تهدف إلى
المواجهة....

لكن الأمن لم يظهر مطلقا هذه المرة.. لم يفهم أحد من الطلبة ولا حتى من المتظاهرين أنفسهم لكن المظاهرة استمرت على أى حال واستمر العدد الثائر فى الزيادة.. كثيرون ظنوا أنها إجراءات (جمصان) فى إخلاء الجامعة من أمنها.. الواقع أن أمن الجامعة لم يكن قد رحل بعد لكنهم لم يكونوا على دراية بكيفية التصرف.. حالة من توتر وهو لا يدركون هل سيستمر حكم (جمصان) فهم تابعون له.. أم أنها زوبعة فئحان وسوف تعود الأمور لنصابها...

استشاروا قيادتهم التى كانت على نفس درجة الحيرة.. لكنهم لم يكونوا متحمسين للتحرك.. كان هذا التحرك أشبه بحماية لنظام (جمصان) وهو ما قد يدينهم فيما بعد.. هكذا استمرت المظاهرة لأربعة ساعات كاملة دون أن يظهر جندي أمن واحد.....

هكذا بدأت الناس تتابع من جديد وسط النظرات الذاهلة.....

مبنى المحافظة.....

ظهر نفس اليوم.....

"يعنى الأمن معملش حاجة؟"

هكذا تكلم (جمصان) وهو يعود بظهر مقعده عاقدا ساعديه أمام صدره.. كان (ضاحي) واقفا أمامه وكان يتحدث فى حماس.....

"يا ريس لو تأمر بس أنا ممكن أجييلك الجماعة اللي عمل المظاهرات دول من"

أشار له (جمصان) بكفه أن توقف وقاطعه قائلا:

"بالعكس..سيب الناس تحس بالفرق..بس أنا اللي يهمنى فى الموضوع ده نقطتين..أولا إن الناس دى لازم تكون تحت عيننا..طبعا من غير إستفزاز..شعبيتهم مش قليلة..علشان كده نمسك العصايا من النص..نديهم اللي يطعمهم..اللى مكنوش بيخدوه قبل كده بما فيه الحرية الكاملة فى التظاهر بس فى نفس الوقت ميخلوش كل حاجة..مش لازم يطمعوا..وكلوا تحت عيننا..عايزين نكسبهم فى صفنا ونحسبهم إن عدونا واحد وإن فرصتهم معنا".

صمت (ضاحي) ولم يرد....

"النقطة الثانية.."

ثم نهض (جمشان) وقد اكنسى صوته فجأة بالصراة.....

"إن جهاز الشرطة مش بيدافع عن النظام الجديد..المشكلة إن الجهاز الموجود جهاز مدرب وخبير..صعب جدا إني أقدر أخلق جهاز بديل بيتنى ليا فى ظرف أيام..علشان كده لازم جهاز الشرطة الحالى يعرف إننا أحنا حكام البلد دى..عناصرنا لازم تدخل تدريجيا جوا جهاز الشرطة..تتعلم وتتدرب لحد ما تبقى قادرة إنها تشيل المسئولية وفى نفس الوقت هتكون عيون لينا وسط الجهاز الحالى..أنا عايز شباب بلدنا اللي كان هيموت علشان يخش كلية الشرطة..اعمل إعلان بده..إحنا معندناش كلية شرطة وهو ده البديل..التدريب العملى..كده هنعمل جهاز ينتمى لينا بصدق ويمتاز بالكفاءة فى يوم من الأيام وفى نفس الوقت هنعقق للناس حاجة تفرحهم".

ثم سار نحو (ضاحي) وهو يفكر بينما الأخير صامت كالخائض....

"عايز اجتماع مع قادة جهاز الشرطة..عايزهم يتعملوا أحسن معاملة..عايز حركة ترقيات وحوافز وأجازات..بس التهديد هيبقى واضح..الشارع مصير الخاين والمقصر".

"والله يا فندم أنا رجالي جاهزة و...."

"مش دلوقت يا (ضاحي)..أفهم".

هنا تعالى صوت السماعه الداخليه...

"سيادة الرئيس..د (عبد المنعم) على التليفون".

"د (عبد المنعم)؟".

ثم استدار إلى مكتبه وضغط الزر ليمسح بالكلام...

"خليني أكلمه".

ثم تناول هاتف مكتبه بينما راح ضاحي بمصص شففيه في عدم رضا....

"آلو..أيوه يا دكتور (عبد المنعم)".

ثم...

"تلفزيون؟..تلفزيون أيه؟"

"طيب أنا هشوف بنفسى..شكرا لإتصالك"

قالها ثم أغلق الهاتف في جفاء....

"خير يا فندم؟"

نظر إليه جمصان شاردا وقد بدت عليه علامات الإستياء.....

"(ضاحي)..الحاج (محمد) أو حد من البلد كلمك أو حاول
يكلمني النهاردة؟"

"محصلش يا ريس".

قالها (ضاحي) متوجسا.....

"أمال مين وافق على حملة الإعلانات دي؟"

قالها بصوت خفيض وهو يتناول جهاز التحكم ليدير جهاز
التلفاز.....

هنا استدار (ضاحي) يشاهد غير فاهم.....

البرنجي.....!!!

مشهد لفتاة صغيرة بزي ريفي وهي حزينة..تقول لأخيها الكبير
باكية:

"يا حواس..جيه معاد التار..وشكلنا جدام الكفر بجا مش جد
إكديه..الناس بتحول علينا مش عارفين ناخد بالتار".

"والحال يا ناعسة".

تفكر ناعسة..ثم فحاة تقول بحماس...

"عليك وعلى أسلحة البرنجي".

يختفي المشهد ثم يظهر مشهد واسع للقرية.....

بمجموعة من الرجال في زى قروى.. يضحك أحدهم ويقول:
"مرة سنة ومحدش من ولاد البهايدة عرف ياخذ إبتارهم".
"ولو عمرهم هيعرفوا".

ثم يضحكون في تناغم حتى يستلقون جميعا على الأفقية.. فجأة
يظهر طفل من بعيد يصرخ وطرف الجلباب في فمه:

"يا عم (جعران).. يا عم (جعران)".

"فيه أيه يا واد مالك مسروع ليه؟؟".

يقول الولد وهو يأخذ أنفاسه بصعوبة:

"اولاد البهايدة جاين على أهنيه".

"وأنت خايف منهم عاد ولا إيه؟".

"المشكلة مش في أكديه.. المشكلة أنهم جاين ومعاهم....

أسلحة البرينجى".

"أسلحة البرينجى".

يقولها الرجل مذعورا ثم يصيح:

"الحجوا يا رجال.. الواد ابن البهايدة جاى ومعاه بندقية
البرينجى".

"بندقية البرينجى...!!!".

يقولها الناس مذعورين ثم يهربون في كل صوب..ويظهر حواس
في الأفق حاملا البندقية..ثم يبدأ في إطلاق النار..يضيف المخرج
مشهد من فيلم الملقوت لتوفير النفقات.....

في نهاية الإعلان يظهر حواس ظافرا وبجواره ناعسة....

"مع أسلحة البرينجي..محدث يجدر يعلم عليك".

وقف (جمضان) ذاهلا ربما لأول مرة منذ سنوات..شرد كالأبله
في حين هز (ضاحي) رأسه باستمتاع...

"هي كل الفقرة الاعلانية كانت كده".

قالها ثم انفجر على غير عادته.....

"كلملى الحاج (محمد) على التليفون حالا..مين قال الكلام ده
يتذاع؟"

أخرج (ضاحي) هاتفه غير فاهم.....

"ابن أبو الليل أتجنن خلاص".

مكتب رئيس مجلس الوزراء.....

يتقدم وزير الخارجية من خلال الباب فيستقبله رئيس الوزراء في
لهفة..كانت عيناه تشعان بعجزه عن الانتظار.....

"اتفضل يا سيادة الوزير".

هكذا صافحه الوزير وأسرع بالجلوس وهو يفتح سترة جلته....

"خير يا فندم".

"خير.. أنا كلمت سيادة الرئيس وهو يكلفك بزيارة مكوكية لأوروبا تحت مسمى بحث الأوضاع الاقتصادية وسبل تدعيم الاقتصاد القومي.. هتقوم في الزيارة دي بمحاولة حشد الدعم لموقفنا ضد الإرهابيين بشولاط.. في نفس الوقت هتحاول نسرب معلومات استخبارتية للعالم الغربي بإن إرهابيين شولاط ليهم علاقة بالقاعدة".

مط الوزير شفتيه في رضا.. من ثم قال:

"النهاردة هيحصل يا فندم.. وهتسمع أخبار كويسة".

"أنا قمت باتصالاتي للتمهيد لزيارتك.. بالتوفيق سيادة الوزير".

هكذا نهض الوزير يفلق سترته وعاد يصافح الوزير....

"هكون على اتصال بحضرتك يا فندم".

ثم استدار.. ثوان ثم صوت الباب.....

أنفاسه المتوترة و.....

"ربنا يستر"

مبنى المحافظة.....

كانت المرة الأولى التي يرى فيها الدكتور (عبد المنعم) (جمضان) على هذا القدر من الانفعال.. كان قد وافاه إلى مكتبه حين شاهده يتحدث غاضبا في الهاتف.. لم يكن يعرف كنه المتحدث لكنه حين سمع اسم الحاج (محمد) ضمن أنه رئيس الوزراء المزعوم.....

"يا حاج (محمد) الاعلانات دى سفه وقلة قيمة.. ونوع المنتج نفسه حتى لو هيحيب فلوس مش هيخدم قضيتنا.. لو سمحت يا حاج (محمد) الحاجات دى ترجعولى فيها متعملوش حاجة من دماغكم".

استمع قليلا ثم قال:

"ماشى يا حاج محمد.. سلام دلوقت".

قالها ثم أغلق الهاتف والضيق يشع من وجهه.....

"الحاج محمد رئيس الوزراء؟".

تنهد جمصان وقال:

"شخص محترم.. مخلص وطيب.. بس....."

قالها ثم صمت.....

"الغريب إني - أسمعلى - عمرى ما حسيت إن ليك وزا غير فى الموقف ده.. طول الوقت حاسس إنك لوحدك.. يمكن لأن الوزا كلهم بعيد عن المحافظة هنا فمحدث حاسس بوجودهم".

"أنت شايف ده كويس ولا وحش؟"

قالها فى صرامة فأجاب دكتور (عبد المنعم) بحذر:

"حسب وجهة نظرك فى ده".

صمت جمصان وشرد لحظة.. بدا وكأنه لا يريد أن يجيب لكنه فى النهاية قال:

"في الأول كان تخطيطي إنى أتواجد هنا لوحدى فترة علشان الأمور تستقر وبعدها أرجع.. وفضلت أسبهم يديروا البلد هناك تحت إشرافى فى الفترة دى.. بعدها لقيت إن موضوع نقل العاصمة ده فكرة مش عملية.. كل حاجة موجودة هنا.. والفكر كمان هنا.. دى حقيقة مقدرش أقف قصدها.. الجامعة هنا.. العلم هنا.. الأمن هنا.. وضع مركزى أتفرض من سنين ومحتاج أكثر من سنين علشان يتصلح.. ممكن إكراما لبلدى إن أحاول أعوضها سنين الجهل والإهمال وأحاول أخليها تتشاف.. ممكن حتى تبقى العاصمة الثانية".

"ومفكرتش إن مجلس وزائك لازم يكون معاك".

"صعب إن الناس فى بلدنا تقبل ده.. الأهم إنهم بيخدموا أهدافى فى البلد أكثر وأنا محتاج وجودهم هناك".

"أسمحلى.. هى بلدكم دى كام واحد بالمقارنة بمنا علشان تعمل حسابهم كده؟"

"مش هأقولك إنها بس مسألة انتماء.. لكن هأقولك إن الناس اللى فى القرى دى هى اللى لو بتحريك ممكن فعلا تحميك بحياتها.. أكثر من أى عدد من الناس فى المدن مهما كانوا راضين عنك".

هز دكتور (عبد المنعم) رأسه فى عدم اقتناع....

"طيب.. أنت هتحكم فعليا لوحذك؟"

"الدكتور كائن غي..الى تشوفه عيني وعينك أكيد أفضل من
الى هشوفوا لوحدي حتى لو كنت أحسن واحد يشوف..الكلام
ده قلته أكثر من مرة".

ثم تنهد وقد أنهكه ما قال.....

"عارف يا دكتور..مشكلة أى ثورة أو انقلاب فى العالم إن الى
يقوموا بيه رجال حرب..عمر ك سمعت عن ثورة قام بيها مفكرين
أو علماء..وطبعا محدش هيقوم بثورة علشان يرفع فساد وبعدها
يتراجع ويسيب الحكم لغيره عن رضا..مهما كان غيره
يستحق..محدش هيقوم بثورة وبعدها يقعد فى البيت وهو مرتاح
الضمير إنه أدى واجبه وفتح الطريق للأشخاص المناسبة إنها تأخذ
الفرصة..الى يقوم بالثورة منتظر ياخذ نصيبه على قد المخاطرة
والتضحيات الى دفع ثمنها..متقدرش تقول للقاعدة دى لأ..حتى لو
كانت إدارة الثورة حاجة وإدارة البلد حاجة تانية خالص..غير كده
أى ثورة محتاجة للقوة علشان تحميها..أى ثورة فى الدنيا بتقوم على
ده".

ثم واصل:

"علشان كده الأمن والسياسة أخوات..الأمن ورجاله ممكن
تلاقيهم فى أى منصب..فى حالتنا دى رجالي لازم يحسكوا كل
المناصب العليا .. ده حقهم التاريخي..القاعدة بتقول صانع النظام
هو أكثر من يخاف على النظام..أى حد من بره ممكن يكون معاك
أوضدك وممكن بيعك فى أى لحظة..غير إنهم دلوقت لا يمكن يقبلوا
بأقل من ده..هل هأجى أنا بعد السنين دى وأكثر القاعدة".

ابتسم دكتور (عبد المنعم) ولم يرد....
"يا ريت".

قالها (جمضان) ثم استلقى على كرسيه ولم يعقب...

أحد منازل المحافظة.....

نفث اللواء (حافظ) دخان سيجارته في توتر.. كانت الساعة
السابعة صباحا وكان وجهه يفضح ما به من أرق.. كان صامتا
وبجواره زميله الذى لم يكن بأقل منه فيما يعانى...

قال له العميد (زكى):

"يعنى هو اللي عايز يجتمع بينا؟".

"مش بالظبط.. هو الظاهر كده بس الحقيقة إني أنا وبعض طباط
الجيش اللي وصلنا لورا رغبتنا بالاجتماع بيه"
"طب ليه؟"

هز اللواء (حافظ) رأسه في عصبية وقال:

"ليه ايه؟.. الانقلاب فات عليه أكثر من شهر.. عجبك أوى
الحراسة اللي على بيتك وبيتى.. أحنأ أت عزلنا من مناصبنا وهما اللي
سيطروا على الجيش.. بعد العمر ده كله يتعمل معانا كده.. دا أنا
بنام وقوم بحلم باللحظة اللي هيعدمونا فيها ولا يرمونا في
المعتقل.. فلوسنا اتصادرت.. هنعيش أزاي؟؟؟".

"يا فندم بس دى...."

قاطعه غاضبا:

"أوعى تقولى خيانة.. مهما كان كلنا من وطن واحد.. الشرعية والسلطة دول كلام نسي يتغير بين يوم وليلة.. بلدنا ياما قام فيها ثورات.. كان ممكن تسميها خيانة فى يومها.. لكن النهاردة هى ثورة.. فهمنى؟.. بديل نفس الدم يبقى كل الاحتمالات موجودة".

لم يد العמיד مقتنعا لكنه قال بصوت مبجوح:

"طيب سيك من الخيانة.. مش الرهان على الناس دى خطر".

"خطر.. طبعا خطر.. لكن هى دى المعطيات اللى فى أيدي.. أفتح التلفزيون بتعهم هتلاقى الكلام واضح.. برفيات وتصريحات كلها بتقول إن أمريكا فى ضهرهم.. القيادة محولتش تتصل بينا غير مرة واحدة بعد الانقلاب بيومين.. جالى مندوب متخفى وقالى إن وزير الدفاع يطمئنا وعانزكوا على أهبة الاستعداد وإنه حابب يعرف شويه معلومات عن المنقليات.. وعدته بجمع أكبر قدر من المعلومات.. بعدها المندوب اختفى وماظهرش تانى.. حاولت اتصل بيه من ساعتها لكنه بقى بح.. فص ملح وداب".

"أول مرة أسمع من حضرتك الكلام ده".

تنهد اللواء وقال:

"علشان السرية يا سيدى.. كنت فاكر الموضوع جد.. دلوقت خلاص.. يا (زكى) اللى زينا بيعيش العمر يتمرط علشان لما يوصل للسنة ده يلاقى الاحترام والتقدير.. مش اللى أنا فيه ده".

"بس يا قندم".

"الاجتماع معاه الساعة عشرة..شوفه عمل ايه مع الشرطة
وبعدها فكر كويس..شوف الترقيات والاجازات والخوافز وأنت
تعرف إنه اشترى دماغهم ..فكر كويس".

ثم نفث الدخان كالأمواج.....

وترك قلبه يدق كفهد يعدو في العراء.....

الإعلام اليوم

جريدة الإحرام (جريدة حكومية):

"وزير الخارجية في جولة مكوكية لتدعيم العلاقات مع دول الاتحاد الأوروبي.. وفد رفيع المستوى يصاحب سيادته في رحلته التي تستغرق أسبوعاً لعدد من الدول الأوروبية".

جريدة ضيق البلعوم وهي جريدة معارضة:

"حالة من الذعر تنتاب المواطنين في العاصمة بعد انفصال شولاط والدعم الأمريكي لقادة الانقلاب.. المواطن البسيط يتسأل عن مستقبل التدخلات الأمريكية في النظام القومي.. وعلى من يكون الدور في خطة أمريكا للهيمنة والسيطرة"

"استياء عام من العجز الأمني عن محاولة تحرير شولاط".

جريدة صوت شولاط وهي جريدة جديدة حلت محل الجريدة المحلية السابقة:

"في تصريحات هامة للرئيس جمصان: أمريكا دولة صديقة والعلاقات معها علاقات متميزة.. لكنها لا تؤثر على توجهاتنا واستراتيجيتنا تجاه الوطن والمنطقة".

قناة البحيرة:

يستدير المقدم بكرسيه اتجاه الشاشة الأولى ويقول:

"أستاذ (جاد)..بصفتك من أهم رجال المال والسياسة..نحب أن نسمع وجهة نظرك حيال ما يدور في شؤلاط..وحالة الذعر التي انتابت المواطنين من جراء نجاح حالة التمرد وما يعكسه هذا على الأمن القومي"

ثم يظهر وجه منتش على الشاشة..يتسم في ثقة ويقول:
"لا تعليق..أحنا اتعودنا على تضخيم الأمور في بلادنا من ساعة ما ظهرت بعض الفضائيات اللي عايزة تاكل عيش..أنا بأكد من خلال مصدر مسئول مش هينفع أقول اسمه إن أحداث شؤلاط دي كانت مجرد تار بين عائلتين حاولت بعض العناصر الإرهابية إنها تستخدمه للقيام بعملية لإغتيال بعض العناصر الأمنية و....."
"حسنا..حسنا"

ثم يدور ويتحدث إلى الشاشة الثانية:
"أستاذ (سليمان)..حضرتك عضو ناشط بمؤسسة (الحرية..الحرية..بلدى أهيا..والله أهيا) المستقلة..أيه رأى حضرتك في مخاوف رجل الشارع العادى من أحداث شؤلاط؟"

تكلم الصوت من الشاشة الثانية وكان غاضبا:
"رأى إن الناس مبقتش حاسة بالأمان..بالثقة فى حكومتها..الناس حاسة إن أمريكا على الأبواب..الناس عايزة تعرف الحقيقة..الحقيقة..ولا شئ غير الحقيقة".

ثم سكت فجأة..هكذا اعتدل المقدم وقال:
"أستاذ سليمان..هل يوجد لديك تعليق إضافي؟"

"الحقيقة يا فندم..أهم حاجة توضيح الحقيقة!"

"شكرا جدا أستاذ سليمان"

القرية مرة أخرى.....

مسح (بسطاوى) عرق جبينه وهو يهبط بقفزة واحدة من فوق
الجرار.. فى انتظاره (سعد) وكان باش الوجه:

"مبروك عليك يا (بسطاوى) الجرار..دى حاجة زى اللوز"

"والله يا (سعد) الحاج (محمد) عمل معانا أحلى شغل..احنا
أتفقنا مع الحكومة وكل واحد معاه ورق رسمى بحدود أرضه واللى
هيزرعه فيها علشان منقفلش على بعض..وممكن فى أحر الموسم نبيع
للحكومة أو للناس احنا حريين".

"يا (بسطاوى)..دول يقولوا فيه أساتذة كبار هيمزوا على
الأراضى علشان يشرفوا بنفسهم على الإنتاج والجودة".

"ده بدل برنامج هز الأرض؟"

"حاجة زى كده".

"كلام جميل والله..العلم نور برضوه".

"مش قلتلك أنا متفائل..شوف منظر الشوارع للتنظيف المتسفلنة
وأنت تعرف الناس دى بتعمل ايه..الحاجة بتتعمل فى يوم مش فى
سنة".

تنهد (بسطاوى) وقال:

"والله أنا لسه خايف"

"خايف؟"

همس (بسطاوى) وقال:

"أصل الكلام ده مش بعادة..مش بعادة يا (سعد) يا أخويا".

متزل رئيس مجلس الوزراء....

الساعة الثانية صباحا....

يقفز رئيس الوزراء متفضا من فراشه..ينظر فى هاتفه الجوال
يهتز كالحية.....

"سيادة الوزير؟"

"وصلت بالسلامة..عال..عال..عايز معاليك تبلغنى بالأخبار
دقيقة بالدقيقة"

"لا ميهمكش حتى لو خمسة الفجر..المهم طمنى..الاستقبال
عامل ازاي؟"

"تمام تمام..يا رب تكمل على خير".

"مع ألف سلامة..مع السلامة"

ثم أغلق هاتفه وألقط نفسا عميقا.....

ثم رفع رأسه للسماء وقال فى خشوع:

"يا رب".

قاعة المؤتمرات....

مبنى المحافظة القديمة.....

غادر (جمضان) قاعة الاجتماعات مسرعا وبجواره الدكتور (عبد المنعم).. كانا يتجهان نحو مكتب الأول بينما تسربت جماعة من رجال الجيش في ثياب عسكرية مغادرة القاعة من خلفه وعلى وجوههم الصارمة تعابير التجهم.....

كان الدكتور (عبد المنعم) البادئ بالحديث وقال هامسا:

"يا ريس لازم تكون حذر.. الناس دى وقت ما حد هيهجمك هيكونوا معاه.. حتى لو عاشوا معاك فى ظروف أحسن لأنهم حاسين إن ده انقلاب هزيل ومسيروه هيفشل.. وساعتها ه يخافوا من تهمة الخيانة.. يعنى طول ما أنت قوى هيكونوا معاك لكن لو فى يوم وقعت هيحولوا يثبتوا إخلاصهم على حسابك".

قال (جمضان) فى حزم:

"للأسف أنا محتجهم".

"مخاطرة".

"أنا بأوزن الأمور يا (عبد المنعم).. أنا مش خايف من النهاردة.. النهاردة فى حد بيحمينى.. على الأقل الناس متصورة كده.. بكرة اللي بيحميك ممكن يلاقى مصلحته مع غيرك.. ممكن تلاقى نفسك مضطر تدخل فى سباق تنازلات مع غيرك وأمريكا هى اللي كسيانة.. أنا مش عايز اللحظة دى".

"بس هتبقى كارثة إنك تلاقى جيشك بينقلب ضدك..صعب دولة متديش لجيشها الأمان".

"تحوفى مش من العسكرى"..

أجاب (جمضان) وهو يفتح باب مكتبه:

"العسكرى بيطيع الأمر ومينفعش تتهمه بالخيانة لأنه تحت طوع القائد..العسكرى ده كمان أنا أعرف أكسبه كويس..الخوف الحقيقى من القادة اللي يفكروا ويعملوا لأفعالهم ألف حساب".
"مختلفناش".

"بس أنا محتجلهم..محتاج خيرهم..أنا عندى فى البلد كوادر كثير..متعلمين ومنهم خريجي كليات عسكرية..بس أنا مقدرش أعتمد عليهم دلوقت..ده أمن بلد مهددة فى أى لحظة..المطلوب دلوقت إني أسيلهم الأمور فى فترة الأمان..رجالتنا هيكون وسطهم..بيتعلموا منهم وكمان بيكونوا عيون عليهم..زى ماعملنا مع الشرطة بالظبط..بالتدريج هبتدى أتخلص من الكوادر القديمة وأزرع الكفاءات من رجالتنا فى مناصب القيادة لحد ما أضمن الولاء التام..ساعتها يمكن تكون نهاية الناس دى فى المعتقل..محدث عارف".

حدق فيه د (عبد المنعم) فابتسم (جمضان) ابتسامة قاسية وقال:

"متخفش يا د (عبد المنعم)..الكلام ده على الجيش بس".

قالها فى نفس اللحظة التى اندفع فيها (ضاحى) بجسده الضخم إلى داخل المكتب..وكان متحمسا....

"تمام يا ريس..(الغريب) يقول لسعادتك إن كل شباب البلد
اللى عايزين يخدموا فى الجيش هيكونوا عندك بكرة الصبح".
"على خيرة الله".

ثم استدرك:

"دخلى الاثنين اللى بره دول حالا".
"أمرك".

رفع د (عبد المنعم) رأسه متسائلا لكن (جمضان) لم يعطه الفرصة
ليسأل....

"دول رئيس التلفزيون ورئيس تحرير جريدة صوت شؤلاط".
قالها والجسدان المرتجفان يندفعان إلى داخل المكتب.....
"أهلا بحضرتك يا ريس..أحنا مش عارفين...."
"بس بس بس..هدوا نفسكم شوية".
قالها باسمما....

"أنتوا فاكروني ايه..سفاح؟..ملككم مفروعين كده"
"العفو يا فندم".

أشار لهما بالجلوس ثم أشار بيده علامة الكوب ل(ضاحى) الذى
أغلق الباب خلفه.....

كانا مازالا يرتجفان.....

"بصوا يا رجالة"..
كانا مازالا يرتجفان.....

يقول (جمضان)....

"أنا شاكر جدا للمجهود المخلص والواضح اللي ظهر في الفترة اللي جاية وأوعدكم بدعمه ماديا في القريب العاجل".

"بس أنا حابب أشوف من حضرتكم الفترة الجاية طفرة إعلامية..عايزكوا تجذبوا المشاهد العادي بأكبر قدر من المتعة..عايزوا يحب يشوفكوا ويسمعكوا..الأهم إني عايز الإعلام الإخباري يكون متوازن..عايز اللي بيتقال في الشارع هو اللي يظهر على الشاشة وفي الجرنال مهما كان ضدنا..إنقلوا الأحداث وبس..الناس هتعرف الحقيقة بأي شكل فأحب أنها تؤمن إننا أحنأ اللي هنقولها الحقيقة..عايز الناس تثق فيكوا وفينا علشان يوم ما نتكلم وغيرنا يتكلم الناس تصدقنا أحنأ..مش عايزين نوصل الناس إنها تعرف الحقيقة من غيرنا مهما كان وتتصور إن اللي بنقوله كله كدب وتلفيق"

ثم استدار إلى د (عبد المنعم).....

"د (عبد المنعم)..يا ريت تجتمع بيهم علشان توصلهم إल्ली أنا أقصده بصورة مفصلة".

"تمام يا ريس".

بينما في أسفل المبنى وقف اللواء (حافظ) منتظرا عبور الشارع..يجواره العميد (زكى) وكان يقول:

"أنا مش مطمئن".

تهدد اللواء (حافظ) وقال:

"مفيش حل تانى".

ثم أشاح بوجهه بعيدا وعاد يتابع الطريق....

القرية....

دوار العمدة....

نهار اليوم التالى....

تثاءب (أبو الليل) وهو يتقدم إلى داخل البهو الكبير للدار.. كان الحاج (محمد) جالسا عند نهاية القاعة ومعه بقية المجلس فارتفعت أنظارهم دفعة واحدة لتستقبل القادم الجديد....

"جرا أيه يا حاج محمد.. كل يوم اجتماعات اجتماعات.. ثم دى الساعة سابعة الصبح"

"يا (أبو الليل) خلى بالك طويل.. أنت عارف إن اليومين دول أهم من أى وقت تانى.. الصبر".

هكذا أنضم (أبو الليل) إلى الجالسين ولم يعلق.....

"يا أخونا أحنا كنا عايزين نراجع آخر الانجازات اللى حققناها.. فى بعض الشكاوى برضوه من مجموعة من المواطنين.. عايزين نراجع المواضيع دى كلها"

هكذا قفز (عمرو) وقد اجتاحه الجنون:

"شكاوى؟.. شكاوى مين؟.. شكاوى ميسيسيين؟.. دا أحنا دلعناهم ولبسناهم ونضفناهم"

"يا (عمرو)"

"شكاوى ميسسين؟..دا أنا لحد دلوقت صرفت على عشرين مشروع ومصنع يشتغلوا فيه..كل اللي كان عنده مشروع ينفع وقفت جانبه لحد متخرب بيتي".

"يا (عمرو) مش كده..الناس كلها بتتفلك في الشوارع..ما احنا كلنا شايفين؟"

"بجد؟"

هكذا هدا بغتة وقد انتشى وجهه بابتسامة راضية..قال الحاج (محمد):

"الشكاوى دي حاجات بسيطة..واحنا محتجين لها علشان نوجه جهودنا صح..هم أدري بمشاكلهم برضه"
ثم واصل:

"وبخصوص الخطوات والانجازات احنا فعلا لازم نذكر بمجهود (عمرو أبو الليل)..الناس كلها بتتكلم والجرايد والتلفزيون شغال صبح وليل عليها".
"تمام والله".

"أحنا بس عايزين همتك في الانتاج يا (عمرو)..تتابع مع الشباب لحد ما مشروعاتهم تنجح..عايزين نشوف نتيجة المشروعات دي ودخلها اللي هيسند البلد..هو دا النجاح الحقيقي".
"عداك العيب يا حاج (محمد)".

"نفس الكلام بالنسبة لوزارة الزراعة اللي تخصنى..توزيع الأراضى على المواطنين تم بالفعل..وأنا كلمت الرئيس (جمضان) على الخبرا اللي جاين من الجامعة وعرفت إنهم جاين فى ظرف يومين علشان يشوفوا طبيعة التربة ويخصصوا الأراضى حسب طبيعتها علشان تتحد الأصناف اللي هتزرع فيها..طبعا خريجين كلية الزراعة أتوزع عليهم المساحة الأكبر وبعدهم الدبلومات وكل واحد وعلامه بعد كده..الناس على إتصال بينا علشان نتابع معاهم الأرض فصل فصل".

قال (أبو هاشم):

"والله يا حاج محمد ربنا يخليك للبلد".

"ويخليك ليها يا (أبو هاشم)..وأخبار الصحة أيه؟".

"والله أنا كان عجبني تفكير الرئيس جمضان بخصوص موضوع الوحدات الصحية دى..أنا مریت على الوحدات الصحية بنفسى..الغير مؤهل منها هيتم قفله بالضبة والمفتاح لأن ضررها أكثر من نفعها والناس بتتعامل معاها على إنها بتقدم خدمة بجد وده مش حقيقى..ده غير الفلوس اللي بتترمى فيها على دكاترة وحكيما وعمال أساميهم مكتوبة فى الدفاتر وبس..قصاد كده الوحدات شبه المؤهلة هيتم تطويرها علشان تبقى مستشفيات عادية والعادية علشان تبقى مستشفيات متخصصة وده أكيد هيقلل الشغل على المستشفى الجامعى..هناظر قوانين تحكم تحويل المرضى حسب خطورة حالتهم للمستشفيات بحسب مستوى المستشفى وتخصصها وهيكون فيه رقابة لأى تحويل ملهوش لازمة أو لحالات خطيرة

متمش تحويلها علشان الكل يشتغل والعيانين متدهدلس..الأهم إننا
هنمرر دكاترة الصحة بالتناوب للتدريب في الجامعة ودكاترة الجامعة
للعمل بالتناوب في بعض مستشفيات الصحة للإستفادة من
خيراتهم".

ثم تنهد مرهقا وقال:

"وشكرا".

هز الحاج (محمد) في رضا ممزوج بالشك..ربما من عدم التوقع!!!

"تمام يا حاج".

ثم استدار الحاج (محمد) إلى (الغريب) الذي لم يكن سعيدا
جدا...

"مالك يا (غريب)؟..شكل في حاجة مش عجبك؟"

رفع الغريب حاجبيه ببطء ثم أرخاهم وهو يقول ضاغطا على
زناد كلامه:

"العفو يا حاج بس لا مؤاخذه يعني كان عندي سؤال"

"خير يا (غريب)"

تراجع الغريب بظهره على كرسيه وقال:

"هو عم (جمضان) فين؟..مش ناوى يرجع ولا ايه؟..ولا
أستحلى القاعدة في وسط البندر والشوارع والأسفلت والبنات
الحلوة وسبنا هنا نشله الشغل ونبيضله وشه".

رفع الحاج (محمد) رأسه ببطء وقد باغته ما قيل..نظر حوله
فرأى العيون قد تراصت عليه كفرقة الإعدام.....
حرك شفثيه ثم قرر ألا يفعل..صمت..ولم يتكلم.....

مقر المحافظة....

صباح نفس اليوم.....

(جمضان) جالسا خلف مكتبه وقد بدا الارهاق واضحا على
ملامح وجهه..كان منهمكا في مراجعة الأوراق المزدحمة على سطح
مكتبه..فكر لبرهة وحرك نظراته لمكتبه من ثم أعادها لرجل قوى
يقف في مواجهته..كان يحمل رتبة.....

"شكرا لإهتمامك سيادة العقيد"

ثم أشار له بالإنصراف قبل أن يجد هذا الأخير فرصة
للتسائل.....

"ممكن تتفضل".

"شكرا يا فندم"

قالها ثم استدار لينصرف وعلامات العجب على وجهه لا يكاد
يكتُمها..عند طرف الغرفة كان (ضاحي) ولم يكن بأقل منه
دهشة....

"مش فاهم يا ريس..الظابط حايلك تقرير بالمظاهرة الجديدة
بتاعت إمبراح..دول هما بتعوا المظاهرة الأولانية..برضوا
الجماعات الدينية..حضرتك ما مرتش بحاجة ليه؟"

هز (جمضان) رأسه المنهك بلا معنى ثم رفع عيناه نحو
(ضاحي)....

"(ضاحي)"

"أفندم يا ريس"

"عايز أقابل رؤساء الجماعات والأحزاب دي؟"

"ليه يا ريس؟"

"تتكلم"

"يا ريس كده هيفتكروا إنك خايف منهم"

تراجع (جمضان) مريحا جسده على كرسيه وهو يقول:

"بالعكس يا (ضاحي).. أي محاولات عنيفة هتقابل بمظاهرات
أعنف.. الرد بتاعنا هو اللي بيحمسهم أكثر.. وفي الآخر أكيد
هنتكلم.. مش هنحاربهم للأبد.. أحنا مش عايزين نفتح جبهات يا
(ضاحي).. وبديل كده هنتكلم بلاش نصعد الموقف لحد ما
الناس كلها تتفرج.. وبعدها يرضوا نخضع.. منظرنا هيبقى مش أد
كده".

"وأحنا نخضع ليه أصلا يا ريس؟"

"لأنهم قوّة.. وبيلعبوا من غير خوف لأن معندهم حاجة
يخسروها.. لكن أنت عندك.. والقوة دي لو مبقتش معاك هتبقى مع
غيرك.. ليه منجولش نكسبهم.. الموضوع سهل.. أي حاجة هترضيهم
لأنهم أصلا مبيملكوش حاجة".

هز (ضاحي) رأسه وقد انفصلت تماما عن الحوار...

"لكن يا (ضاحي) لما يبقى معاهم حاجة ولو بسيطة ساعتها هيخافوا عليها"

هز (ضاحي) رأسه مجددا فاتسعت ابتسامته (جمضان).. ابتسامته شاركتها شعور عابر بالمرارة.....

"المهم يا (ضاحي)".

"أيوه يا ريس".

"المهم المظاهرات اتذاعت في التلفزيون والصور انتشرت ولا
؟"

"الحقيقة يا ريس.."

"ايه؟.. ما انتشرت؟"

"لا يا فندم بصراحة كده انتشرت.. أنا كنت هبلغ حضر..."

قاطعه (جمضان) بإشارة من يده...

"أنا بتأكد إن الناس دي نفذت أوامري.. كده تمام"

حذق فيه (ضاحي) طويلا...

"اللى تشوفه سعادتك"

"جهزلى الاجتماع اللى قتللك عليه.. تمام؟"

"أمرك يا ريس"

"وعايز أعرف أخبار تقارير الجامعة أيه؟..عايز تقارير رجالتنا
وتقارير الرجال اللي بيرقبوا رجالتنا"
"مفهوم يا ريس"

هكذا استرخى (جمضان) فى كرسية أكثر..وقال:
"على بركة الله"

مكتب رئيس مجلس الوزراء.....
عصر نفس اليوم.....

رئيس الوزراء متحركا أمام مكتبه..فى يده هاتفه الخلوى وحالة
من الاستياء وعدم الرضا تشع من وجهه العابس وكلماته
الغاضبة..حالة صارت تلازمه كثيرا هذه الأيام.....
"يعنى أيه يا سيادة الوزير؟"

"يعنى يا فندم أنا مش متفائل بنتيجة جولتى فى أوروبا..الكلام فيه
حذر واضح وعامل زى تصريحات التلفزيون"
"أزاي يعنى؟"

"يعنى كله من نظام: أحنا بنراقب الموقف، اتجاهات الناس دى
مش واضحة المعالم ،فى انتظار معرفة نواياهم فى المنطقة ، فى انتظار
معرفة موقفهم تجاه حقوق الإنسان..مع وعد بدعمنا فى حالة
حدوث أى تجاوزات!!"

"يعنى مكنش ليهم رأى تجاه موقف أمريكا؟"

"هم شايفين إن موقف أمريكا نفسه مش واضح..وبالتالى
هتحدد حاجات كثير بناء على الموقف الأمريكى".
"حاجات أيه؟"

"يا فندم ده تضيع وقت..مفيش فائدة..ده كان ناقص يقولوا
متعملوش حاجة غير بأمرنا..هما نفسهم مش عارفين يتصرفوا أزاى
وبيفضلوا الانتظار"
"وده موقف كل الدول؟"

"يا فندم دول زى ما يكونوا مذاكرين مع بعض..كله مشغل
نغمت التروى..التروى".
"التروى؟؟"

قالها ثم انكمش وجهه حتى شارف التسعين من العمر..هوت
ذراعه حاملة الهاتف وأرتاح رأسه على النافذة المجاورة....
وجد نفسه يهمس من بين أنفاسه المتحشجة..لكن كلامه لم
يكن مسموعا ربما لنفسه..شعور قاتل بالعجز.....
البحار البارد يتكاثف على النافذة مع أنفاسه..صوته يظهر من
جديد ولكن أكثر وضوحا.....
"يا رب".

مقر المحافظة.....
صباح اليوم التالى.....

الممر الطويل بالطابق الثاني..كان (جمضان) في أول الممر وإلى
جواره رجلان لا يخفى على أحد من الناس انتماءهم الديني
الواضح..كان الوقت مبكرا للغاية وكان الثلاثة يسرون بتؤدة على
الممر فيما بدا أنهم يلقون لبعضهم أطراف حديث هامس.....

"مش فاهم حضرتك عايز توصل لأيه؟"

هكذا واصل أحدهما الحديث.....

"عايز أوصلكم إن المظاهرات وسيلة..مش هدف في حد
ذاته..الناس هتشوفكوا أه لكن وبعدين..مش كل متعوزوا حاجة
تزلوا الشباب في الجامعة وفي الشوارع علشان يتظاهروا ويتكلم
بلسنكم..الحوار هو الحل الأفضل..طبعا بسياسة المعقول"

"طلبنا معروفة من قرون يا سيد (جمضان)"

"وأنا مش فانوس سحري يحقق طلباتكم في غمضة عين..أنا
رئيس دولة بيحاول يخلق جو من الحرية في بلده"
"قصداك أيه؟"

"إنتوا بتتكلموا عن قيام دولة إسلامية والعمل بالدستور
الديني..كلام جميل..بس أنا كرئيس مش منتظر مني مهما بلغت بيا
ديموقراطية إني أسيلك الحكم وأمشي..أسمحلي دا هبل مش
ديموقراطية"

"آمال طلبات أيه وحوار ايه اللي أنت عايز تكلمنا فيه؟"

"العقل والمنطق..أنتم عايزين تحكموا..وأنا عايز أحكم..وغيري
عايز وده حق الكل..خلاص..زى ما وعدتكم قبل كده هيكون

ليكم حزب زى غيركم..ومنه تتحركوا.ممتهى الشرعية..ممكن فى
يوم توصلوا..بس بالقانون"
"ومين يضمن تنفيذ وعدك؟"

"من بكرة هيتم السماح ليكم بإشهار الحزب"
"بس هتفضل أوراق اللعبة فى إيدك..ممكن فى لحظة تقلب علينا
وتلغى وجود الحزب ويمكن كمان ترمينا فى السجن".

"كنت عملت ده من دلوقت.. أنا هتكلم معاك بوضوح
أكثر..اللعبة موزونة..فرصتكم الوحيدة فى الحرية وممكن فى الوصول
للحكم هى من خلال وجودى هنا لأنى الوحيد إالى هعرض عليكم
العرض ده..يعنى أنتوا محتاجين وجودى حتى لو كان حزبكم منافس
للحزب اللى أنا هترأسه..بالنسبى الموضح مشابه..أنا كمان محتاج
دعمكم وتأثيركم فى رأى العام فى دعمى ودعم وجودى فى
السلطة خاصة بين الناس..يبقى كده المصلحة أتوزنت".

وقف أحد الرجلين بغتة ومعه وقف الجمع..استدار الرجل
لحمضان وعلى وجهه ملامح المشتت....

"هو أنت عندك شك فى مدى قوتنا وشعبيتنا؟"

"أكيد لا"

"آمال مش خايف إزاي على كرسيك..أحنا كثير..وشعبيتنا
مش قليلة..وممكن بالانتخابات نكتسح ونوصل بأسرع مما تتخيل"
نظر إليه (حمضان) ثم ابتسم....

"لو منجحتش وأنا على كرسى السلطة ومعايا كل المزايا
لصلاحيات اللي تخلى شعبي يثق فيا يبقى خلاص"
ثم ابتسم واستطرد:

"حلال عليكم"

تلاشى تعبير التحدى لتحل محله نظرات الدهشة.. ثم وقف
جمضان) وقفة مباغتة وتغير تعبير وجهه إلى الصرامة قائلا:
"اتفاق؟"

هكذا فتح د (عبد المنعم) باب المصعد مغادرا أياه حين لمح
جمضان) في طرف الممر وهو يصافح رجلين كان قد تعرفهما على
لقور.. وحين بلغ (جمضان) كانا قد انصرفا بالفعل.....
"عملتها يا ريس؟"

"متخفش يا (عبد المنعم).. الناس دى مش فاهمة.. الناس دى
تفقد نص قوته لما تتحط بره دائرة الإضطهاد.. وتتحول من
صحاب قضية لرجال سياسة.. أنا ممكن ألهم فى المعتقلات وأرتاح
وأحافظ على كرسيا واللى هيدفع التمن هيكون البلد مش أنا.. لكن
أنا اخترت الطريق الأصعب.. أنا هأهزمهم على أرض
الملعب.. والناس هم الجمهور".

ابتسم (عبد المنعم) وهو يتأمل (جمضان).. وسؤال ملح يتلاعب
برأسه.....

لكنه لم يفكر أكثر.....

القرية.....

دوار العمدة.....

الحاج (محمد) يغادر غرفته الواسعة حاملا هاتفه المحمول.. يتحرك نحو ساحة الدار مترنحا في حالة هي إلى النوم أقرب منها إلى اليقظة.. كان ممتنا لأقرب مقعد صادفه فألقى بجسده المتقل عليه والهاتف ما يزال على أذنه.. لحظات ثم قال:
"كله تمام يا ريس"

ثم.....

"أيوه يا ريس.. الناس مبسوطه وكل حاجة تمام.. فعلا زى ما قلت.. إمبراح كان المؤتمر الشعى"
"الشكاوى كلها يا ريس بخصوص المياه والمجارى وحاجات كده"

"تمام يا ريس.. أبعتلك فاكس بكل المشاكل دى.. أنا فهمت الناس زى ما قلت إن الخبراء الأجانب.. أقصد اللي جاين من الجامعة هينظروا مشاكلهم ويحطولها حلول".

"مفهوم يا ريس.. الإنجازات يتمشى خطوة خطوة علشان الناس تحس بيها.. بس أيه موضوع النوادي والمحلات الحديدية اللي حضرتك عايز تعملها دى".

"طبعا الناس مش هتصدق.. بس أنا بسأل هنجيب حق الكلام ده كلوه منين؟.. أحنا فلسنا"

"هتصرف أزاى بس يا ريس"

"فلوس كثير؟؟".

"خلاص يا ريس اللي تشوفه.. كله بوقته تمام".

"في حفظ الله يا ريس".

ثم أغلق هاتفه وهو يتنهد.. كان يكره ألا يفهم وهو أمر لم يعتده
نذ بدأت هذه الهوجة المجنونة.. لكنه كذلك لم يكن قادرا على
لتصرف.. كانت مفاتيح اللعبة كلها في يد (جمضان) وكان هو
لوحيد القادر على التفكير والتحرك.....

"ده (جمضان) يا حاج؟"

أجفل الحاج (محمد) ثم استدار إلى غرفته.. هكذا رأى وجه
(هانة) الممتلئ في مواجهته.. كانت قد استيقظت بدورها على
صوت حنجرتة القوى وقررت أن تبدأ يومها....
أخذ نفسا ثم قال:

"أيوه يا هانة"

"وحضرته مش ناوى يشرفنا ولا خلاص شال أيده من الحكاية
يسابك أنت للشقا والبهذلة".

كانت تقديمتها مثيرة للأعصاب.. هكذا وجد نفسه وقد انفجر
نيتها على غير عادته...

"جرا أيه يا هانة.. أيه الكلام الغريب ده؟.. ما الراجل شغال
بطلعة عينه زينا بالظبط.. ورغم شغله اللي بالكوم هناك بيتابع معانا
لحظة بلحظة.. هيموت نفسه يعني".

بدا وكأنها كانت جاهزة لهذا النوع من الجدل...

"والله يا حاج شكل الراجل اللي أسمه الغريب ده كان عنده حق..هو خلاص ربح نفسه في النظافة والوجاهة وأشى تلفزيون النهاردة وأشى جرايد بكرة..وسابك أنت والرجالة هنا تكحوا التراب..دا حتى هو قاعد هناك محمي بعساكر والطباط وأنتوا يا غلاية متساين في الشارع مفيش حواليكم غير كام عسكري وغفير عمى..هو يلهمط القشطة ويسبكوا أنتوا تشيلوا الطين..أنا ياما قتللك أنوا واخذ تعبك وعرقك وعامل بيهم كبير".

ولأنه لم يكن قادرا على هذا النوع من الجدل ولأنه كان - حتما - غارقا في أفكاره السوداء التي لا تنتهى لم يكن بمقدوره إلا أن يوقف فيضان كلامها بنظرة حاول أن يجعلها صارمة..ثم هب واقفنا.....

"أنتى أيه يا ولية؟..أهمدى"

قالها ثم استدار..وتركها وانصرف.....

مبنى المحافظة.....

(جمضان) أمام مرآة مكتبه..يضع اللمسات الأخيرة على حلته الأنيقة بينما وقف (ضاحي) كقطعة أثاث بجوار الباب..لم يتكلم حتى انتهى (جمضان) واستدار إليه قائلا:

"وصلوا يا (ضاحي)".

"وصلوا يا ريس".

تناول (جمضان) الملف الذى يحمل أسماء المختارين من الأساتذة
لمجلس الإستشارى..راجعها بنظرة سريعة ثم أغلق الملف ونظر
ضاحى:

"كلهم حضروا".

"من ساعة يا ريس".

ثم تنحى (ضاحى) فنظر إليه (جمضان) بمعنى الاستفهام...

"سؤال بس يا ريس"

"أسأل يا (ضاحى)"

انفجرت أسارير (ضاحى) وقد قرر أن يحسم ترده:

"يا ريس أنا كنت فاكرك هتختار د (عبد المنعم) أول

واحد..لقيتك مختاره مساعد مستشار..يعنى حتى مش مستشار"

ابتسم (جمضان) فى خيلاء ورضا..وضع يده على كتف

(ضاحى) ثم سار به خطوتين للأمام....

"بص يا (ضاحى)..بالنسبة للدكتور (عبد المنعم) أنا فهِمته إن ده

ضرورى علشان الديمقراطية..علشان ميتألش إني اخترت د (عبد

المنعم) بصورة استثنائية مش بمعايير محددة زى باقى الأساتذة لأنه

مقرب لي..بالتالى هيكون فى المكان ده بصورة مؤقتة لحين مرور

وقت مناسب يقنع الناس بتصعيده..ده هيدى ثقة أكثر فى

النظام..أما بقى السبب الحقيقى فهو إني سواء حببت ولا محبتش

الناس كلها حسيت إن د (عبد المنعم) ليه وضع ومكانة خاصة هنا

فى مؤسسة الرئاسة..مش من مصلحتى إني كمان أحطه فى مكان

ملوش سقف..ده هيجلى الناس تخاف منه أكثر وتحاول تتقرب
له..شوية بشوية هيقى مركز من مراكز القوى ومش هقدر أسيطر
عليه".

وقف (ضاحي) لوهلة محدقا في وجه (جمضان) الذي ضحك
وقال:

"مش مهم يا (ضاحي)..مش مهم"

ثم ربت على كتفه وقال:

"المهم أخبار الأحزاب أيه؟"

"زى ما حضرتك أمرت كنت مع الدكتور (عبد المنعم) النهاردة
وخلصنا الإجراءات القانونية بتاعت الحزب بتاع الجماعة أياهم وفي
حضورهم زى ما حضرتك أمرت..وبرضوا إجراءات الحزب
بتاعتنا..وطبعا ضمينا كل الأساتذة اللي حضرين الاجتماع النهاردة
للحزب".

"ممتاز"

"بس يا فندم..أنا ليه عندك طلب"

"خير يا (ضاحي)؟"

"موضوع الأحزاب ده؟..عايزك تقعد معايا قاعدة وتفهمهولى
بالراحة"

"ضرورى يا (ضاحي)..بس دلوقت نحضر الاجتماع وبعدها ربنا
يسهلها"

"حاجة أخيرة يا ريس"

"خير؟"

"التقارير السرية اللى جاية من البلد..الناس كلها بتتهف ليكم
كل حاجة عال..بس الناس كلها بتعتبر إن الحاج (محمد) هو الكل
في الكل..ونسيوك خالص يا ريس"

ابتلع (جمضان) قبلة غيظه في عشر ثانية وأمسك بلجام هدوئه
من جديد قبل أن تكشف ملامحه ما دار بعقله..حاول أن يبدو عاقلا
وقال:

"عارف يا (ضاحي)..دا مش ذنب الحاج (محمد)..الراجل
شايف شغله ومش بيعاول يعمل حاجة لنفسه..دى غلطتى من
الأساس..خلينا نحضر الاجتماع الأول وبعديها تتفاهم"
ثم تقدمه وفتح الباب..وسار بخطوات واسعة حتى وصل إلى
مدخل القاعة..هكذا فتح رجل الأمن بابها في سرعة ليدلف إليها
(جمضان) بإعتداد في حين وقف الجمع ليستقبلوه بحرارة.....
الإشارة بالجلوس ثم...

"أكيد يشرفنى إن أكون معاكم..وأحب أعرفكم إنى هنا علشان
عمل تغيير..ومن اللحظة الأولى..أحب أطرح مشاكل الدولة اللى
عندى واللى لخصتها من أراء المواطنين وشباب الجامعات علشان
سمع منكم حلول غير تقليدية..وأحب أعرفكم إنكم هنا في مرتبة
مجلس للوزراء".

ثم نظر لضاحي بحذر وأردف:

"مع كل التقدير لوجود مجلس حالى قادر وفاعل للوزراء"

ثم نظر إلى د (عبد المنعم) والذي جلس في أحد أركان
القاعة.. هكذا هز الأخير رأسه في فهم ولم يتنفس...

القرية....

بيت (الغريب)...

يقف هذا الأخير على سطح بيته وبجواره رجل خبيث
الشكل.. كان غائضا في جلبابه متلفحا بشاربه وقد مال على الغريب
قائلا:

"كله تمام يا كبير.. أقدر أقلك دلوقت إن رجالتنا مزروعين في
كل حنة في البلد.. زى ما أمرت.. دبة النملة هتكون عندك".
"أنا عايز دبة النملة في كل بيت فيك يا بلد.. حتى بيوت الوزرا
ذات نفسهم.. فهمنى يا (سليمان)"
"فهمك يا كبير.. بس من غير مؤاخذه كده يا كبير.. ليه دا
كله؟"

استدار له الغريب لتغطى الظلال وجهه عن وجه الشمس.. عقد
حاجبيه فعاد مخيفا كالأيام الخوالي.. هكذا ارتجف (سليمان) لوهلة
وقد خشى ألا يكون سؤاله في محله....

"لأن ده الصبح يا (سليمان).. البلد دى محتاجة راجل بجد علشان
يحميها.. بس محدش فاهم.. جمصان لسه عيل صغير.. وأهو ساب البلد
ومشى.. والحاج (محمد) رجل طيب.. الشغلانة دى يلزمها حاجات

هم بكثير من الطيبة..أنا بأمنهم وأمن نفسى وبحافظ على اللى أحنا
مملناه..أنا مش ناوى أرجع الجبل تانى يا (سليمان) .

"بعد الشر يا كبير"

"ييقى تسمع كلامى..أنا هعرف أمشى البلد دى بطريقى"

ثم استدار إلى الشمس من جديد وقال:

"وهاعرف أحد حقى".

القرية.....

دوار العمدة....

كان الحاج (محمد) جالسا على كرسية مبلى الأفكار..وبجواره
جلس (أبو هاشم) وعلى وجهه إمارات تفكير عاجز..كانا فى
ساحة المترل وكان النهار قد انتصف....

"مش فاهم يا حاج (محمد)".

"زى ما بقولك كده..الريس (جمضان) أمر نوقف كل حاجة
لدة أسبوع..نوقف كل المشاريع"

"ليه؟..مسألة فلوس يعنى؟..أحنا لسه مفلسناش..ثم إنه سبق

وقال منشلش هم الفلوس وإن أحنا نكمل وهو هيتصرف".

تنهد الحاج (محمد) وقال:

"مش مسألة فلوس يا (أبو هاشم)..لو فلوس كان قال"

"آمال مسألة ايه؟"

صمت الحاج (محمد) كاظما ضيقه...

"والله ما أنا عارف"

"ده أكيد اتجنن.. الناس كده هتاكلنا أكل.. بعد ما عشمناهم".

"أهدى يا (أبو هاشم) ميصحش كده.. أنا هأعرف أهدى
الناس.. ثم إن (جمضان) قال دى موهلة أسبوع مش أكثر"

ظفر (أبو هاشم) أنفاسا حارقة وقد هم بالإنصراف...

"والله ما أنا عارف أخرة (جمضان) ده أيه.. هو فى دنيا وأحنا فى
دنيا تانية خالص".

تنهد الحاج (محمد) قائلا:

"نصير يا (أبو هاشم)".

قالها ثم نظر إلى السقف بلا معنى.. ثوان ثم أردف:

"نصير"

الإعلام اليوم

جريدة الإجرام (جريدة حكومية):

"عودة وزير الخارجية إلى أرض الوطن بعد جولة ناجحة لعدد من دول الاتحاد الأوروبي".

جريدة ضيق البلعوم وهي جريدة معارضة:

"بعد نجاح انقلاب شؤلاط.. استنفارات أمنية خوفا من تكرار الموقف في أنحاء أخرى من الجمهورية"

جريدة صوت شؤلاط وهي جريدة جديدة حلت محل الجريدة المحلية السابقة:

"مشروعات متميزة وخطوات جادة في طريق الإعمار بشؤلاط.. إعلان قيام الأحزاب الجديدة في وجود مساحة من الحرية لإقامة الأحزاب الدينية".

قناة البحيرة:

يستدير المقدم بكرسيه اتجاه الشاشة الأولى ويقول:

"أستاذ (منصور).. مما إنك آخر من تبقى ممن لم نقم باستضافتهم بخصوص أحداث شؤلاط.. ما رأيك في هذه الأحداث؟"

ثم يظهر الوجه العابس على الشاشة....

"هاقول أيه.. الناس كلها شايقة الإنجازات اللي مالية البلد وبتحاول تزقل بالطوب.. يا جماعة ممكن تكون فيه شوية مشاكل

أمنية في شؤلاط بس الموضوع عمره ميوصل للى بيتقال ده.. هو فيلم
أمريكانى ولا....."
"حسنا.. حسنا"

ثم يدور ويتحدث إلى الشاشة الثانية:
"أستاذ (عادل).. بصفة حضرتك رئيس حزب (مفيش.. ولا حتى
القرايش).. ما هو موقف حضرتك من أحداث شؤلاط وكيف ترى
مستقبل الموقف الأمنى الخطير هناك؟"

تكلم الصوت من الشاشة الثانية وكان عابسا أيضا:
"أنا فى الواقع مش حابب سياسة التعقيم الساذجة واللى أنتهت
موضتها من السبعينات واللى بتحاول الحكومة تستخدمها لحد
دلوقت.. العالم كله شاف الحقيقة والموضوع النهاردة مستحيل
السيطرة عليه.. لازم نعرف.. فيه كارثة بتهدد مستقبل البلد وفيه
فشل حكومى فى التعامل معاها.. واضح إن علاقتنا بأمريكا مش
متميزة زى ما كنا بنقول!!".

ثم سكت.. هكذا اعتدل المقدم وقال:
"أستاذ (عادل).. هل يوجد لديك ما يقال أيضا؟"
"الحقيقة يا فندم.. لو كنت نسيت أتكلم عن الشفافية أحب أقول
إن أهم حاجة هى الشفافية.. الشفافية"
"شكرا جدا أستاذ (عادل)".

القرية.....

صباح يوم آخر....

استرخى (بسطاوى) على كرسى يشبه تلك التى تعرفها
لشواطئ..تمدد وقد احتضنه ظل شجرة ضخمة ليذيب ذرات جسده
في الهواء..مبسم النرجيلة بين شفثيه وعيناه تراقبان الأرض وتابعان
لأذرع المتحركة هنا وهناك في تراخ ممتع..ثم أراح جفنيه من جديد
وقال:

"الحمد لله يا (سعد) على النعمة".

كان الآخر إلى جواره وكان قد اتخذ جلسة مشاهمة..كان يقول:
"الحمد لله والله..الدنيا أحلوت والأشياء بقت معدن".

"والله يا (سعد) أنا مش مصدق اللي بيحصل ده..دا أحنأ كنا
مدفونين يا جدع..البلد بقت حاجة تانية خالص".

"بس فيه والله كلام كده مش ولا بد بيتقال اليومين دول".

انتفض (بسطاوى) مذعورا فاستطرد (سعد):

"بيقولوا المشاريع كلها وقفت..أنا كمان لاحظت إن الدنيا
مديت مرة واحدة".

"وده ليه؟؟؟"

"ناس كثير خافوا وراحوا إمبراح للحاج (محمد) علشان
يستفسروا..بس هوا طمنهم..بيقول منتظرين الخبرا اللي جاين من
ليندر".

تنهد (بسطاوى) وقال:

"يا خوفي"

"متخافش..الحاج (محمد) عمره ما يكذب".

همس (بسطاوى) وهو يعود لجلسته المسترخية:

"أصل الواحد ما صدق يا أخوى..ما صدق".

القيادة الأمريكية

صوت حازم فى الهاتف....

"أوامرك سيادة الرئيس"

"أعتقد إن الأمور ماشية زى ما أحنأ عايزين..تقارير عيونا
وتقارير المرقين بتأكد ده..رئيسهم بيتصرف كأنه واحد من
رجالنا..ذكاؤه بالفعل أعلى من توقعتنا".

"ده حقيقى..رأى حضرتك؟".

"رأى إن القرار الحاسم جاه أوانه..عايز دعوة رسمية لرئيس
الجماعة دى..هنبعتله طيارة خاصة على سبيل الهدية لأنه أكيد لسه
مايملكش طيارات..عايز العالم كله يذيع اللقاء ده".

"أمرك يا فندم".

"نفذ"

تيت..تيت..تيت

مبنى المحافظة....

صباح يوم جديد.....

(جمضان) عاقدا حاجيه ومستندا بذراعيه المعقودين على
مكتبه..بدا متوترا لأول مرة منذ زمن بعيد..كان د (عبد المنعم)
جالسا في المواجهة وقد كان البادئ بالكلام..كان أقل توترا..ربما
اضيا كذلك....

"أعتقد إن الزيارة دى هى البداية يا ريس..دى الخطوة
لأولى..بعدها دعم العالم كله هيقى تحت رجلك..أنت النهاردة
بس تقدر تقول إنك رئيس..ورئيس قوى كمان".

ظل (جمضان) صامتا يفكر..للحظة بدأت الأفكار تتداعى إلى
عقله من كل صوب كالجراد..فقط أوقفه صوت (ضاحى) وهو
يقتحم غرفة مكتبه كالطفل وجعله يجفل....
"يا ريس..يا ريس..الطيارة..الطيارة".

كان صوت الطائرة المروحية قد بدأ يتعالى بالفعل..هكذا اتسعت
بتسامة د (عبد المنعم) وقال:

"ترجع بالسلامة يا ريس".

هكذا نهض (جمضان) وقد حسم أمره..أغلق سترد ووقف
باعتداد ثم قال:

"استمروا كأنى موجود بالظبط..أنا مش هتأخر"

ثم غتم ببعض كلمات وانصرف.....

لم تستمر زيارة (جمضان) المرتقبة سوى يوما واحدا فقط.. لكنه - لا شك - كان مزدحما بتغطية إعلامية غير معتادة.. كذلك كان المؤتمر الصحفى المشترك.. ورغم كلماته القصيرة ومضمونه غير المحدد لكن الرسالة المطلوبة كانت قد وصلت للعالم بوضوح.. كان هذا هو المطلوب لكلا الطرفين.. فيما بعد ذكر (جمضان) فى أوراقه أن الولايات المتحدة قد طلبت منه صراحة أن يفتعل بعض المشكلات معهم من حين لآخر بخصوص قضياه وقضايا المنطقة حتى لا يتهم بالانصياع التام فيثير حفيظة شعبه.. هذا يقويه أمام خصومه ويضمن له الكثير من الاستقرار.. كلام مقنع بالطبع وقد قرر (جمضان) أن يضعه ضمن حسابه فى الأيام القادمة.. كذلك كان الكلام عن الدعم الاقتصادى.. الأموال والإمدادات الحربية.. هذا يضمن له الكثير من القوة فى حال تعرضه لمواجهة عسكرية كما أنه يضمن لأمريكا حليفا قادرا فى المنطقة.....

هذا ما قاله (جمضان) فيما بعد لكن أحدا لا يعرف ما الذى جرى فى الكواليس.....

القرية.....

دوار العمدة.....

اليوم التالى للزيارة.....

الحاج (محمد) واقفا أمام الدار ويجواره الوزراء.. خلفهم سراقق مهيب ممتلىء بالحشود المتحمسة.. صور (جمضان) فى كل ركن

والأعين المشدوهة تراقب في ذهول طائرته المروحية وهي تمبط نحو
الساحة الخالية بالقرب منهم.....

الكل يهمل.. الأصوات المتداخلة تكاد تحجب الرؤية والعاصفة
الترابية من حولهم تخفى كل شيء كالستار.. طائر رخ ضخمة يأتي من
عقول الماضي السحيق ليفزو تلك البلد البسيط ويذهل أهلها إلى
الأبد.. لحظات ثم استقر الكائن الضخم على أرض الساحة وصوته
المادر يعوى في كل اتجاه فيخلع القلوب.. ثم ثوان أخرى حتى بدأ
بابه الحديدى ينفرج ليخرج جعبته إلى الناس.. ومن بين المتأففات
المادرة باسم (جمضان) لم يجد صوت الحاج (محمد) مكانا يتردد
فيه.. كان قد أصابه الذهول بشلل تام وكذا كان جميع رفقته.. كان
يهمس:

"إزاي؟.. دا أحنا من شهور كنا مع بعض في حضن الجبل عايزين
حيطة تدرينا.. أزاي؟"

شعور بالتضاءل جعله يتحرك في ببطء.. يرى شبح (جمضان)
وسط العاصفة فيغطي عينيه.. عاصفة من المتأف كمن يقابل
طلا.....

لكنه ينبغي أن يكون في المقدمة.....

هكذا تدارك الرجل ذهوله وتقدم مسرعا ومن معه.. للحظة
تناسوا كل شيء وراحوا يسلمون عليه كنجم سينمائي.. هو أيضا
شعر بذلك.. كانت رائحة العطر الفاخر للرئيس الأمريكى لم تغادره
كفه بعد لكنه ظل متمسكا بعقله.. هكذا لوح للجميع وصافح من

يستطيع أن يصافح..تركهم يهتفون بحياته ثم دعاهم إلى المؤتمر الشعبي بصعوبة..كان الحشد قد أصيب بخيال الفرح..لكن (جمضان) كذلك لم يغفل ما حدث من تغيرات في قريته..شعر بالرضا وقد علم أنه في هذه اللحظة بالذات قد تحول كل شيء ليصير بفضل..لك أن تسأل كل هؤلاء الحشود عن هذا...!!

"حمد الله على السلامة يا ريس".

"الله يسلمك يا حاج (محمد)"

تقدم (جمضان) نحو الصوان وخلفه عدد من الرجال في ثياب أنيقة..لمسة إضافية لوجاهة (جمضان) الذي صار له بالفعل شكل الرئيس..في ثوان عرف الناس أنهم الخيرة فزاد الفخر والتهليل.....

مضت دقائق حتى أعتلى (جمضان) المنصة ومن حوله الوزراء..دقائق أكثر كي يهدأ هذا الجمع الفائز.....

"أشكركم يا رجاله..أشكركم بجد..الحمد لله اللى وفقنا لكل ده بفضل وقفتم..مفيش شعب في الدنيا زيكم والله".

هكذا تعالى الصباح الأحق.....

"أنا ملاحظ إن اللى طلبته من الحاج (محمد) كله اتنفذ تقريبا..البلد فعلا بتطور..أحب أعرف لو كان في حاجة قلقاكم أو شكوى عندكم قبل ما أبدأ الكلام".

كان (جمضان) قد رمى طعمه عالما بمدى سذاجته لكنه كان واثقا من أنه سيفلح..كان (جمضان) يحب أن يخطط لكل فئة بمقدار

مقلها.. لم يكن يجب أن ينهك نفسه بخطط تتجاوز ما يستحقه
فكير الهدف.. هكذا ألقى الكلمة وبقي ينتظر النتيجة....
حالة من الصمت...

"لا يا رجالة.. مفيش سكوت.. مفيش خوف وأنا موجود".
هكذا اندفع الجميع دفعة واحدة كالحمقى.....
"يا ريس المشاريع كلها وقفت.. أحنا مش عارفين ليه؟.. عايزين
طمن من حضرتك"
هكذا ابتسمت روح (جمضان) راضية لكن وجهه أخرج قدرا
مناسبا من العبوس....

صاح غاضبا:
"وقفت؟"
ثم خاطب الحاج (محمد) في حزم:
"أيه الحكاية يا حاج (محمد)؟"
فخض الحاج محمد وقد أصابه عته الخيرة.. لم يعرف ماذا يقول...
"أ.. أبدا يا ريس كنا في انتظار الخير"
"خيرة أيه بس يا حاج (محمد)؟.. والناس دى نعطل مصالحهم
رنوقف فرحتهم بيلدهم ليه؟"

ثم استدار إلى الجمع وصاح في حماس:
"يا رجالة مفيش مشاريع هتقف.. والخبرا أهم معانا.. الفلوس
كثير والحمد لله وبحب أقولكم إن دعم مشاريعكم هيضرب في

اتنين..أنا هاكون موجود بنفسى علشان أتأكد إن مفيش توقف
تاني".

ارتفع التهليل والصياح..بينما حذق الحاج (محمد) في وجه
جمضان بنظرة من فهم أخيرا..شعر بالامتعاض لكن (جمضان) تجاهل
نظراته تماما..وواصل حديثه من بين هتافات الناس التي لا
تتوقف.....

القرية...

نفس اليوم....

كانت الشمس قد أوشكت على المغيب حين انتهى المؤتمر
الشعبي المحنون وبدأ الناس في الانتشار مغادرين..يمشون في كل اتجاه
وألستهم لا تكف عن الكلام.....

"أيوه نتكلم..الرئيس (جمضان) قال كده..مش قال عايزكم
تخدوا راحتكم..عايزكم تنكلموا..قطعوا في فروتى حتى ولا
يهمكوا"

"والله يا (بسطاوى) يا بختنا بالرئيس (جمضان) ده..ده كان فين
من زمان؟"

"كفاية يا (سعد) إنه أمر باستمرار المشاريع وجاب الخيرا
معا..ده رجع لنا الروح..لأ وكمان شويه الحاجات الحلوة اللي
ناوى يعملها..الرجل ده مش بيكذب وكل اللي يقوله بيعمله"
"كويس إنه جاه علشان نقله على المشاريع اللي وقفت".

"فعلا..أهو بكلمة منه الأمور هتمشى من جديد..والفلوس
تزيد الضعف"

هكذا توقف (سعد) فوقف (بسطاوى)..ثم همس:
"أنا مش عارف هى الدنيا وقفت ليه من الأول..والله الحاج
محمد) راجل طيب الواحد مش عايز يظلمه".
"الله أعلم يا (سعد)..الفلوس ياما بتغير..كويس إن الرئيس
(جمضان) جاه".
ثم أكمل الطريق....

القرية.....
دوار العمدة.....
مساء نفس اليوم.....
(جمضان) جالسا فى غرفة المكتب بالدار..جسده ملفع بجلباب
إسع نظيف وفى يده عصا يكمل بها وجاهته الإجتماعية..كان
لوقت ليلا وكان الجميع فى نوم عميق..فقط هو ورجل بسيط الهيئة
يقف وقف أمام مكتبه يرتعد.....
"أنت (زكى)؟"
"خدامك يا ريس"
"(ضاحى) بيتولى كلام كويس قوى عنك يا (زكى)..هو بيثق
فيك ويعتبرك أخلص رجائه"
"يا ريس أنا خدكم"

"أنا متعود يا (زكى) إني أعرف أخبار البلد من (ضاحي).. طبعاً
الأخبار دى كلها يجمعها منكم.. دلوقت أنا هنا وأحب أعرف
آخر الأخبار منك بنفسى"

"يا ريس أنا حظى خلو إني عرفت أشوف سيادتك علشان
أقولك أخبار رجالة الغريب.. الموضوع طول والناس عايزاك تتصرف
يا ريس."

عقد (جمضان) حاجيه.. لم يكن قد سمع عن هذا الأمر من قبل
لكنه أزال هذا التعبير ليشجع الرجل على الاستمرار.....
"عملوا أيه تانى دول؟"

"يا ريس دول فجروا.. بقوا بينقولوا دبة النملة ليه.. ويا ويله اللى
يقول كلمة واحدة على الغريب.. يضيع.. ممكن تتكلم عن اتخن تخين
فى البلد براحتك لكن هو لأ.. دول بقوا فتوات.. بينهبوا والناس
مبتقدرش تيجى جنبهم.. بقى شوية حثالة زى دول قربوا يبقوا أسياد
البلد.. لا مواخذة يا ريس"
"عصابة يعنى؟"

ثم صمت (جمضان).. أعطى لنفسه برهة قصيرة للتفكير ثم قال:
"بص يا (زكى).. أنت ولد جدع وأنا هكفأك بس عايزاك فى
خدمة صغيرة".

قال الشاب ملهوفاً:

"أمرك يا ريس".

"(ضاحي) ميعرفش إني شوفتك..ده أولاء..ثانيا عايزك تشغلي
كام واحد كده يكونوا مش محروقين علشان يكونوا على اتصال
يا..رجالة جداد مش من رجالة (ضاحي)..عايزهم ينقوللي كل
خبر البلد بما فيها أخبار رجالة (الغريب) وأخبار الوزرا وحتى
رجالة (ضاحي) أنفسهم..فاهم؟..رجالة (ضاحي)..عايز أعرف إذا
كانوا بينقلوا الأخبار زى ما بتحصل ولا على مزاجهم".
"أمرك يا..."

هكذا وجد الشاب مبلغا ضخما من المال يلقي إليه فشهو....
"ريس..."

"بصراحة يا (زكى) ، (ضاحي) أتعود على العز ومعدش
لاقع..وأنا حاسس إنك مفتح عنه وتعرف تشيل الشغلانة"
ثم مال عليه وهمس:
"شغلانة الوزير".

ارتجف الشاب في حين قال (جمضان) باسماء:
"وريني المهمة بس واثبت كفاءتك"
"أمرك يا ريس".

قالها الشاب في حماس جارف..إشارة خافتة من يد (جمضان)
كان الشاب قد انقشع.....

لم يكن (جمضان) يعرف السبب الحقيقي وراء إخفاء (ضاحي)
لهذه الحقائق..هل يفترض سوء النية أم يفترض أنها مجرد بحاملة حمقاء
مرجل قوى الصلة به هو الغريب.....

في النهاية كلها احتمالات لا ترضيه..فقط لم يحن الآوان
بعد.....

هكذا رفع (جمضان) هاتفه وقام بمكالمة....

"أبوه يا غريب.."

كان حازما.....

"أنا شفت الظروف مش مناسبة لما وصلت إني أكلمك في
الموضوع ده..بس كان لازم اليوم مايعديش غير لما أكلمك فيه"
"خير إن شاء الله"

"بص يا (غريب)..إنت وزير..وأنا سايب البلد أمانة في
ايديك..واللى بيعمله رجالاته ده بيدمر كل حاجة أحنا بنعملها".
"من غير لف ودوران ومن غير متعصب..أنا بحافظ على قوة
اللى بينا وعلى اللقمة والفرشة اللى ياما خمسنا فيها..إحنا أعداءنا
كثير وعائزين نركز معاهم..يعنى اللى بيعملوا رجالتك لا ده وقته
ولا مكانه"

"قلت من غير عصبية..أنا متأكد من اللى بقوله..الموضوع ده
وصلنى من أيام وأنا أجلت الكلام معاك لحد ما أتأكد..يا (غريب)
أنت مش محتاج كل ده علشان البلد تعرف قيمتك..بس لازم
يرضوا تحترم وجودى".

"أنا مش هتكلم في الموضوع ده تاني..أنا واثق إنك هتحكم
عقلك..أنا مش «سألك»".

ثوان ثم....

"في حفظ الله"

ثم أغلق هاتفه محاولا السيطرة على ملامح وجهه.. ثم تراجع في
قعده وقد قرر أمرا.....

القرية....

دور العمدة....

نفس الأمسية.....

غرفة نوم الحاج (محمد) والأخير متمدد في فراشه.. عابس الوجه
وبجواره (هانة) نصف جالسة وقد قررت أن تقوم بما تعرف أن
عليها أن تفعله....

"قلت لك يا حاج.. (جمضان) ده مش سهل.. شوفت اللي عمله
فيك في المؤمر.. أنت تتعب وتهلك وهو يعمل البطل".

أشار لها الحاج (محمد) ناهرا وقال:

"أنزلي من فوق دماغى يا هانة مش نقصاكي"

"يا أما قلتلك.. أنت اللي تستحق تبقى الرئيس مش هوا.. بس
نت اللي طيب بزيادة علشان كده...."

هكذا انفجر الحاج (محمد) على غير عادته...

"بس يا (هانة).. أخرسى مش عايز أسمع حسك".

صمتت كاظمة أنفاسها في حين زفر هو باثا حمم أنفاسه في كل
مكان.. قال بصعوبة:

"ملعون أبو المريسة اللي هتجننك دى..أنا مش عايز حاجة..أنا
يعمل ده لوجه الله..مش عايز من حد حاجة".
"يس ده حقك ولازم...."

أشار لها بحزم أن تتوقف وقال:
"خلص الكلام..نامى وأنتى سكتة يا (هانة)".
هكذا صمتت (هانة)..كتمت غيظها وتدنرت بالغطاء لكن
الحاج (محمد) لم يحرك ساكنا..بقى فى وضعه وقد تيقن بأنها ليلة بلا
نوم.....

ظل كما هو وشعور بالمرارة يكاد يخنقه...

القرية...

دوار العمدة....

صباح اليوم التالى....

ارتشف (جمضان) محمدا من قدح القهوة الذى أمامه..إلى جانبه
كان الدكتور (عبد المنعم) وكانت علامات النوم بادية عليه..كان
الأول يقول:

"زى ما قتللك..دور مجلس المستشارين بالنسبة ليا
حيوى..بصراحة أنا شديد الانبهار بالأفكار والمقترحات اللي
عرضها الأساتذة الأسبوع اللي فاتت ومتأكد إن تنفيذها هيعمل
فرق كبير..فعلا البلد فيها طاقات جبارة لازم تستغل..والخطوة

لحماية هي إنشاء مجلس مشارك من الشباب..أعتقد إنه فعلا سيكون تجربة رائدة".

"ثقة غالية يا ريس".

"الحقيقة إن مجلس المستشارين هو اللجنة الأساسية لمجلس الوزراء لقادم..لكن أنا مقدرش أقول ده دلوقت لأني بالفعل أملك مجلس لوزراء..ودول ناس اتحملت كثير غلشان الدولة الجديدة غير إنهم ناس ليهم قوتهم ومكانتهم في البلد..مقدرش اتخلص منهم ببساطة..أنا بكلمك يا (عبد المنعم) كأني بكلم نفسي بالظبط".

"مفهوم يا ريس".

ثم أخذ د (عبد المنعم) نفسا عميقا وقال:

"بالمناسبة يا ريس..مستشار حضرتك للشئون الخارجية اتصلت بكت حضرتك بتفطر فمحيش يزعجك".

"خير؟".

قالها وارتشف رشقة أخرى....

"خير يا ريس..إيران بتكرر عرضها لتباحث سبل التعاون لاقتصادي والسياسي بين البلدين..في حالة الموافقة هما مستعدين لإرسال مبعوث رفيع المستوى لشؤلاط في ظرف أسبوع".

"مم..ورأى المستشار أيه؟"

"والله هو مختار..مينفعش إننا نلعب على الحبلين لأن ده مش مريضى حد منهم..والاختيار صعب..أمريكا هي القوة..الفلوس..التسليح..والسطوة السياسية وهي فعليا اللي

بتحميننا.. لكن إيران هي خط الرجوع لو فكرت أمريكا تبعدنا
لمصلحة حد تاني.. ساعتها التحالف مع إيران هيبكون الشوكة اللي
هتخليهم يفكروا كثير.. لأن أمريكا مش عايزة مواجهة غير مدروسة
مع إيران.. إيران برضوا تحب يكون ليها حليف في قنب المنطقة.. ده
بالنسبة ليهم إنجاز حتى لو كنا دولة صغيرة.. متنساش إن موقعنا أكثر
من ممتاز.. أنا قلت لحضرتك وجهة نظر مشاهة لما سألنا أول
مرة.. المشكلة إن إيران كررت العرض ومنتظرة رد".

"يعني نراهن على الحاضر ولا المستقبل".

"للأسف إحنا محتاجين الاتنين"

"الناس دي محتاجة حلول قاطعة".

ثم فكر للحظة.. حذق في وجه د (عبد المنعم) وقال:

"الحاضر أولى يا عبد المنعم.. لكن برضوا أنا مش عايز ردود
حاسمة.. أبعثوا فاكس للسفارة الإيرانية بإننا في انتظار الضيف
الكريم.. وأكد هنعرض أفكاره على مجلس الوزراء علشان نشوف
هي ماشية مع توجهتنا ولا لا".

"علم يا ريس.. الحاجة الأخيرة بقي إن فيه بعض الدول العربية
أعلنت تعاطفها مع الأوضاع الإنسانية المتردية اللي بنعيشها نظرا
لظروف نقص الموارد وظروف الحرب والحصار وقررت إرسال
مساعدات مادية لمساندة شعب شؤلاط".

رفع (جمضان) حاجبيه في دهشة ساخرة....

"غريبة.. مع إن أوضاعنا دلوقت أحسن من الأول".

ثم نهض وقال:
"أعرض عليك الكلام الذي يستاهل بس يا (عبد المنعم)".
ضحك د (عبد المنعم) وقال:
"أمرك يا فندم".
ثم سار معه إلى الحديقة.. هناك كان الحاج (محمد) كان في
مواجهته....

"خلاص هتمشي يا ريس"
"معلش يا حاج (محمد).. عندي مشاكل كبيرة في المدينة لازم
أخلصها.. أنا بس حبيت أشوفكم وأقعد معاكم شوية.. بس الحمد
لله كله تمام.. أنتوا عاملين الواجب وزيادة".
"بفضل توجيهاك".

قالها باقتضاب من ثم صافحه (جمضان) وقال:
"ده العشم برضوه يا حاج (محمد).. دى بلدنا".
ثم أشار إلى د (عبد المنعم) وقال:
"أنا هسيب الخيرا معاكم شوية علشان تنسقوا وتظبطوا كل
حاجة".

أوما د (عبد المنعم) رأسه موافقا.. هكذا هز الحاج (محمد) رأسه
وقال:

"يأنسوا ويشرفوا".
هكذا غادر (جمضان) الدار إلى الساحة متجها إلى كائنه
الأسطوري.....

الجامعة.....

مكتب د (سراج) مستشار الاقتصاد.....

كان هذا الأخير يفكر..جالسا على كرسيه وأمامه ساعي مكتبه
وكان خائفا.....

"بص يا (أشرف) يا بني..أنا عارف إنك كنت بتنقل أخباري
غصب عنك..مش هتقدر تقول لوزير الدفاع أو لرجاله لأ"
ثم نظر لساعيه الخائف في صرامة واستدرك:
"كانوا بيدفعولك كام؟"

"يا باشا"

هدر صوته...

"أخلص"

"ميتين يا بيه".

"في الشهر؟".

"تمام يا باشا"

مال عليه الرجل وقال ضاغطا على كلماته:

"أنا بقى هديك خمسميه..غير الفلوس بتاعتهم..بس تعمل
حسابك..أنا اللي هأملكك تنقل أخباري إزاي..فاهم يا (أشرف)؟"
"فاهم يا باشا".

هكذا تراجع الرجل إلى كرسيه ثم عبس بوجهه وقال:

"طب ياله غور من وشى هاتلى قهوة".

قالتها وأشاح له بكفه أن انصرف.. هكذا استطاع الفتى أن يأخذ أول أنفاسه منذ جاء.. أسرع في تناول الكوب الفارغ من سطح مكتب رئيسه ثم قال:
"أمرك يا بيه".

لحظة ثم انقشع الفتى تاركاً هكذا د (سراج) وقد زفر حمم غضبه حتى كاد أن يحترق.. تناول حقييته وهو يغمغم غاضباً:
"مبقيش غير ساعى المكتب كمان".

مبنى المحافظة.....
صباح اليوم التالى....
(جمضان) فى مكتبه.. يتأمل بعض الأوراق حين دلف (ضاحى) إلى مكتبه مسرعاً...
"حمد لله على السلامة يا ريس"
"الله يسلمك يا (ضاحى)".
"أمرك يا ريس"
نظر إليه (جمضان) فى حزم...
"مش دى تقارير عيونا اللى فى الجامعة برضوه".
"تمام يا ريس".
"مش ملاحظ حاجة؟"
"حاجة؟.. زى أيه يا ريس؟"

"التقارير طول عمرها فيها الكويس والوحش.. وأحنا كنا بنقبل ده لأن الناس دول بشر وبنختار بناء على الأفضل.. لكن أنا ملاحظ إن تقارير الأيام الأخيرة لبعض المسئولين التحسنت فجأة.. بعضهم بقى ملاك.. مش بيغلط.. دى كمان التقارير بقت عملة زى قصائد الشعر.. واللى بيحى تسعة بقى بيحى ثمانية.. ويروح أربعة.. ومش بيغطر حتى"

"مش فاهم قصد حضرتك"

"قصدي إن فى ناس تحب تقرا تقارير بالمنظر ده علشان تريح دماغها.. لكن أنا مش من دول.. لو صدقت الكلام ده أبقي عيب".
ثم أشار لضاحي وقال حازما:

"شغل عيون جديدة يا (ضاحي).. وشوش ميتشكش فيها.. طالبات.. معيدين.. أى حد.. عيون على عيوننا القديمة وعيون على الأساتذة.. لازم أعرف مين اللى لسه معانا ومين اللى شغال خصوصى".

مط (ضاحي) شفتيه غير راض وقال:

"تمام يا ريس".

"نفذ يا (ضاحي)".

ثم أشار إليه فاستدار منصرفا.. ثانية ثم أغلق (ضاحي) الباب خلفه وهو يضرب كفا بكف.. هكذا وجد الدكتور (عبد المنعم) المشهد العجيب وهو يتجاوز (ضاحي) الذى بدا وكأنه لم يره.. ثم نسي هذا كله وطرق على مكتب رئيسه....

"أفضل".

دلف د (عبد المنعم) إلى الداخل فقام (جمضان) يستقبله في حماس.. قال له من بين مصافحته:

"حمد لله على السلامة يا (عبد المنعم)".

"الله يسلمك يا ريس.. اطمئن حضرتك.. الشغل اللي اتعمل ليومين اللي فاتوا هيفتح نفسك".

"على خير الله".

"حضرتك بلغتني أكون موجود معاك دلوقت للضرورة".

"في الواقع إحنا في انتظار ضيف من أحد البلاد العربية".

"دولة عربية؟"

قالها د (عبد المنعم) متعجبا...

"متستغربش".

ثم ضغط زر مكتبه....

"المندوب يتفضل".

"أمرك يا فندم".

هكذا تعالى صوت الأقدام المقبلة قبل أن يفتح الباب ويطل من

خلفه وجه أسمر بادي النعمة.. ابتسم (جمضان) ثم تقدم ومد يده

بصافح الضيف.....

"أهلا بك يا فخامة الرئيس".

"أهلا بك أستاذ (على)".

ثم أشار له بالجلوس فجلس واتخذ لنفسه مقعدا بجواره...

"زيارة كريمة أستاذ (على)".

"أنت الأكرم سيدى..والله أنا لا أحب أن أطيل عليك..فقط أتقدم بتحية تحكومتى لسيادتك وتهنئتهم لما وصلتكم له من إنجازات فى بلدكم..فى الواقع أنا لا احمل لك تحية فقط ولكن تحية عدد كبير من الدول العربية التى تتفق مع دولتى فى دعمها لكم".
"شئ يسعدنى".

"وباختصار ندعو حضرتك لزيارة دولتى لبحث سبل تدعيم العلاقات كما أقدم لك دعوة باسم عدد كبير من الدول العربية كى تتقدم بدعوة للانضمام للجامعة الدول".
"أقدم؟"

قالها (جمضان) متعجبا فى حين رفع د (عبد المنعم) حاجبيه ولم يرد....

"جامعة الدول سيادة الرئيس..سوف يكون ذلك أكبر دليل على تواجدك الدولى والاعتراف بكيانك فى المنطقة..وسوف ندعمك جميعا حتى تحصل على هذا الحق الأصيل".

سأله (جمضان) فى برود:

"وحضرتكم هتدعمونى ليه؟"

"لأنه حقك الأصيل أن تكون وسطنا..كما أننا نسعد بتحالفك معنا".

"مممم"

قالها ثم استدار لدكتور (عبد المنعم):

"اجتماع الحزب أمتى يا (عبد المنعم)؟".
"دلوقت سيادتك..وزمان الناس موجودين فى مقر الحزب من
ساعة..وكمان المواطنين اللى عايزين يتبعوا الاجتماع".
"عظيم..علشان منضيعش وقت الأستاذ (على)"

ثم استدار للأستاذ (على) وقال:
"بص يا أستاذ (على)..أمريكا بالفعل طلبت منى الإنضمام للأمم
المتحدة..وده هيحصل قريب..هو ده الوجود الدولى بالنسبة
ليا..بالنسبة لموضوع جامعة الدول ده فأنا متشكر..أنا مش عايز
أبقى جزء منكم..إيه اللى يخلينى أضيع وقتى ومجهودى وفلوسى
وأحط نفسى فى مواقف سياسية تضعف من هيبة الدولية لما أنغمس
فى قضاياكم وصراعتكم وتكتلتكم الخيانة دى..حتى
الاقتصاد..كلكم دول مبنية على اقتصاد النشاط الواحد
واقتصاديات الثروات..بترول..سياحة وخلافه..مش هستفيد منكم
كثير..اعتقد إن وقتى وجهدى شعبى أولى بيه..أنا مش مستعد أضيع
طاقاتى فى قضايا مش بتنتهى..بصراحة أستاذ (على) أنتم الطرف
الأضعف..وده وضع مش منتظر أنه يتغير".

نهض المندوب غاضبا..وجهه محتقن كالبحيم.....
"سيادة الرئيس..أنت بهذا الشكل تتنصل من عربتك..تذكر أن
عدونا واحد".

"مفيش علاقة أستاذ (على) بين العروبة وبين المؤسسات
العربية..أنا وبة دى مشاعر شعوب صعب تترجم على مستوى

مؤسسات الحكم..بالعكس أحيانا مؤسسات الحكم بتتعمد أنها
تتلاعب بمشاعر شعوبها للحصول على مكاسب سياسية معينة..يعني
أنا مش لازم أكون معاكم علشان أكون عربي..أما عدونا الواحد
ده فمعتقدش إنكم بتمثلوا ليه أى مشكلة..اعتقد إن اللي أنا بعمله
أخطر من اللي أنتوا بتعملوه".

كاد المندوب أن يرد منفعلا لكن (جمضان) أشار له رافعا
حاجبيه:

"أما قصة زيارة بلدكم علشان التنسيق..فده موضوع
تاني..اعتقد إن هأخذه بجدية".

هكذا اكتفى المندوب بنظرة دهشة..ولم يرد.....

القرية....

دوار العمدة....

نفس اليوم.....

الحاج (محمد) جالسا بين جمع الوزراء..كان متوترا بينما
الأصوات تتعالى هنا وهناك..فقط بقى الغريب مكتوما عاقدا
حاجبيه في طرف الغرفة..ولم يتكلم على الإطلاق....

"يا رجاله أهدوا..شويه هدوء..الموضوع مش مستاهل كل ده".

يتكلم (أبو الليل) منفعلا...

"مش مستاهل أیه بس؟.. یا راجل دا کان ماشی بالخیرا بتوعه
دول رایج جای ومش مستعیر حد فینا..وکان مقعدهم جانبہ
مناسبة ومن غیر مناسبة".

"یا جماعة الموضوع مش کده..دول مهما کان ضیوف وهو
عايز یرسمنا قدامهم".

"یرسم میسین؟.. یرسم میسین؟"

أمسک (أبرهاشم) ید (عمرو) وقال فی محاولة للتظاهر بالهدوء:
"یا حاج (محمد) بالعقل کده..دا کان بیحاول یلمعهم ویرسمهم
قدام البلد..مین دول؟..کلام (ضاحی) إنه مش بیفارقهم لا لیل ولا
نهار".

"قصدکم أیه؟"

"قصدنا إننا خلاص بقینا کارت محروق..کلها أيام وهتلاقی
الجماعة دول هما اللى مسکوا البلد..مش بعید یجیبهم بدلنا..ویمکن
کمان یرمینا فی السجن..أصلنا خلاص مبقیناش عاجبین".

تنهد الحاج (محمد)..لم یکن یقدر على اعتراض
أفکارهم..کانت منطقية..ربما دارت بذهنه قبل أذهانهم
کذلک..أفکار كثيرة دارت بعقله لكنه قرر أن یكون حازما..

"یا رجاله دا وز شیطان عايز یهدم کل اللى عملناه..ودا کلام
جدید علینا..ومحیش أسمعہ تانى..أنتوا اللى عقولکم ضربت من
ساعة ما شوفتوا الطیارة والحشية والبدل".

"مش کلام ده یا حاج محمد"

"ولا كلامكم ده كلام..ولحد كده كفاية".
ثم تركهم وانصرف إلى غرفته لينهى الحديث.. لم يكن يتحمل المزيد.. كذلك هم لذا لم يستوقفه أحد...
تبادل الجالسون النظرات.. ثم همس (أبو الليل):
"أنا مش عارف الحاج (محمد) بيأوح ليه؟"
نظر إليهم الغريب بنظرة باردة.. وتكلم ربما لأول مرة:
"الحاج (محمد) عارف كلامكم.. يمكن أكثر منكم.. لكنه مش عايز يكون سبب الخراب.. عايز يوزن الأمور لآخر لحظة".
"معدش فيها لحظات.. معدش فيسيبها لحظاااااات".
"أهدا يا (عمرو) يا بنى".
ثم يقول (أبو هاشم):
"من حقنا إننا نضمن حقنا.. الوضع ما بقاش يطمئن".
"دا الكلام المظبوط.. دلوقت الأشياء معدن والحمد لله والفلوس كثير.. وأحنا لازم نأمن مستقبلنا".
"ونأمن ليه؟.. أحنا مش هنقدر على واحد ولا أيه؟؟؟"
قالها (عمرو) فرد أبوه:
"اللعبة دى مش مضمونة.. (جمضان) بقى قوى.. أقوى مما تتصوروا.. أحنا مش محتاجين نخاطر ولا نعمل شوشرة.. أحنا بس هنجاول نأخذ نصبنا من الليلة ونحفظ حقنا فى البلد.. كفاية إن واحد زي أنا ملوش فيها حنة الأرض لحد دلوقت.. الواحد فعلا أتلهى".

تراجع الغريب بظهره من جديد.. لم يعقب.. فقط دار بخاطره أن
أقام به منذ شهور قد بدأ أخيرا يصل إلى أذهان أقرانه...
صمت مجددا...

مبنى المحافظة.....
(جمضان) جالسا خلف مكتبه وأمامه من جديد شاب
يرتجف.. أشار له أن أجلس فجلس الأخير بعد عناء...
"أنا مبسوط منك يا ابني"
"ربنا يخليك يا ريس"
كان هذا الشاب هو رئيس تحرير جريدة صوت شؤلاط.....
يتحدث الشاب:

"يا فندم أنا شديد الحماس لسيادتك وللنظام الجديد.. أخيرا
لفساد والمحسوبية والرشوة لقت فارس يتصلها.. يا فندم حضرتك
بطل.. بطل".

ابتسم (جمضان) ابتسامة ساخرة.. كلمات نمطية لكنها - على
الرغم من ذلك - تدغدغ مشاعره.....
"أشكرك.. أنا مبسوط من حالة الحرية اللي أنت عملتها في
جورنالك.. تغطية المظاهرات وانتقادات الشعب وتغطية أخبار
الأحزاب.. ده شئ مميز".

"يا فندم دى أوامر حضرتك.. دى الحرية اللي عمرنا ما كنا
نتخيل تبقى هنا.. دا أحنا فشر أمريكا".

ندت من جمصان ضحكة صغيرة لم يملكها....

"بص يا ابني"

آنحنى الصحفي على الفور.....

"أوامرك يا ريس".

"عايزك تغطى الزيارة الأخيرة اللي أنا قمت بيها.. وأيه اللي تم
بالظبط"

"وطبعا يا ريس نشيد بالإنجازات اللي حضرتك بتحققها".

ابتسم (جمصان) ولم يعقب.. قال:

"عايزك كمان تنشر عن مباحثات بينا وبين أمريكا.. وإنها
أسفرت عن معاهدات اقتصادية جديدة.. بعدها بأسبوع هتنشر عن
اتصال هاتفى بينى وبين الرئيس الأمريكى بنعبر فيه عن استيائنا من
المواقف الأمريكية فى المنطقة.. كمان هتنشر دعم للموقف
العربى.. أخيرا عايزك تنشر عن الأحزاب ونشاطاتها وتعمل لقاءات
مع رؤساء الأحزاب.. يقولوا اللي هما عايزينه"

"الله عليك يا ريس".

"يا الله يا بنى روح أنت".

انصرف الصحفي فى حين استدار جمصان بكرسيه لهاتفه.. أسرح
يجرى مكالمه...

"أيوه يا (زكى)".

صوت على الهاتف ثم....

"رجالتك تمام"

أجابة مقتضبة ثم.....
"خلاص..عايز أعرف أخبار كويصة..عايز التقارير من النهاردة
ا (زكى)".
كلمة ثم.....
"ياله..شوف شغللك".
ثم أغلق هاتفه ودار بكرسيه مجددا وقد انتابه شعور بالرضا.....

القيادة الأمريكية
الصوت الصارم فى الهاتف:
"أوامرك سيادة الرئيس"
"أداء جمصان ده أكثر من متميز..دا أنا أحيانا بشك فيه..كأنه
تدرب من سنين".
"إحنا متابعين الموقف يا فخامة الرئيس..وأعتقد إنه أداء جمصان
متوافق مع أفكارنا".
"المعونات وصلت".
"وصلت يا فندم..وبيتم تجهيز شحنات الأسلحة".
"أعتقد إننا عملنا الجزء الخاص بينا..الدور عليه..بعد ما توصل له
صفقة الأسلحة هيكون ده الوقت المناسب علشان نفعل دوره معانا
كحليف لنا فى المنطقة".
"أوامرك يا فندم".
"نفذ".

تيت..تيت..تيت

قاعة مجلس الوزراء....

رئيس الوزراء على قمة الطاولة..كان العجز قد غطى ملامحه
وبدا صوته باهتا على غير العادة.....

"اعتقد يا جماعة إن الموضوع بقى مسألة وقت..الرئيس بيحملنا
مسئولية التخاذل في التعامل مع الموقف من البداية..وأعتقد إنه معاه
حق..زى ما قتللكم الموضوع مسألة وقت وكلنا هنرجع لعيالنا".

صمت مطبق....

"في الواقع أنا حاولت إني أجمل أداء المجلس أمام الرئيس في الأيام
الأخيرة..حاولت أوصله محاولاتي المستميتة للسيطرة على الوضع في
شولاط وجمع أكبر قدر من المعلومات عن اللي ورا العملية
دى..مش بس كده..أنا حاولت أعرض عليه مجهوداتكم في التطوير
والتحديث وحل مشاكل الوطن..وأزاي إنكم مكتنوش بتناموا
علشان تحسنوا أداء الوزارة".

صمت مطبق....

"لكن قدر الله وما شاء فعل..إحنا هنؤدى واجبنا لأخر لحظة
ولحد ما يصدر القرار..وكل واحدة بعدها يرجع لحياته".

ثم رفع رأسه إلى الجمع وقال:

"أول موضوع بجدول الأعمال"....

مبنى المحافظة.....

(جمضان) يراجع بعض الأوراق..بينما الدكتور (عبد المنعم)

ظهر على فرجة الباب.....

"اتفضل يا (عبد المنعم)".

"خير يا ريس".

التقط (جمضان) الأوراق وناولها ل(عبد المنعم).....

"شايف يا سيدى..دى آخر أخبار البلد..المصدر هو (زكى)

والعيون الجديدة اللي واضح إنها كانت فعلا ضرورية..الوزرا

خافين منكم يا (عبد المنعم)..طبعاً هما عارفين قدراتهم كويس

وعارفين إن وجودكم أهم من وجودهم..أخيرا فكروا صح وحسوا

إني ناوى الاعتماد عليكم فى المستقبل..علشان كده بدأ عدد منهم

فى السمسرة والتسليك علشان يأمن مستقبله..أما الباقين فيبحولوا

يفرضوا نفوذهم ويدوا الإحساس للناس إنهم الكل فى الكل..الحقيقة

إن الحاج (محمد) لسه أيديه بيضاء وذمته نظيفة وده اللي محافظ

على حب الناس له".

"أسمعلى يا ريس دا مش دائما وحش..دا بيخليك قدام شعبك

رمز العدل والخير ويخلي تدخلاتك فى الوقت المناسب هى نجدة

للناس..زى ما عملت فى الزيارة اللي فاتت..اللى بيعملوه ده

بيخسرهم علاقتهم بشعبهم وده هيخلي الناس تتعلق بيك أكثر".

"وأخيرة دا أيه؟..مهما ظهرت فى دور المنقذ للعبة دة مش ممكن

تستمر..دى حاجة الواحد بيحتاجها من وقت للثانى..لكن الناس

دى بتشوه الصورة اللي بحاول أرسمها للثورة..وغباءهم بيخسرنى
كثير..غير إن ردود أفعالهم غير متوقعة".

مال د (عبد المنعم) عليه وهمس:

"والحل؟..ناوى تقلب عليهم؟"

هز (جمضان) رأسه فى حزم..

"صعب..أنا ممكن أكون فى المطلق أقوى منهم..لكن الناس دى
ليها أهل وعزوة فى البلد..بعضهم كمان لسه محبوب زى الحاج
(محمد)..لو عملت كده هأخسر ناس كثير..كمان هأولع حرب
داخلية مش وقتها دلوقت..حالة من عدم الاستقرار أنا مش
محتاجها".

"يعنى ناوى على أيه؟"

"إنك تتطمنى على الجيش والأسلحة اللي وصلت..على الرجالة
بتوعنا اللي بيتدربوا..محدث عارف الظروف".
"تمام".

فكر (جمضان) لبرهة ثم قال:

"وعايزك فى السر كده تبعت حد يجيب أخويا من البلد".

"أخوك؟..أنت عندك أخ".

"خمستاشر سنة..مش كثير يعرفوا عنه حاجة..أنا فضلت إلا

أبعده عن العيون من ساعة الثورة..أنا هأديك عنوانه".

"طيب وأنت هتجيبه ليه؟"

حلق فيه (جمضان) بصرامة فخرس د (عبد المنعم).....

"علشان أبعدہ عن الأحداث دى.."

"أمرك يا ريس".

قرر ألا يجادلہ..ہكذا قال (جمضان) لكنه كان يعلم بأن هذا لم
كن إطلاقاً ما یرمی إلیہ.....

كان شعوره بأن رجاله يتساقطون لأسباب عدة قد أورثه
الشعور بعدم الأمان.....

هكذا لامس كفه مسندى كرسية بلا إرادة.....

القرية.....

الحاج (محمد) يسير في بطاء..يتفقد الأحوال في القرية..الناس
تقل في حماس والدعوات تتراعى عليه في حين بدا هو على غير
لعادة غائصاً في الشرود..يجواره (أبو هاشم) وكان عابساً أيضاً
على غير عادته.....

"ده موضوع خطير يا حاج (محمد)".

"يا (أبو هاشم) أنا زيكم مش عاجبني اللي بيحصل..لكن أنا
بأحاول لأخر لحظة إني ما بوظش اللي بانيناه..إحنا برضوه في الهوا
سوا والخطر علينا واحد..لكن توصل إني ألاقى الواد (زكريا) تربيتي
يتجسس عليا أول أمبارح..وأعرف في الآخر إن الأخبار دى بتطير
على (جمضان) في البندر..دا يبقى كثير".

"الواد ده زودها أوى"

"ومع ذلك أنا مقولتش لحد الكلام ده..قولتلك أنت بس لما خلاص فاض بيا..لأنى عارف إني لو قلت لباقي الجماعة مش بعيد يجيوا عليها وطبها".

"خلاص يا حاج (محمد)..يبقى كفاية عليه لحد كده".

"يعنى أيه؟"

"يعنى نشوف حد تاني يمسك البلد دى".

هز الحاج (محمد) رأسه وقال:

"(جمضان) مش سهل يا (أبو هاشم)..وواضح إن الفترة اللي قعدنا فى البندر قوت شوكتة..ده وصل لحد أمريكا..(جمضان) شرخ وسبنا إحنا هنا مغروزين فى الأرض..أحنا مش عايزين نعمل حاجة البلد كلها تدفع ثمنها".

"طب والعمل؟"

تنهد الحاج (محمد) وقال:

"ربنا يهدى"

ثم استدرك مغيرا الحديث:

"المهم بينا على المؤتمر الشعبى..عايزين نضمن الناس على المشاريع".

نظر إليه (أبو هاشم) ولم يجد ما يقال..ضرب كفا بكف ثم سار معه مغادرين الطريق.....

مبنى المحافظة....

قاعة المؤتمرات....

غادر (جمضان) مرهقا وبجواره غادر (ضاحي) و(عبد المنعم)
باب القاعة.. وخلفهم بدأت حلة رجال الجيش في الظهور متجهة
نحو باب الخروج.....

"واضح يا ريس إن متبعتك لأحوال الجيش من خلال عيوننا
وكمان صفقات الأسلحة اللي جاية خلتهم يوصلوك بصة تانية
خالص.. كمان شعورهم إن الكيان الأمريكى بيدعم الجيش بخليهم
يفكروا ألف مرة قبل ما حد يلعب بذيله".

"كمان حركة الترقيات يا (عبد المنعم).. شعورهم بالعدل لما
حسوا إنهم فعلا بيتكفأوا بحسب الأداء.. كمان المكافآت المالية.. كل
ده بيحكم السيطرة عليهم أكثر".

"بالظبط يا فندم".

"بس برضوا.. ظباط الحكومة القديمة لازم تكون الرقابة عليهم
أربعة وعشرين ساعة.. على الأقل لحد ما رجلتنا تشد حيلها".

ثم استدار إلى د (عبد المنعم) وقال:

"بلغ الأحزاب إننا هنعمل انتخابات الشهر الجاي"

"انتخابات؟"

"انتخابات مجلس الأمة الجديد.. وبلغهم كمان إن أعضاء مجلس
الأمة المنتخبين هيكون ليهم دور في اختيار مجلس الوزراء الجديد
اللى هيعلن بعد نتيجة الانتخابات مباشرة".

برقت عيناى د (عبد المنعم)....

"أمرك يا فندم".

"مجلس وزرا يا ريس؟"

قالها (ضاحى) متعجبا فقال (جمضان) وكأنا تذكره:

"دى إجراءات شكلية يا (ضاحى).. لازم مجلس الوزراء يتعين
بعد الانتخابات.. العالم كله بيعمل كده!!!"

ثم وقف (جمضان) فوققوا معه.. استدار ل(ضاحى) وقال بجدية:

"بالمناسبة دى عايزك تسافر البلد اليومين دول علشان تختار لنا
كام واحد يكونوا مناسبين للترشح باسم الحزب فى دائرة البلد".

عقد (ضاحى) حاجبيه غير فاهم.. لم يبدو مرتاحا لكنه أجاب:
"أمرك يا ريس".

دار الدكتور (عبد المنعم) ببصره بين (جمضان) ورجله
لوهلة.. لكنه لم يعلق.....

القرية....

دوار العمدة...

"انتخابات؟"

قالها الحاج (محمد) وقبضته كالأفعى تعتصر الهاتف.. كان (أبو الليل) على الطرف الآخر....

"زى ما بقولك يا حاج (محمد).. (ضاحي) قلى إنه هيعمل انتخابات زى انتخابات مجلس الشعب.. بعدها هيعين الوزرا".

"يعين وزرا؟"

"هو قال لضاحي إن ده إجراء عادى.. يعنى لازم يتعمل بعد لانتخابات".

صمت الحاج (محمد) وشعور بالغيظ المتمزج بالعجز يكتنفه....
"وموضوع الانتخابات ده محدش خد بيه خبر ليه يعنى؟"

"يا حاج (محمد) أنا الفار بيلعب فى عي".

لم يستطع أن يتحدث.. على الطرف الآخر كان (أبو الليل) مسكاً هاتفه حين دخل عليه الغريب....

"كويس إنك وصلت يا كبير.. إلحقنا.. (جمضان) شكله هيلعب ديله".

كان الغريب قد تقدم داخل دار (أبو الليل) حين هتف الأخير
بـ.. لم يبد عليه أى انفعال.. فقط جلس ووضع قدم على الآخر....

"بتكلم مين؟"

"الحاج (محمد) يا ريس".

هز الغريب رأسه...

"مفيش داعى لكل ده يا (أبو الليل)..يا خبر النهاردة بفلوس..وخليك ورا الكذاب..لو فكر يلعب بديله إحنا برضوا لسه بعافيتنا..ساعتها مش هنتخاف على حاجة".

نظر (أبو الليل) له متعجبا في حين استرخى الأول على كرسيه..لم يكن أحد يعلم بمجمل المكالمات التي هاتفه بها (جمضان) أمس..كان قد طمأنه بنفسه على بقاء منصبه تحت أى ظرف..هكذا وجد الغريب أن يثق ب(جمضان) لمرة أخيرة..كان (جمضان) مقتنعا.....

هكذا ظل (أبو الليل) يحدق فيه لكنه لم يجزأ على الكلام....

مبنى المحافظة...

(جمضان) وأمامه عدد من المستشارين..كان قد أنهى مكالمته مع الغريب لتوه وكان راضيا....

"أنا عارف إن فيه فرق كبير بين التعامل مع أهل قرية صغيرة زى اللى أنا بدأت منها وبين التعامل مع سكان المدينة..فكرة المشاريع والأراضى كانت كافية جدا لإرضاء أهل القرى لكن مش كافية لإرضاء أهل المدينة..دا اللى أنا استشفيت من متابعي لأخبار البلد".

"مممكن توضيح أكثر سعادتك".

"يعنى أفكارى اللى أن بدأت بيها واللى أنتوا طورتموها بخصوص الملكية والأراضى وتحقيق مشاريع وطنية واللى بدأت فى بلدنا وبعدها بدأ تنفيذها فى كل القرى والمراكز حتى تم تطبيقها هنا فى

لمحافظة حققت مردود طيب.. لكنه مش كفاية علشان أهل المدينة
رضوا عن النظام".

"المطلوب معاليك؟"

"أنا طلبت دعم مادي أمريكي علشان دعم البناء في
لمحافظة.. شعب المدينة بطبيعته مادي يحب يشوف ويحس
بترفه.. علشان كده أنا عايز منكم مجموعة من الأفكار والمشاريع
تطوير المحافظة.. مؤتمرات.. حفلات.. أنشطة ثقافية.. مولات
تجارية.. تحسين الشوارع وخلافه.. إهنا.. أنا عايز أهل المدينة يحثوا
بهم في أوروبا.. وأهم من كده إن ده يتم بسرعة.. التغيير لازم يكون
سرعة قبل ما الناس تعود عليه".

"مفهوم يا ريس".

ابتسم (جمضان) ثم دار بكرسيه تجاه النافذة مفكرا فصمت
لجميع.. ثوان ثم استدار إليهم ثانية وقال:

"عايز كل واحد من السادة المستشارين يجهزلى خطة عمل
مقترحة في تخصصه للخمس سنين القادمة.. في حالة توليه الوزارة".

سادت حالة من الانتعاش وهمهمات الرجال تبعثر هنا
وهناك.. ابتسم جمضان على الرغم منه لبرهة ثم ابتلع ابتسامته وقال:

"الموضوع التالى".

فيما بعد ذكرت التقارير الأمنية أن حالة من الرضا قد انتابت
الناس حين وعد (جمضان) بالالتفات إلى المانة.. ثم حالة من الثقة
حين بدأ التنفيذ بالفعل.....
تماما كما أراد (جمضان).. استغرق التنفيذ أسابيع محدودة لكنه
كان مرضيا.....

المحافضة...
متزل (عابد) رئيس حزب التيار الديني.....
كان الأخير قد غادر سيارته عائدا من مقر الحزب.. كان مرهقا
فقرر ألا يذهب هذا اليوم إلى مكتبه الهندسي.. قرر أن يعود إلى
المتزل مباشرة...
فتح بابه.. ثم مر وأدار يده كي يغلق الباب.. ذلك حين أحفل
وتراجع للوراء.....
كان هناك شبح فارغ الطول يسد الباب.....
"أنت مين؟"
"اتفضل الأول بعد إذنك.. مش مستحب حد يشوفنا مع بعض".
توجس (عابد) خيفة.. لكنه سمح له بالدخول....
"أنا (جاك ستوكر).. مندوب من السفارة الأمريكية".
"السفارة الأمريكية؟.. والسفارة هتعوز مني أيه إن شاء الله؟"
"أستاذ (عابد).. أنا مش هتفضل؟".
أشار له (عابد) بالجلوس.. وهكذا فعل هو....

"أستاذ (عابد).. أنا مش هطول عليك.. حزبك واحد من أنشط الأحزاب فى البلد.. وطموحه كبير.. تقريبا هو الحزب الوحيد اللي بينافس".

"شكرا"

"دى حقيقة.. أمريكا بتدعم الحريات فى كل دول العالم الثالث.. خاصة إن حدود الديمقراطية فى الدول دى بتبقى صارمة جدا.. أيه هى فرصة التنافس لما الحكومة يكون معاها المال والسلطة التنفيذية.. وحتى الحزبية".

"بس أحنأ فى أول الطريقة".

ابتسم جاك.....

"علشان عملتوا حزب؟.. يا راجل دى خطوة أتأخرت كثير.. مش كفاية أستاذ (عابد).. إحنا كدولة داعمة للحريات هندعم حزبك ماديا وسياسيا إذا أحتاج الأمر".

قال (عابد) فى حذر:

"كنت فاكّر إن علاقتكم بالرئيس...."

"دى حاجة ودى حاجة أستاذ (عابد).. إحنا دعمنا رئيسكم بعد سياسة الإصلاح اللي قام بيها.. كان يستحق.. ودلوقتى بندعمكم علشان ندعم الديمقراطية فى بلدكم الوليد.. علشان تتأسسوا كدولة حرة متوازنة.. مفيش تناقض".

"واشبعنا أحنأ؟"

هز جاك رأسه....

"زى ما قلت..أنتم الأكثر شعبية والأقرب لفكرة الحزب..فكر
أستاذ (عابد)..الموضوع هيكون نقلة بالنسبة لكم".
ثم قام واقفا ليعلن انصرافه..لم يستطع (عابد) أن يتبعه..كان
صامتا وتعبير عام من الإستياء يشملته..لكنه اكتفى مؤقتا
بالصمت...

"هكلمك تانى".

قالها الشبح الأسود ثم اختفى مجددا....

القيادة الأمريكية

صوت من الهاتف:

"بعض الأحزاب وافق..البعض رفض والبعض لسه بي فكر يا
فندم".

"مش مهم..هيوفقوا..ده بس رفض حذر مش أكثر".

"هنستمر فى المحاولة يا فندم".

"وأخبار المستشارين أية؟"

"شرحه يا فندم..وهنستمر أيضا فى المحاولة".

"نفذ".

تيت..تيت..تيت

أمام مبنى المحافظة....

يتحرك (جمضان) مغادرا سيارته..تتوقف خلفه سيارة أخرى ثم
يغادرها عدد من المستشارين....
كان د (عبد المنعم) في انتظاره أمام البوابة..هكذا أشار
لـمستشاريه أن يمكنهم الانتظار.....
"جولة موفقة يا فندم".

يجيه (جمضان) وهو يسير نشطا في اتجاه مكتبه....
"فوق ما كنت أتصور..البلد بتتغير فعلا يا (عبد المنعم)..والناس
مبسوطة..أنا كمان أحب الناس تشوفنى كثير..مش لازم أكون
شخصية خيالية بالنسبة لهم".
"تمام يا ريس".
"قولى..(ضاحي) سافر؟"
"سافر يا ريس".
"عظيم".

كان قد وصل إلى مكتبه.....
"تعالى يا (عبد المنعم)..عايزك فى موضوع".
"خير يا ريس".

جلس (جمضان) ثم أشار للدكتور (عبد المنعم) فى عجلة فجلس:
"أنا غلبت..كل ما أفرح بخطوة يجى شوية الدراويش دول
ينكدوا عليا..التقارير اللى جاية من البلد زى الزفت..النهج بدأ
بشتغل والوزرا فجروا..فلوس المشاريع بتتسلك والناس بدأت تحس
بده وتفقد الثقة..كل اللى عملته بيتهدم".

"كل كرسى يا ريس بيحى بالحاشية بتاعته..شروة واحدة..ده حال السياسة".

"شعورهم يانى بدأت استاء من عقولهم الضعيفة وحبرهم المعدومة وجهلهم اللي بقى خطر عليهم وعلى البلد خلاهم يحسوا إني قربت أتخلص منهم..كله بيقول ياله نفسى".
"والحال؟"

"أنا بين نارين..نار إني أسبهم يخربوا كل حاجة ويضيعوا الثقة اللي حاربت علشان أوجدھا..أو أتخلص منهم وساعتها هتكون حرب..الناس مش هتثق فينا فى الحالتين".
"واخترت أیه يا ريس؟"

صمت (جمضان) طويلا..هكذا كتم د (عبد المنعم) أنفاسه..لحظات ثم قال:

"بص يا (عبد المنعم)..أبعت للصحفى أياه قوله إني عايز أخبار بالجملة عن فساد الوزرا..بالتدريج علشان ما تلفتش النظر..وتبان كأنها أراء حرة نابعة من أحزاب المعارضة وإن إحنا بننشرها بحيادية تامة..الناس إتعودت على ده ومش هتستغربه..الأهم..عايزك توصل أكبر كمية من المستندات اللي تثبت فساد الوزرا لرؤساء الأحزاب الأخرى ومن غير ما يحسوا إننا وراھا..برضوا الأحزاب دى ليها صوت وجرايد..جاه الوقت علشان نستفيد منهم شوية".
"تمام معاليك".

"وأطلبلى مستشار الدفاع وقادة الجيش..عايزهم حالا".

لمعت عيناى د (عبد المنعم) ببريق اشتياق....
"كده هتكون حرب تطهير بيحركها الجماهير وبتطالب بيها
حزاب المعارضة يا (عبد المنعم)..إحنا لازم نتصاع".
هتف د (عبد المنعم) فى حماس:
"أمرك يا ريس".
"نفذ!!".

ناد بالمدينة....
جلسة تحوى ثلاثة من الشباب....
كان أولهم يرتشف سيجارته..ينفث دخانه فى الفراغ ثم يستدير
زميله ويقول:
"بس والله الراجل اللي اسمه (جمضان) ده جامد فحت..قلبه
ميت..طايح".
رد عليه شاب ثان وهو يحتسى مشروب ما:
"يا عم جامد أيه بس..دا ريس جالنا بالبرشوت من ورا
الجاموسة..دا عميل أمريكانى..أمريكا هي اللي خططت
ونفذت..ولاد الأيه لعبوها صح".
يرد ثالث:
"عميل أيه بس يا عم (أحمد)؟..هي أمريكا هتخلي الإسلاميين
يعملوا حزب..فيه فرق بين إن أمريكا تبقى حليف وأنها تكون هي
اللي وراك من الأول".

يقول الأول:

"برضوا جامد.. مبيخفش.. وبصراحة عمل شغل شديد في البلد".

يرد الثاني:

"ده أكبر دليل.. جاب الفلوس دي منين؟.. يا بني أمريكا هي اللي وقفته على رجله".

يقول الثالث:

"أمريكا مش أمريكا المهم إنه فعلا عمل فرق.. كفاية إنه خلى جرايد الحكومة تتصدق وتتباع أكثر من المعارضة.. عمرك شوف جرنال حكومي بيتنقد وزرا؟.. افتح وشوف كاتيين أيه النهاردة؟"

يرد الثاني في حزم:

"اللعب على الديمقراطية دي حركات أمريكاني محفوظة.. إيه اللي عرف الفلاح ده بالديموقراطية والأحزاب؟"

"يا سيدى مش فارقة.. أمريكا موجودة موجودة.. المهم إن الدنيا دلوقت فلة.. شوف يا عم المشاريع والشوارع.. دا أنا احتمال الأقى شغل قريب".

ثم يقول الأول:

"بقولكوا جامد.. جامد".

مبنى المحافظة....

(جمضان) وقد جلس ووجهه لمكتبه.. الصوت من خلفه يقول:

"أخو حضرتك وصل بالسلامة يا فندم".

أخذ (جمضان) نفسا عميقا ثم قال:

"وهو فين دلوقت؟"

"ارتاح في البيت يا فندم..حضرتك كنت في اجتماعك مع الجيش ففضلت إنه يرتاح لحد ما حضرتك تنتهى من الاجتماع".

"على خيرة الله".

كان ذهنه مشتتا بلقائه برجال الجيش..كان يفكر ربما للمرة الألف في هذه الخطوة المصرية..تذكر الحاج (محمد) لكنه تذكر شعبيته المفرطة في الكفة المقابلة..لم يكن من الممكن أن توزع لسلطة على اثنين..فكر في أخيه لحظة..ثم استرخى على كرسیه من جديد.....

كانت الصحف تفتش مكتبه وكانت أخبار الوزراء مبعثرة في كل صوب..فساد..هتب..رشاوى..ماض ملوث..التقارير الأمنية تؤكد بدء الاحساس العام بالاستياء تجاه الأداء الوزارى..المطالبة بالتدخل الرئاسى..أسبوعان من المطالبة الملحة بالتدخل.....

كان هذا - في وجهة نظره - هو الوقت المناسب.....

القرية.....

مزل الغريب.....

"بعث خد أخوه؟"

قالها الغريب مصدوما..أمامه كان (ضاحي) وكان غاضبا كالنار....

"وبعتني من غير مناسبة على البلد..دا حتى مكلمنيش لحد دلوقت".

قام الغريب من مقعده وقال:

"كده بانت يا (ضاحي)..شكله ناوى على الغدر".

"والعمل؟".

"جهز الرجالة..استعدوا..شكلها هتبقى حرب".

ساعتها اندفع جسد (أبو الليل) من خلال الباب....

"ألحق يا كبير...."

"في أيه يا (أبو الليل)؟"

"عملها الواطى يا كبير..عزلنا وعين شوية العيال بتوعه وزرا".

انتفض ضاحي في حين صاح الغريب:

"أنا كان قلبي حاسس".

ثم التفت إلى (ضاحي) وصاح:

"جهز الرجالة يا (ضاحي)..أحنا النهاردة يا قاتل يا مقتول".

تعالى الصباح في كل مكان بينما رجال القرية يهربون في كل
اتجاه.....

يظهر رجال الشرطة من بعيد..ثم صوت إطلاق النار.....

مبنى المحافظة....

نفس اليوم..بعدها بدقائق.....

"زى ما توقعنا".

قالها د (عبد المنعم)..ثم أردف:

"حصلت مقاومة عنيفة أثناء محاولة نقل السلطة بصورة
سلمية..الشرطة بتحاول تسيطر على الموقف بس واضح إنهم
هيستمروا..وإنهم مسلحين كويس".

"للأسف..أنا كنت حابب - إكراما ليهم - إن نقل السلطة
يكون همدوء..مكتش أحب ألبأ للعنف معاهم بس للأسف ده شبه
مستحيل".

"يعنى؟"

"قوات الجيش على حدود البلد؟"

"من ساعات يا ريس"

قال (جمسان) في حزم:

"خليهم يتحركوا".

كان وجهه قد صار لرجل في الخمسين من عمره..كان الإرهاق
بالفعل باديا عليه..لكنه لم يكن مترددا أبدا.....

"أوامرك يا ريس".

لم يستغرق الأمر طويلا.....

لم يكن أحد من المخلوعين يتوقع..كان الجيش مستعدا
وواتقا..كان سريعا كذلك..هكذا حدث كل شئ في دقائق وانتهى
والسنة اللهب تحرق كل شئ..الناس محتبئة في بيوتها ولا صوت على
الإطلاق غير صوت فرقعة اللهب.....

ذكرت التقارير الأمنية فيما بعد أن كل من (ضاحي) و(أبو
الليل) وابنه قد لقوا مصرعهم بينما اختفى الحاج (محمد) ومعه
زوجته و(أبو هاشم).....

كان الذهول قد شمل كل شئ.....
الكل مختبئ في بيته..خائف..وغير مصدق.....
لا أحد يفهم.....
صارت مدينة أشباح....

مبنى المحافظة.....

وقف (جمضان) كالصنم..يتأمل المدينة من النافذة وقد قتله
الأفكار..كان شاردا حتى أن د (عبد المنعم) ظل واقفا لفترة قبل أن
يبادر بالحديث....

"الجراید كلها بتشید بثورة التصحيح اللى أنت قمت بيها يا
ريس".

"والناس كلها فى البلد بقت بتكرهنى يا (عبد المنعم)".
"أمر كان لابد منه يا ريس..بكرة هتفرحهم وهينسوا كل حاجة..بيانك فى التلفزيون وصل للناس حقايق كثيرة مكنوش ناهمنها..أكيد هيعزروك".

ابتسم (جمضان) فى مرارة....
"السفير الأمريكى كلمنى النهاردة..بيقول إن أمريكا مش عاجبها إنى قمت بالتدخل العسكرى بدون علمها أو الرجوع ليها".
"مش فاهم..وده يزعلهم فى أية يا ريس؟..أمريكا بتتعامل معاك أنت فى الأساس".

ضحك (جمضان) ضحكة مريرة وقال:
"ومعتقدش إنهم يعرفوا أساميهم حتى..يا (عبد المنعم)..يعنى هما مكنوش يعرفوا اللى إحنا بنخططله من قبل ما نفكر فيه حتى..أكيد عارفين من ساعة ما قتللك اللى أنا ناوى عليه".
ابتلع (عبد المنعم) ريقه بصعوبة...

"وأنا عارف إن ده ميفرقش معاهم حاجة..دا بس وضع أسس للعلاقة المشتركة اللى بينا..منفكرش ومنقررش من غير منرجع ليهم..فى أية حاجة مهما كانت تافه وبسيطة".

ثم استدار لدكتور (عبد المنعم) وقد تذكر أمرا:
"المهم يا (عبد المنعم)..فيه مندوب من السفارة الأمريكية هيوصل بكرة الصبح..أنا مش متأكد من سبب الزيارة..ممكن يكون

مجرد تباحث بخصوص نوايانا في الفترة القادمة ويمكن حاجة
تاني.. خليك في استقباله لما نشوف أخرتها معاهم أيه".
"أمرك يا فندم"

مكتب رئيس مجلس الوزراء....
كان هذه الأخير متوترا.. أمامه وزير الداخلية وكان في حالة
مماثلة.....

"يعنى فيه بارقة أمل؟"
"والله يا فندم التقارير الأمنية كلها بتقول إن الإطاحة بالوزرا تم
بعملية عسكرية.. البعض مات والبعض مفقود.. في النهاية البلد بقت
خرابة.. واضح إن في حالة من الحرب الداخلية حصلت يا فندم".
"إحنا لازم نستغل ده".

"الوزرا اللي اتشالوا يا فندم ورجالتهم ليهم عزوة كبيرة في القرية
دى والقرى اللي جانبها.. فيه حالة من الغضب على اللي اسمه
(جمضان) ده.. إحنا هنلعب على الوتر ده.. إحنا ممكن محتاجش
عملية عسكرية مباشرة يا فندم.. مجرد دعم العناصر دى بأسلحة
وبعدد معقول من رجالتنا هيخليهم سلاح خطير على قيادة
الانقلاب.. الأهم كمان إن (جمضان) ضحى برجاله كلهم.. مش
باقى وراه غير الجيش.. لو بعنا حد من عملاءنا لشؤلاط ممكن
يستميل عناصر الجيش دى خاصة إنهم كلهم في الأصل رجالة
جيشنا.. يفهمهم إن المحوم وشيك وإنه في حالة التعاون هيتم

معاملتهم معاملة الأبطال..طبعا محدش هيرحمهم لو ثبت عليهم بعد كده تهمة الخيانة".

أبتلع رئيس الوزراء ريقه وقد شمله الحماس:

"المهم مفيش أى قوة أجنبية تحت بالموضوع ده..لازم تبان كعملية انتقام عادية..وأنا هكثف اتصالاتى السياسية مع أمريكا..ممكن نقدر نعيدھا..الاحتياط برضوه واجب".
"ممتاز يا فندم".

"يا للا يا سيادة الوزير .. مستنى أيه؟"

هكذا انطلق وزير الداخلية..ثم توقف لحظة واستدار لرئيس الوزراء قائلا:

"بس خليك فاكر يا سيادة الوزير..احنا اللي حلناها مش لدفاع".

مبنى المحافظة.....

(جمضان) وأمامه المندوب الأمريكى..كذلك جلس د (عبد
لنعم) وعيناه تراقبان الجلسة فى قلق.....
"أنا كنت متصور مستر جيمس إنك جاى تكلمنى عن الخطوة
للى أنتوا بتقولوا إني عملتها من غير علمكم".
"لا فخامة الرئيس..دا موضوع تنقشه جنابك مع رؤسائى لكن
نا مكلف بعرض ملف واحد على فخامتك..دا اللي أنا مكلف
بیه".

"ملف.. ملف ايه؟"

اعتدل المندوب قائلاً:

"طبعاً فخامتكم معندكش شك إن أمريكا حليف قوى
ليكم.. وإنها بالفعل قدمت ليكم الكثير من المساعدات الاقتصادية
والسياسية وكذلك العسكرية".

رد (جمضان) في حذر:

"أكيد"

"ونظراً للاضطرابات اللي تعاني منها بلادكم مؤخراً وكنا أكيد
لقوة العلاقة معكم إحنا بنعرض عليكم تدعيم العلاقات العسكرية
بصورة أقوى.. وتحقيق أكبر قدر من الحماية لكيانكم الناشئ".

تسأل د (عبد المنعم):

"أسلحة؟"

"الأسلحة مش كفاية دكتور (عبد المنعم) طول ما رجالتكم مش
كفاء للآن علشان يستخدموها.. ومعظم رجاله الجيش عندكم من
العناصر القديمة غير الموثوق فيها".

بدا صوت (جمضان) عصبياً وهو يقول:

"يعنى؟"

"أحنا بنعرض عليكم بناء منشآت عسكرية جديدة على أعلى
مستوى.. بتكنولوجيا أمريكية وتسليح أمريكي و.."

قاطعه (جمضان):

"قواعد أمريكية مستر جيمس؟"

لم يتوقع المندوب هذه الهجمة.. توتر للحظة ثم استطرد:
"فخامة الرئيس.. القواعد دى بتتضمنلك أكبر قدر من الحماية
..."

"أنا عارف اللي هتقوله مستر جميس.. ومستعد أسمعاه."

ثم مال عليه وقال فى صوت مكتوم الغيظ:

"مشكلتكم مستر جميس إنكم بتتعاملوا معايا بنظرة فوقية.. زى
كل دول العالم الثالث.. بتتعاملوا معايا على إني شاب متشرد فاشل
ناد انقلاب علشان يوصل لكل اللي كان بيحلم بيه وميقدرش يحققه
مقاييس العقل.. السلطة والنفوذ والمال.. ممكن الستات.. أو حتى
لانتقام.. كلب شهوانى بيعسب كل حاجة لنفسه.. عارف إنه وصل
لمكرسى من غير حق وعارف إنه -غالبا- هيطير من غير حق.. عايز
نهب ويجرى.. معندوش مبدأ وأكيد آخر حاجة بيفكر فيها هى البلد
للى مسك سلطتها.. مستعد يولعها حريقة.. يجرها ويقعد على
لها.. مستعد بيع أى حاجة علشان يفضل يحس بالكرسى تحت
نه."

ذهل المندوب من هذا الانفجار المباغت.. لم يرد وهكذا واصل
(جمضان)....

"لكن.. تدددددداه.. مفاجأة.. أنا مش الشخص اللى أنتو
نكرينوه.. أنا شخص عنده مبدأ.. أنا فعلا عملت المجازفة دى علشان
لناس.. علشان كنت متصور إني الشخص الوحيد اللى أقدر أثق فيه
علشان أخلى البلد دى تبقى أحسن."

ثم تنهد وقال:

"لكننى فى نفس الوقت أضعف من إنى أغير مصير شعب عظيم
عمره قرون كان دائماً فيها رمز وقدوة علشان أخليه على آخر الزمن
يتحول من رمز حر لتابع.. كمبارس.. مش هأقرر فى لحظة بمحاول
أحمى نفسى فيها إنى أفرض على شعبى تدخلكم المهين.. للأسف إنتم
زى الحرب.. صعب قوى تخرجوا منها لو دخلتوها.. حتى لو اتغير
على الكرسي ده مية بنى آدم.. أنا أقدر أقول لأ دلوقت لكن مش
هأقدر أقول لأ بعدين.. التنازلات مفيش تراجع فيها مستر جميس".

انتفض المندوب غاضباً وقال:

"مكنش فيه داعى سيادة الرئيس للمحادثة الطويلة دى.. كان
ممكن توفر وقتى ووقتلك وترفض مباشرة".

"أنا برفض يا سيدى.. برفض"

أغلق المندوب سترته فى انفعال وقال:

"إذن عن إذنك سيادة الرئيس".

"أفضل".

هكذا انصرف المندوب.. وما إن أغلق بابه خلفه حتى اندفع د

(عبد المنعم) نحوه وقال:

"يا ريس أنت انفعلت بصورة مبالغ فيها.. أنا أول مرة أشوفك

بتفكر بالطريقة الغريبة دى.. أنت كده هتخسر كل حاجة.. حتى لو

مش موافق.. ماطل معاهم شوية.. واحدة واحدة مش كده".

"سيبني دلوقت يا (عبد المنعم)".

قالها في غلظة.. هكذا يحمد الرجل مذهبولا لدقيقة.. ثم استدار
منصرفا في غيظ وقد انتابه شعور بالاستياء....
كان (جمضان) يعلم أنه على حق.. كانت تصرفاته تزداد حماقة
هذه الأيام.. لكنه صار عاجزا عن المزيد من التفكير.....
أرخصي رأسه و ترك نسمات الهواء تداعب وجهه وذاب من
جديد في بحر أفكاره.....

القيادة الأمريكية

صوت واثق من الهاتف:

"أيه رأي فخامتك؟".

"مفيش مشكلة.. ده اختياره".

"واضح من صوت حضرتك إنك مش مستاء.. حضرتك -
كأنك - كنت بتتوقع ده".

"الدول العظمى مش بتدار بالظروف.. أحنا بنخطط لكل
الاحتمالات.. مفيش احتمال مش بنعرف نكسب من وراه".

"قصده حضرتك؟"

"هو اختار وإحنا اخترنا.. دي دولة إرهابية والناس في العالم كله
هتأكد من ده.. والدولة اللي انفصل عنها الأخ (جمضان) ده بتعرض
- للمرة الألف - عدم تدخلنا في التعامل معاه.. طبعا هيكونوا أكثر
مرونة عن الأول وهيقبلوا أكيد ولو بعض طلبتنا.. أولها إننا نتعاون
معاهم في عملية الهجوم على العناصر الإرهابية في شولاط.. كده

هتعتبر منطقة نزاع وده يخلينا نريح فيها شوية..ده غير مطالبنا الثانية..أكيد مش هيرفضوا المرة دى بالذات لو حسسناهم إنه عرض أخير هنضحى فيه بمصالحنا مع شولاط علشان علاقتنا التاريخية بيهم..هيتزلوا لأنها فرصتهم الأخيرة".

"يعنى (جمصان) خلاص بقى...".

"كارت محروق..فى الواقع خطتنا كانت متوازنة..ما بين استغلال دولة جمصان كحليف للوصول لأهدافنا فى المنطقة وما بين دعمه علشان يكون ده وسيلة ضغط على الدول الأم علشان تستجب لطلباتنا..برضوه لخدمة أهدافنا فى المنطقة..الخطة كانت معمولة بفرصتين..خمسين فى الميه وخمسين فى الميه..لكن فى رأى الشخصى كان الاحتمال الثانى هو الأقرب للمنطق..وأديه بيتحقق..وهاكلكم بوضوح..الخطة فى الأساس مبنية على الاحتمال الثانى..إحنا فى الأساس كنا بندعم (جمصان) علشان نضغط على الدولة الأم..علشان بعض التنازلات".

"يعنى؟"

"يعنى تنفذ الأمور دى دلوقت حالا".

مبنى المحافظة.....

الساعة الثانية صباحا..مر أسبوع واحد فقط على هذه
المحادثة.....

(جمضان) متمددا على الأريكة فى مكتبه..شاحب
الموتى..صامت كالقبر..بينما يدخل عليه د (عبد المنعم) وهو فائر
كالجحيم....

"أنت نائم يا ريس؟"

رد (جمضان) فى خفوت مغلقا عينيه:

"فيه ايه يا (عبد المنعم)؟".

"فيه ايه؟..فيه إنها خلاص خربت..كل شئ انتهى..كل يوم
حادثة فى الجامعة أو فى الشوارع..وبيكون أطرافها أمريكان أو حتى
طوائف دينية مختلفة..وجرايدك الحرة كل يوم بتنشر أخبار الحوادث
،الاضطهاد الدينى اللى الناس بتعانيه فى بلدك..أمريكا وصلت لكل
لعالم سوء العلاقات اللى وصلناله معاهم كأنها بتعلن إنها خلاص
رمت طوبتنا..مش بس كده..دى بتوصل للعالم إننا بسبب ده بقينا
نحاول نأذيههم..ثلاث حوادث إرهابية فى ثلاث سفارات أمريكية
فى أنحاء العالم..كل مرة يقبضوا على ناس بدقون ويقولوا إن أصابع
لائهام بتشير يا لينا يا لأحزابنا الدينية..فاهم معنى الكلام ده يا
ريس..خلاص..أمريكا ناوت"

رد (جمضان) فى خفوت:

"عارف كل الكلام ده".

"كل ده وأنت مش بتفكر غير فى أنحوك..أعيز تمسكه الحكيم من
بعدك؟..يا راجل أعمل حاجة..اتصرف".

هكذا انتفض (جمضان) فجأة..ظهر ما بداخله من انفعال..وجد نفسه يهب واقفا في وجه د (عبد المنعم) ويصرخ:
"يعني عايزنى أعمل ايه يا غي؟"

"تحاول تصلح اللي اتكسر..قواعد قواعد..لا أنت أول ولا آخر واحد..مية دولة عملتها قبلك محدش قال عليهم من غير مبادئ..قدملهم تنازلات أكثر يمكن يرضوا عنك".
أطلق (جمضان) ضحكة ساخرة مريرة.....

"أنا لسه مستنى نصحتك..أنا عملت اللي أقدر عليه..كلمتهم أكثر من مرة..بعث ميه فاكس..محدش رد عليا..آخرتها لقيت رسالة على موبياالى..تخيل؟..بجرد رسالة موبيل..كاتيين فيها إنه خلاص..الموضوع انتهى..خلاص يا (عبد المنعم)..كلامك محدش ليه فائدة".

"يعنى أيه؟"

أمسكه د (عبد المنعم) في هياج....

"يعنى خلاص؟..ضعنا..الله يخرب بيتك".

دفعه (جمضان) غاضبا وصاح:

"محدش كان ضربك على ايديك..أنا كنت بعمل كل ده علشان حاجة..أنت كنت بتعمل ده ليه؟..علشان دكتور زيك فى محافظة مرمية عمره ما هيوصل الحاجة حتى لو أشتغل مية سنة وفجأة لقي الفرصة قدامه إنه يبقى وزير..سلطة..فلوس..وجاهة".

"أمال أنت كنت أيه إن شاء الله.. رئيس وزراء؟.. أوعى تكون
فاكر إن فيلم المبادئ دى ممكن يخيل عليا.. لأ يا حبيبي أنت زيك
زينا وأسوأ كمان".

تنفس (جمضان) نفسا عميقا.. كان بالفعل واهنا فاكتفى بالقول:
"خلاص يا (عبد المنعم).. معدش يجي منه.. اتفضل أطلع بره".
"أنا طالع.. أنا مستقيل.. اعتبر إنك عمرك ما عرفتنى".
ثم تركه وانصرف لكن (جمضان) ناده فى اللحظة الأخيرة..
"متفكرش إنك بكده هتتنصل منى.. أمريكا عرفاكوا واحد
واحد".

ثم استطرد:

"وعرفاك أنت بالذات".

صوت الباب يكاد يتحطم.....

القرية.....

أمام حقله شبه المحترق جلس (بسطاوى) يشاهد التلفاز.. كان
الأخير يذيع بيانا أمريكيا يندد باضهاد رعايها وأبناء الديانات
الأخرى فى برشوط.. لكنه لم يكن شديد التركيز.. كان شاردا قد
زاد الهم على عمره عمرا.....

"الله يرحمك يا (سعد).. مكنتش مصدقنى.. ياما كنت خايف
الحلم يتقلب كابوس.. وأهو حصل.. أنا عارف إنه مش مكتبولنا
نعيش زى ولاد الناس أبدا.. وأدى البلد رجعت أسخم من

الأول..حتى اللى راحوا ماجاش غيرهم..والحال كله وقف..الله
يخرب بيتك يا (جمضان)".

كان محبطا حتى أنه لم يهتم كثيرا لأمر عربة النقل التى وففت
عند منتهى الطريق..لم يقم ولم يسأل..لو كان فعل لكن قد رأى
الرجال يزلون الأسلحة منها متسترين بالظلام.....
أحد نواذى العاصمة...

جلسة من الشباب حول مائدة يحتسون بعض المشروبات....
"للأسف (جمضان) ضاع وضعنا معاه يا جماعة..خسارة الراجل
ده لو كان اتساب فى حاله كام سنة كان ظبطنا".

يقول الثانى:

"يا عم ظبط أيه؟..ده مجنون..حد يدوس كده فى أمريكا".

يقول الثالث:

"يا عم تلاقى أمريكا هى اللى بتبلى عليه..ما أنت عارفهم..ما
هم مش هيسيبوا حد يعمل حاجة فى البلد دى".

"يا جماعة ده راجل أهيل وغرقنا..الناس كلها خايفة إن أمريكا
تخش على قفا هبله ده".

"يا عم أمريكا هى اللى بتلكك"

"بس هى معرفتش تلكك غير معاه..علشان عبيط".

"يا أخونا دى كارثة..أمريكا هتخرها".

"الله يخرب بيته".

مكتب رئيس مجلس الوزراء.....

الأخير وقد عاد شابا من جديد..يمسك هاتفه ويقول:
"خلاص يا معالي الوزير..كل حاجة تمام..اتحرك".
بيت صغير بالمحافظة...

العميد (زكى)..يقف بشيابه العسكرية وأمامه شخص كبير السن
في ثياب رثة..لكن نظراته كانت مفعمة بالثقة والقوة..كان الأول
مبتهجها وقد أدى التحية قائلا:
"تمام يا فندم".
مبنى المحافظة....

(جمضان) جالسا على الأرض..يستند على الحائط وقد بدا
كالميت..مبنى المحافظة قد خلا من الناس تماما وإلى الأبد..وبدا
كالمقبرة.....

حاول أن يتحدث إلى قادة الجيش لكن أحدا لم يجب..لم يهتم
كثيرا..هذه شكايات لا أكثر..رد عليه فيما بعد عسكري بالجيش
يخبره أن كل شئ على ما يرام...!!
هكذا استرخى ولم يفكر أكثر.....

الإعلام اليوم
جريدة الإحرام (جريدة حكومية):
"قوات الأمن تحكم الحصار على المتمردين في شولاط..وزير
الداخلية يتعهد بتقلم محاكمة عادلة للجنة".
جريدة ضيق البلعوم وهي جريدة معارضة:

"صفقة أمريكية لإعادة الأوضاع في شؤلاط..ومن يدفع الفاتورة"

جريدة صوت شؤلاط وهى جريدة جديدة حلت محل الجريدة المحلية السابقة:

"قوات الأمن تتحرك في اتجاه شؤلاط بأعداد ضخمة..تضائل فرص المتمردين في النجاة ووزير الداخلية يعد بمحاكمة عادلة للجنة".

قناة البحيرة:

يستدير المقدم بكرسيه اتجاه الشاشة الأولى ويقول:
"أستاذ (صفوت)..بصفتك عضو مهم في الحزب الحاكم..ما هي آخر تطورات الموقف مع الإرهابيين في شؤلاط؟".
يظهر وجه جاد على الشاشة.....
"أحب أطمئن السادة المواطنين إنه في غضون ساعات سيكون الموقف في شؤلاط قد استتب..قواتنا مهيمنة على الموقف تماما".
"عظيم..وهل تتوقع مواجهات عنيفة؟"
"إطلاقا..الرئيس حاضط سلامة المواطنين فوق كل اعتبار..أمال أيه؟"

"أستاذ صفوت..تحب تضيف حاجة؟"

"آه..إن هي دى الشفافية يا معلم..الشفافية"

ثم يدور ويتحدث إلى الشاشة الثانية:

"أستاذ (حسين)..حضرتك عضو بارز في أحد أحزاب المعارضة..هل كان عندك تعليق؟".
"تكلم الصوت من الشاشة الثانية وكان عابسا للغاية:
"طبعا عندي..خلال مدة طويلة كانت الحكومة بتنكر بينما العالم كله عارف اللي بيحصل في شؤلاط..دلوقت الحكومة بتعلن سيطرتها على الوضع..أيه اللي أتغير؟..أنا أقصد.....".
"حسننا..حسننا أستاذ (حسين)..عذرا لوقت البرنامج..هل لديك أقول أخرى أستاذ (صفوت)؟"

مبنى المحافظة.....
(جمضان) جالسا جلسته التي لم تتغير منذ زمن..فقط اطمأن إلى هريب أخيه وعاد إلى نفس المكان.....
في الواقع كان هشاً..هشاً حتى عن أن يحاول الهروب....
السكون يغطي على المبنى بأكمله..لا صوت..لا حركة.....
الوقت الساكن لا يمر.....
لكنه لا يقوى على التفكير..يسترخي فقط..ينتظر اللحظة..لم يحاول أن يشاهد شيئا أو يقرأ..فقط ظل كما هو.....
حتى حين دوى صوت النيران في المنطقة..ظل تماما كما هو....
كان كالميت..وكان يفصله عن ذلك لحظات بالفعل....
التقارير الأمنية بعد ذلك ستذكر إن النيران كلها كانت للإقناع بالحرب..لم يكن هناك مقاومة من أى نوع..قوات الأمن من

الخارج..القوات المسلحة من الداخل..عناصر ناقمة من
القرى..لم يكن هذا سمرعا بقدر ما كان تلاحم للقوى..فقط ظل
البعض ليضرب رصاصة أو اثنين قبل أن يسقط.....

(جمضان) كجثة هامدة...لم يحاول حتى أن ينظر من الشرفة..أن
يرى من يهاجم..في الواقع كان هناك العديد من القوات
الأمريكية..أكثر مما يتحمله الموقف.....

فقط تذكر (جمضان) أن ينطق الشهادة.....

ثم دوى صوت الانفجارات.....

لحظات ثم انتهى كل شيء..في الواقع لم يقاوم على الإطلاق....

ذكرت تقارير أمنية فيما بعد أن (جمضان) قد اختفى ولم يعثر له
على أثر بعد اقتحام مبنى المحافظة..بدا ذلك غير منطقي للجميع
لكنهم أقروه..هكذا تحول (جمضان) من سجل الأموات إلى سجل
المختفين.....

ولكن التصريحات الأمريكية جاءت مطمئنة.....

لن تترك أمريكا البلاد قبل العثور عليه.....

كان ذلك مبهجا لكل أنصار الحرية وكارهي الإرهاب
بالعالم...كانت القيادة الأمريكية قد أقسمت أن تضحي في سبيل
العثور عليه بأي شيء.....

هكذا بدأت القوات الأمريكية في انتشارها.....

وحارى البحث.....

للتواصل مع الكاتب

E-mail: Dr_sherif_shazly@yahoo.com

Facebook account: Dr sherif Shazly (or
through the novel page).